

# **Amang'ana Amazomu ga Yeesu**

## **kyeego gakaamirwe na**

### **Ruuka**

#### **Obhutaangiro**

Ekitabhu kino ni eriigaruro rya amang'ana amazomu ga Yeesu Krisito, kyeego gakaamirwe na Ruuka. Birimu ebhitabhu bhine muriragano eriihya rino rirabhirikirwa Amang'ana Amazomu. Abhakaami bhe ebhitabhu bharatubhurira etwe ekigirye kyo obhwiikari bhwa Yeesu, nawe eng'ana ye obhuheene ni kubha akeenda kureeta amang'ana ga Yeesu kubhasomi bhaaye, no okubhakumiirirya abhaatu bhamwiikirirye.

Ruuka akeenda omuutu wuno yaari akubhirikirwa Teofiro, amenye obhuheene kukigirye obhwiikari bhwa Yeesu, emirimo ne ebhisigo bhya amahokya gaaye. Kweego, akakaama ekitabhu kyaaye, niho kweeki akakaama ekitabhu ekiindi, kino kikubhirikirwa Amahokya ga Abheegya (Matendo ya Mitume). Tutana amang'ana maaru go okugaamba iguru ya Ruuka, nawe ewe yaari ni omugabhu ewe kurugeendo oruundi ahaagya hamwe na Pauro (rora Abhakorosai 4:14, 2 Timoteo 4:11 na Firemoni omukiriri gwa 24).

Ruuka ewe akakaama ku Kiyunaani, nawe bhoono, ekitabhu kino kimariri kugarurwa mukigaambo kyaazo! Kweego, oranagya kukisoma na okukimenya bhwaheene. Ekeembo ya abhagaruri ni okugarura bhwaheene amakaamo go okutaanga. Bhatagarwiiri eng'ana ku eng'ana, nawe bhakakora omukya mwaaru kwo okugakora amakaamo gano giitegeererwe no okugamenyeekererya kyeego ekigaambo kyaazo kya simuka kiri.

#### **Amang'ana amakuru ge Ebhibhuria**

Mukitabhu kya Ruuka, kuna amang'ana amarebhe amakuru gano gakweerekya ahagiro ha amang'ana amakuru ga muBibhuria. Amang'ana gayo ni ge ebhirengyo ebhirebhe kyeego: obhuhoreeru, okweerya, eriiseengerero, maraika, omuseengeri, n.k. Hamwe amang'ana agaandi gataraho mukigaambo kyaazo kya simuka, kweego abhagaruri bhaari abhiitegeererer bhukong'u no okukomya amang'ana gano gakunagya kwiimeererera obhuheene. Abhagaruri bhakabha na amang'ana obhurebhe go okukeerenerya na abhaatu kurwa mukigaambo kyaazo kubha bhakeerenia nabho kyeego bharaanagye kumenya no okwiikirirya amang'ana gano. Kwo okwiiririrya amang'ana gano, abhagaruri bhakagasora no okurora kubha, garanagya kugarura amang'ana amakuru ge Ebhibhuria. Obhusori bhwo obhuteero bhwa amang'ana goosi bhukyaari kukorwa, bhuno bhukorirwe kwo okuganya kwo okumenyeekererya bhwaheene kwa amang'ana goosi. Kweego, abhagaruri bharazomererwa okwiigwa kyeego awe oraarusye amiiseego gaazo agaandi go okugarura amang'ana amarebhe ku gayo osomiri. Oraakore ego orabha obhasakiirye abhagaruri okwoongera okuzomya emirimo gyaabhu.

#### **Amakeerenio iguru ya amang'ana amakong'u**

Abhagaruri bhasakirye kugarura kunzira yino iraausakirye omusomi kumenya bhwaheene ekeembo ya amang'ana gano akusoma. Yiiingabha, kuna amang'ana na amiiseego agaandi masuuu muBibhuria gano gatakunagya kugarurwa bhwaheene, nawe kubhuteero bhwe ekitabhu kino osome, obhukaangati bhwa

amakeerenio ga amang'ana amarebhe gano gakaangatiribhwe kwo okukusakirya omusomi kumenya bhwaheene.

### **Amakeerenio kukigirye enzota kyeego \*, na amang'ana gano gari mumakaamo kyeego []**

Okubha agaandi orarora kubha, mubhuteero mwe eng'ana kuna orukaamo orusuuhu, hamwe eziinzota ezisuuhu eziindebhe kyeego \*. Ziyi zireerekyia kubha, orore mubhuteero bhwe enyaarubha riyo, kwi iyaasi, orabhona obhusakirya kwo okumenya bhwaheene ahagiho hano okusoma. Ku gayo gakaamirwe iyaasi, orabhona amakeerenio kwo obhutaambi bhukong'u ku amang'ana amakong'u gano gari mumakaamo gayo. Kwe ekireengyo, rora Ruuka 15:8.

Kumikiriri egiindi gya amang'ana, orarora amang'aara agaandi gane ekeembo ekiseku, na agaandi ni obhubhari bhwe emikiriri iguru ya amang'ana amazomu, kweego amang'ana gano gari ahagiho hayo gatuubheeni na ahagiho ha Ruuka aheene. Kwe ekireengyo, rora Ruuka 2:1, omukiriri gwa amang'ana gayo guragaamba iguru yo okwiibhurwa kwa Yeesu, na amang'ana garakweerekyia osome Mataayo 1:18-25.

Kweeki, oraasome amang'aara agaandi, garakweerekererya amang'ana agaandi kurwa muBibhuria, gano garaakusakirye okumenya bhwaheene ahagiho hano okusoma. Kwe ekireengyo, rora Ruuka 6:15.

Amang'ana agaandi gano gari mumasandiko amasuuhu hamwe no orung'ooro kya runo []. Kwe ekireengyo, rora Ruuka 8:43, kweego orasoma:

*Na gati ya abhaatu bhayo, yaariho omukari, wuno ahaabha no obhurweeri bhwo okurwa amanyiinga kwiibhaga rye emyaaka ikumi ne ebhiri. [Yiingabha yaari amariri obhuniibhi bhwaaye bhwoosi, okuriha abhagabhu,] ataari ariho wuno akunagya kumuhorya.*

Ekeembo yo orung'ooro ruyo ni yino, amang'ana gano gari murung'ooro ruyo gatari mumang'aara agaandi ge Ebhibhuria ye ekare. Amang'ana gayo, ni amang'ana amakuru go obhwiikirira.

### **Amang'ana gano gari mukitabhu kya Ruuka**

Ruuka arakeerenerya ekigirye kyo okukaama ekitabhu kyaaye (1:1-4)

Ebhisigo bhino bhigirirye okwiibhurwa kwa Yeesu Krisito (1:5-2:52)

Emirimo gya Yohana Omusubhi (3:1-20)

Yeesu arasubhwa na okusakibhwa na Seetaani (3:21-4:13)

Yeesu areegya, no okuhorya Gariraaya (4:14-9:50)

Amang'ana ne ebhisigo bhya Yeesu hano yaari murugeendo okweerekerera Yerusaremu (9:51-19:27)

Obhutuuro bhwo obhuteero bhwa Yeesu Yerusaremu (19:28-23:56)

Omukuru Yeesu aryokiri (24:1-53)

Kwo okwoongerya, naawe woosi otubhuurire amiiseego gaazo, no okutuzwenia obhubhi bhuyo bhwoosi gano okumenyeekererya kukigirye engaruro yino.

Amiiseego na amasabhi ga abhagaruri ni kubha, kira owumwe hano araasome ekitabhu kino, amenye bhwaheene iguru ya Yeesu, arabhona obhuzomererwa kwo okumumenya no okumuseengera ewe omweene.

**1** <sup>1</sup> Omuguungibhwa Teofiro, garya gaakorirwe gati mweetu, abhaatu bhaaru bhakoriri omukya gwo okukaama iguru yaku. <sup>2</sup> Gakaamirwe bhwaheene amang'ana kya garya goosi tugiigwiiri kubhamenyeeekererya kurwa kubhutaangiro, na bharya bhahaabha bhanyaraganiana eng'ana ya Emuungu. <sup>3</sup> Noosi nigiiisuunziri no okumenyeekererya bhwaheene, kyeego goosi gakorirwe kisi kweemera

kubhutaangiro, nikarora ni kisi nikukaamire gayo ng'orang'ora, <sup>4</sup> okubha obhe no obhuheene kugarya weegiibhwe.

### Obhurooti bhwo okwiibhurwa kwa Yohana Omubatiizi

<sup>5</sup> Eriibhaga Herode yaari omutemi wa Yudea, ahaabhaho omuseengeri\* wumwe we Emuungu, eriina ryaaye niwe Zakaria, yaari mukisendo kyo obhuseengeri bhwa Abiya. Na mukaaye Erizabheti, ewe yaari wa mukisyooko kyo omuseengeri Haruuni. <sup>6</sup> Abhabhiri bhayo, bhakiikiriribhwa embere ya Taatabhugya Omukuru, ebho bhaari bhariigwa emigiro gyaaye gyoosi, ne eziinzira zaaye bhataari kuzisarya. <sup>7</sup> Batahaabha no omwaana, kwo okubha Erizabheti yaari muguumba, neebho bhaari bhakuunguhiri bhukong'u.

<sup>8</sup> Orusiku rumwe, ekisendo kya Zakaria kyaari kirakora obhurisya bhwo obhuseengeri embere we Emuungu. <sup>9</sup> Kunyaangi yo obhuseengeri bhwaabhu, abharikyaaye bhakamwitora Zakaria kubha, niwe araasikire munyuumba ye Emuungu,\* okubha amuguundirirye omuguundiriryo. <sup>10</sup> Kwiibhaga ryo kwookeerya omuguundiriryo, habhoori bhakiikumania abhaatu bhaaru, kwiisasaama Taatabhugya.

<sup>11</sup> Niho, akahwaarukirwa na maraika\* wa Taatabhugya, hwaa! Maraika wuyo, akiimeerera orubhaara rwo obhuryo ho okwookeerya omuguundiriryo. <sup>12</sup> Ne eriibhaga riyo, Zakaria woosi akamurora, akiitakya no okwoobhoha bhukong'u!

<sup>13</sup> Kyaamwe, maraika akamubhurira, "Awe Zakaria, otoobhoha! Taatabhugya yigwiiri amasabhi gaazo. Mukaazo Erizabheti, arakwiibhurira omwaana we ekisubhe, oramutoga eriina ryaaye, abhe Yohana. <sup>14</sup> Omwaana wuyo, niwe araakore muzomererwe no okuriiryaata, na abhaatu bhaaru bharazomererwa kwo okwiibhurwa kwaaye. <sup>15</sup> Arabha omukuru embere wa Omukuru, ataanywe marwa ne ebhiindi bhyoosi bhino bhikugwaata. Arabha yiizuriibhwe Ekoru Muhoreeru kurwa muunda ya nina. <sup>16</sup> Arakyoorya Abhiiziraeri bhaaru ku Taatabhugya Omukuru waabhu. <sup>17</sup> Aramukaangatira Omukuru arabha ne ekoro no obhunagya kya bhwa Eriya, na abhakumanie abhaatu bhamuturuung'aane. Arabhagwaatania bhataata na abhaana bhaabhu, no okukora bhano bhatakumwiigwa bhabhe na amang'eeni ge eheene."

<sup>18</sup> Zakaria akabhurya maraika, "Ndora enye na mukaane tukunguhiri! Niki kiranierekye obhuheene bhwo okubhona omwaana?"

<sup>19</sup> Maraika wuyo akabhuga, "Enye neenye Gaburieri, nikwiimeerera embere we Emuungu. Ewe niwe anitumiri kubha, niize kukubhurira Amang'ana Amazomu. <sup>20</sup> Kwo okubha otiikiriire gano nakubhuriiri, kweema bhoono orabha imuumu, na otakunagya kugaamba tee, kuhikira gayo garaakorwe kwiibhaga ryaaye."

<sup>21</sup> Abhaatu bhahaaganya Zakaria ahuruke igutu, bhakaruguura kurora kyeego yakezeerimu. <sup>22</sup> Hano yaahurukirumu, ataanagirye kweeki kukeerenia nabho, akataanga kubheerekye kwa amabhoko. Kyaamwe bhakamenya kubha aruuzi amiiseegi, ewe akageenderera kubha imuumu. <sup>23</sup> Hano yamariri eziisiku zaaye zo okukora emirimo munyuumba ya Taatabhugya, akagya yiika. <sup>24</sup> Kyaamwe, mukaaye Erizabheti akagega enda, akamara emyeeri etaano yaari akiibhisa,

\* **1:5 Omuseengeri** ni omuutu wuno yakukora emirimo gya mwiiseengerero rye Emuungu. Rora Amakeerenio ga Amang'ana Amakong'u kubhuteero bhwe ekitabhu kino.

\* **1:9 Enyuumba ye Emuungu** ni enyuumba yimwe ego yino Abhayahudi bhaari kuseengera no okurusirya ebhimweeso Yerusalemu. Rora Amakeerenio ga Amang'ana Amakong'u kubhuteero bhwe ekitabhu kino.

\* **1:11 Maraika** ni mubhagati wuno yaari kutumwa na Taatabhugya mubhutemi bhwaaye. Rora Amakeerenio ga Amang'ana Amakong'u kubhuteero bhwe ekitabhu kino.

<sup>25</sup> akabhuga, “Awe! Omukuru, niwe anikoreeri ego! Anduusiirye eziisoni embere ya abhaatu.”

### **Obhurooti bhwo okwiibhurwa kwa Yeesu**

<sup>26</sup> Hano enda ya Erizabeti ekahikya emyeeri esaasabha, Emuungu akatuma maraika Gaburieri mumugye gwa Nazareeti, mukyaaro kya Gariraaya.\*

<sup>27</sup> Akatumwa kumuukya wumwe, eriina ryaaye niwe Mariamu, yaari ayungibhwe no omusubhe wumwe, eriina ryaaye niwe Yusufu, we ekisyooko kyo omutemi Daudi.

<sup>28</sup> Hano maraika yagiiri kuMariamu, akamubhuurira, “Nirakukeya, awe omutweerwa we ebhite, Omukuru ari hamwe naawe.”

<sup>29</sup> Hano akiigwa amang’ana gayo, egoro yaaye ekatubhuzikana, akiibhuurya, “Nkeeryaki yino?”

<sup>30</sup> Maraika akamubhuurira, “Weyaa Mariamu, otoobhoha! Omutweerwa we ebhite wa Taatabhugya. <sup>31</sup> Rora! Bhoono oragega enda, na oriibhura omwaana we ekisubhe, na wuuzo omutoge eriina Yeesu. <sup>32</sup> Arabha omukuru, arabhirikirwa Omwaana wa Taatabhugya\* wi iguru wa bhyoosi. Taatabhugya Omukuru arabhwimeererya kweeki obhukaangati bhwo obhutemi bhwa Daudi isiikuru waaye, no okumuha omwaana wuyo. <sup>33</sup> Arabha omutemi we ekisyooko kya Abhiiziraeri kirakeego, no obhutemi bhwaaye, bhutakubha no obhuteero.”

<sup>34</sup> Mariamu akabhuurya, “Garabhabhwi, neenye nitakaruuzi omusubhe?”

<sup>35</sup> Akamukyoora, “Egoro Muhoreeru arakwiikira, na amanaga ga Taatabhugya wi iguru wa bhyoosi, gakukuundikiirye ribhii. Kweego, omwaana wuyo akwiibhurwa, arabha omusorwa no okutogwa Omwaana wa Taatabhugya.

<sup>36</sup> Nawe omuhiiri waazo Erizabheti, wuno abhaatu bhaari bhamumenyiri kubha ni muguumba, agegiri enda yo omwaana we ekisubhe mubhukikuru bhwaaye. Bhoono ariinda ya emyeeri esaasabha. <sup>37</sup> Gayo gatuukiri kwo okubha ku Taatabhugya, bhyoosi bhiraturikana.”

<sup>38</sup> Mariamu akabhuga, “Neenye omuhokya wo Omukuru, ebhe kweenye kyeego ogaambiri.” Kyaamwe akagya.

### **Mariamum aragya kukeerya Erizabheti**

<sup>39</sup> Mariamu akakora bhwaangu orugeendo, rwo okugya ku Erizabheti eziisiku ziyo ziyo, mumugye gumwe gwe ebhiguru bhya Yudea. <sup>40</sup> Hano yasikiiri wa Zakaria, akakeerya Erizabheti. <sup>41</sup> Hano Erizabheti akiigwa akeeribhwe na Mariamu, omwaana yaari muunda yaaye akatumatuma, tiki tiki. Hayo hayo akiizuribhwa ne Egoro Muhoreeru, <sup>42</sup> kyaamwe akagaamba kwiiraka ikuru,

“Mubhakari bhoosi awe naawe omutweerwa we ebhite! No oriibhura omwaana omutweerwa we ebhite! <sup>43</sup> Enye niwi tee, nina wo Omukuru waane yiize kunikeerya? <sup>44</sup> Hano niigwiiri oranikeerya, omwaana akatumatuma muunda yaane tiki tiki kwo obhuzomererwa. <sup>45</sup> Awe naawe omutweerwa we ebhite, kwo okubha wikiriirye gayo Omukuru akakubhuurira gakorwe.”

### **Omweembo rwa Mariamu**

<sup>46</sup> Mariamu akabhuga,

“Egoro yaane, eramukumya Omukuru,

\* **1:26 Gariraaya** ni ekyaro muusi ya Iziraeri. Rora eramani ya Iziraeri mukitabhu kino.

\* **1:32 Omwaana wa Taatabhugya** ni omwaana wuno yasorirwe na Taatabhugya omweene, ni eriina rino ni kya rirya rya Yeesu. Rora Amakeerenio ga Amang’ana Amakong’u kubhuteero bhwe ekitabhu kino.

<sup>47</sup> erazomererwa ewe niwe Omutuurya waane.

<sup>48</sup> Kwo okubha, anihitiri omuhokya waaye, niingabha enye ni omuregwa.

Kurwa bhoono, abhaatu bha amakura goosi na gano gakuuza, bharabha bharangaamba kubha neenye omutweerwa we ebhite.

<sup>49</sup> Kwo okubha Taatabhugya wa amanaga, anikoreeri amang'ana ge ekiruguuro, ne eriina ryaaye rirakira amariina goosi.

<sup>50</sup> Taatabhugya arasakirya abhaatu bha amakura goosi na gano gakuuza, ku bhano bhakumwiigwa.

<sup>51</sup> Akoriri amang'ana amakuru kumanaga go okubhoko kwaaye, anyaragenie abharegeni bhoosi muziikoro zaabhu.

<sup>52</sup> Yitumirye abhakaangati kurwa kubhitumbi bhyaabhu bhyo obhukaangati, kimwe, abhatiirirye abharegwa.

<sup>53</sup> Bhe enzara, abhiigutirye bhwaheene,

nawe abhaniibhi abhaheebhiri amabhoko bhusa.

<sup>54</sup> Abhahiitiri no okubhasakirya Abhiiziraeri abhahokya bhaaye, akabhakorera omureembe.

<sup>55</sup> Akakora kyeego yaragiri Aburahamu na bhazaazi bheetu, na abhaatu bhe ehamati yaaye kirakeego.”

<sup>56</sup> Mariamu, akamara emyeeri etatu ari we Erizabheti, niho yagarukiri yiika kweeki.

### Okwiibhurwa kwa Yohana Omusubhi

<sup>57</sup> eziisiku zo okwiibhura kwe Erizabheti zikahika, akiibhura omwaana we ekisubhe. <sup>58</sup> Hano abhanyaroobho na abhahiiri bhaaye bhakiigwa, kyeego Omukuru yamukoreeri omureembe mwaaru, bhakazomererwa hamwe neewe.

<sup>59</sup> Omwaana wuyo, hano yahikirye orusiku rwa kanaane, bhakaaza kumusaara bhakeenda kumutoga eriina rya wiise Zakaria. <sup>60</sup> Kyaamwe, nina akaanga, akabhuga, “Zeyi, atogwe Yohana.”

<sup>61</sup> Bakamukyooru, “Ndora eriina riyo ritari mubhahiiri bheenyu?”

<sup>62</sup> Niho, bhakabhuurya wiise, kwo okumweerekyu na amabhoko, keembo, abhazweenie kyeego akweenda atoge omwaana waaye. <sup>63</sup> Akasabha ekigiro kyo okukaamira, akakaama, “Eriina ryaaye niwe Yohana.” Boosigo bhakaruguura!

<sup>64</sup> Kyaamwe, omunywa gwaaye gukiigurwa, kweeki akataanga kugaamba, akamukumya Taatabhugya. <sup>65</sup> Abhanyaroobho bhoosi, bhakahaha, eng'ana yiyo ekanyaragana bhukong'u, mbaara zoosi ze ebhiguru bhya Yudea. <sup>66</sup> Kwo okubha bhoosi bhakabha bhiigwiiri obhunagya bhwo Omukuru bhwaari hamwe neewe, bhakabha bhakiibhuurya, “Omwaana wuyo arabha muutuki?”

### Omweembo rwa Zakaria

<sup>67</sup> Zakaria, wiise wo omwaana wuyo, akiizuribhwa ne Ekoru Muhoreeru, akagaamba obhurooti kubha,

<sup>68</sup> “Akumibhwe Taatabhugya Omukuru wa Abhiiziraeri, kwo okubha yiiziri kututuurya etwe abhaatu bhaaye.

<sup>69</sup> Taatabhugya atureeteeri omutuurya weetu wa amanaga, omwiibhurwa we ekisyooko kya Daudi, omuhokya waaye,

<sup>70</sup> kyeego yaragiri ekare hayo kubharooti bha Taatabhugya.

<sup>71</sup> Akaraga kututuurya kubhabhisa bheetu,

na mumabhoko ga bhoosi bhano bhatatuseegiri.

<sup>72</sup> Akabhuga kubha, arabha arabhasakirya bhazaazi bheetu,

arahiite eriiragano riry a eriuhoreeru.\*

<sup>73</sup>Eriiragano riy niry akakora na zaazi weetu Aburhamu.

<sup>74</sup>Tutuuriibhwe kurwa mumabhoko ga abhabhisa bheetu, keembo tumwiisasaame ibhaga ryoosi,

tutaaza kubha ne ehaha,

<sup>75</sup>tubhe bhahoreeru na abhaheene embere waaye, kuziisiku zeetu zoosi.

<sup>76</sup>Awe omwaana waane,

orabhirikirwa omurooti wo Omukuru wi iguru wa bhyoosi.

Orakaangata embere wa Krisito,\*

abhone omweererye abhaatu kuzinzira zino araahitire.

<sup>77</sup>Obhabhuurire abhaatu bhaaye kubha,

bharatuuribhwa kwo okwaabhirwa kwe ebhibhi bhyaabhu,

<sup>78</sup>kwo omureembe mwaaru no obhunyoohu bhwa Taatabhugya weetu.

No obhutuuribhwa bhuyo

bhukatuhwaarukira kyo obhweero kurwa iguru.

<sup>79</sup>Na bhukabhabharira bhoosi bha mukiirima

ne enyaako ekuru yo okurora oruku runo rwaari kuuza.

Buratukaangata tee,

tubhe turahita munzira yo omureembe.”

<sup>80</sup>Yohana akakura, akakong’ a ne ekoro yaaye, akagya kwiikara mwiitirigo tee, hano eriibhaga ryahikiri akarweera mu Bhaiziraeri.

### Okwiibhurwa kwa Yeesu

(Mataayo 1:18-25)

**2**<sup>1</sup>Kuziisiku ziy Kaisari Augusto yaari omutemi omukuru wa Rooma, akabhaswaagya abhaatu bhoosi bha mubhyaaro bhyo obhukaangati bhwaaye, bhagye bhakaamwe. <sup>2</sup>Okukaamwa kuyo kwaari kwo okutaanga, kwiibhaga rino Kurenio yaari omwaanaangwa wa Siria. <sup>3</sup>Kweego, abhaatu bhoosi bhakagya okukaamwa, kira omuutu agye mumugye gwe ekisyooko kyaaye. <sup>4</sup>Yusufu wuno, kwo okubha yaari wa mukisyooko kya Daudi, akarwa mumugye gwa Nazareeti, mukyaaro kya Gariraaya, akatiira kugya Yudea mumugye gwa Beterehemu, kwo okubha Beterehemu nigwe gwaari omugye gwa Daudi. <sup>5</sup>Yusufu akagya kukaamwa hamwe na Mariamu, omuyuungibhwa waaye. Kwiibhaga riy Mariamu yariinda. <sup>6</sup>Hano bhaari bhakyaari eyo, eriibhaga ryo okwiibhura kwa Mariamu rikahika, <sup>7</sup>akiibhura omwaana waaye omutaangi we ekisubhe amwiibhuriri munyuumba ye emitugo. Akamwiibhisya emyeenda gye ekibhataare, akamuhiindirya muryaato. Akamwiibhurira muyo kwo okubha bhataabhweeni ekyuumba muziinyuumba zya abhagini.

### Abhariisya bharahwaarukirwa na maraika

<sup>8</sup>Mubhutiku bhuyo abhariisya bhahaariibha emitugo gyaabhu mwiitirigo. <sup>9</sup>Kyaamwe, bhakahwaarukirwa na maraika wumwe wo Omukuru hwaa! No obhweero bhwo Omukuru bhukabhabharira mbaara zoosi, bhakagwaatwa no obhwoobha bhwaaru. <sup>10</sup>Kyaamwe, maraika wuyo akabhabhuurira, “Mutoobhoha! Nirabhazweenia amang’ana amazomu, gano garaabhazomere abhaatu bhoosi.

\* 1:72 *Horeeru* ni ekigiro kino kitana bhubhi bhuyo bhwoosi. Rora Amakeerenio ga Amang’ana Amakong’u kubhuteero bhwe ekitabhu kino.

\* 1:76 *Krisito* ni omusorwa wa Emuungu (Masiya). Abhayahudi bhaari bharamuganya Krisito kuuza kubhatuurya. Rora Amakeerenio ga Amang’ana Amakong’u kubhuteero bhwe ekitabhu kino.

<sup>11</sup> Kwo okubha, reero yino mumugye gwa Daudi, omutuurya yibhwirwe kwiiguru yeenyu. Na omutuurya wuyo niwe Omukuru, niwe Yeesu weetu. <sup>12</sup> Ne ekyerekyereryo kyo okubheerekyo gayo, nikyo kiyo, murabhona omwaana omurere ahiindiriibhwe mubhwaato, akuundiikiiribhwe ne emyeenda gye ekibhataare.”

<sup>13</sup> Kyaamwe, maraika wuyo, akabhahwaarukira ne ebhikwe kwe ebhikwe bhya bhamaraika abharikeyaaye kurwa mwiisaaro, bhakabha bharamukumya Taatabhugya,

<sup>14</sup> “Taatabhugya wa mwiisaaro aguungibhwe!

Na mukyaaro,

omureembe gubhe kubhaatu bhano aseegiri.”

<sup>15</sup> Bamarika bhayo, hano bhaakyooriri mwiisaaro, abhariisa bhakabhuga, “Tugeende Beterehemu, turore gayo kyeego Omukuru atubhuuriiri.”

<sup>16</sup> Hano bhagiiri, bhakabhona Mariamu na Yusufu, bhakarora omwaana omurere ahiindiriibhwe mubhwaato. <sup>17</sup> Na abhariisa hano bhamuruuzi, bhakazwenia abhaatu amang’ana gayo goosi, maraika yabhabhuuriiri iguru waaye.

<sup>18</sup> Na bhoosi bhano bhiigwiiri gayo bhakaruguura bhukong’u iguru ya amang’ana gayo bhabhuuriirwe na abhariisa. <sup>19</sup> Kyaamwe, Mariamu akabhiika gayo goosi mukoro yaaye akabha ariiseega. <sup>20</sup> Hano abhariisa bhakakyoora, bhakamukumya Taatabhugya no okumuguungya, bhiigwiiri no okurora kugano gatuukiri, kyeego bhabhuuriirwe na maraika.

### **Omwaana arahirwa embere wa Taatabhugya**

<sup>21</sup> Omwaana wuyo, hano yahikiri orusiku rwa kanaane bhakamusaara, bhakamutoga Yeesu, niryo eriina rino yaheerwe na maraika, eriibhaga rino ya kyaari kugega enda.

<sup>22</sup> Kyeego geendirwe kumigiro gya Musa, Yusufu na Mariamu bhakamara eziisiku zyaabhu zo okumweswa. Bakamuhira Yeesu Yerusaremu, abhe musorwa embere wo Omukuru. <sup>23</sup> Bakakora ego kwo okubha, ekaamirwe mumigiro gyo Omukuru girabhuga kubha, “Omwaana we embere we ekisubhe, abhe omusorwa embere wo Omukuru.”\* <sup>24</sup> Kweeki bhakeenda kuruusya ekimweeso, kirya kigaambirwe ne emigiro gyo Omukuru, “Muruusye ekimweeso kye ebhiguuti bhibhiri, hamwe amaana abhiri ge ebhiguuti.”\*

<sup>25</sup> Yerusaremu eyo, ahaabhaho omuutu wumwe, eriina ryaaye ni Simioni. Simioni wuyo, yaari omuheene embere ya Taatabhugya, na yaari aramwiigwa no okuganya kurora, okutuuriibhwa kwa Abhiiziraeri. Ne Ekoru Muhoreeru ari hamwe neewe. <sup>26</sup> Ne Ekoru Muhoreeru yaari amariri kumubhuurira kubha, atakukwa tee amurore Krisito wo Omukuru. <sup>27</sup> Simioni woosi, Ekoru Muhoreeru akamukaangatya asikire mwiiseengerero rye Emuungu. Na abhiibhuri bha Yeesu bhakamureeta muyo, bhakamukore kyeego emigiro gyaatumenie. <sup>28</sup> Kyaamwe Simioni akamuturuung’ana Yeesu, no okumukumya Taatabhugya. <sup>29</sup> Akabhuga, “Weyaa Omukuru Taatabhugya okoriri kyeego waandagiri,

bhoono waanganihatiiri omubhagati waazo,  
nikwe mumureembe,

<sup>30</sup> kwo okubha niruziiri kumeeso gaani  
obhutuurya bhuno otureeteeri.

<sup>31</sup> Bhukorirwe no okurorekana  
embere ya abhaatu bhoosi.

\* 2:23 Kutoka 13:2, 12

\* 2:24 Abharaawi 12:8

<sup>32</sup> Obhutuurya bhuyo bhurabha obhweero bhwo okweerekeerya enzira, kubhaatu bhano bhatari Abhayahudi, no obhuguungibhwa kubhaatu bhaazo Abhiiziraeri.”

<sup>33</sup> Amang’ana gano Simioni yahayiri iguru yo omwaana wuyo, gakaruguurya wiise na nina. <sup>34</sup> Simioni akabhatweera ebhite, akabhuurira Mariamu, “Rora! Omwaana wuno yitoorirwe kubha, arabhasikya Abhiiziraeri bhaaru no okubhatuurya Abhiiziraeri abhaandi bhaaru. Na arabha ekyeerekenio kyo obhuhoru kino kiraangwe na abhaatu. <sup>35</sup> Tee abhaatu bhano bhaari kumwaanga, gano gaari kubhiswa muziikoro zyaabhu geerekenibhwe kubha mwaasi. Naawe mukoro yaazo, oranyaharwa kyeego osomirwe no omuhyo.”

<sup>36</sup> Ahaabhaho omurooti wumwe, mukiikuru bhukong’u, eriina ryaaye niwe Ana, muukya wa Fanueri, we ekisyooko kya Asheeri. Ana wuyo, akiikara emyaaka muhuungati egyeene no omusubhe waaye, kyaamwe omusubhe waaye akakwa.

<sup>37</sup> Na akasaga mutuumba tee akahikya emyaaka emiroongo enaane ne ene. Akabha arahooyera mwiiseengerero muyo muyo, akabha aramusabha obhutiku no omwiisi, na hano yaakusabha kwiibhaga eriindi ahaatika kurya ebhyaakurya.

<sup>38</sup> Kwiibhaga riyo riyo hano bhaari bhamureetiri Yeesu mwiiseengerero, Ana woosi akahita embere, akataanga kumukumya Taatabhugya, akagaamba eng’ana iguru yo omwaana wuyo, ku bhaatu bhoosi bhano bhaari kwiigoomba kubha, Taatabhugya aratuurya Yerusaremu.

<sup>39</sup> Hano Yusufu na Mariamu bhaamariri kukora goosi ge emigiro gyo Omukuru, kyeego gyeendirwe, bhakakyoora mumugye gwaabhu gwa Nazareeti, mukyaaro kya Gariraaya. <sup>40</sup> Omwaana akatweerwa ebhite na Taatabhugya, akakura, akabha na amanaga no okwiizuribhwa amang’eeni.

### Yeesu mwiiseengerero rye Emuungu

<sup>41</sup> Kumyaaka gyoosi, abhiibhuri bha Yeesu bhahaatiira kugya Yerusaremu, kwo okuhiita enyaangi yaabhu. <sup>42</sup> Hano Yeesu yahikirye emyaaka ikumi ne ebhiri, bhakahirana kunyaangi kyeego enyaangi yaabhu yaari kukorwa. <sup>43</sup> Hano enyaangi yahwiiri abhiibhuri bha Yeesu bhakataanga orugeendo rwo okukyooro yiika, neewe akasaga inyuma. Abhiibhuri bhataari bhamenyiri abhe asagiri inyuma, <sup>44</sup> bhaari bhakiiseega kubha ari hamwe na abharikyaabhu murugeendo. Eryoobha rimwe hano bhahoyeeri kunzira, bhakataanga kumukumya mubhahiiri na abhasaani bhaabhu. <sup>45</sup> Hano yabhabhuririku, bhakakyoora kumumoohya Yerusaremu.

<sup>46</sup> Orusiku rwa katatu, bhakamubhona mubhweema bhwe enyuumba ya Taatabhugya, yiikeeri gatigati ya abheegya bhe emigiro,\* yaari arabhiiteegerera no okubhuurya ebhisigo. <sup>47</sup> Abhaatu bhoosi bhano bhaari bhiigwiiri kyeego yaari kugaamba, bhakaruguura bhukong’u iguru ya amang’eeni gaaye, na iguru ya amakyooro gaaye.

<sup>48</sup> Abhiibhuri bhaaye bhayo, hano bhamuruuzi, bhakaruguura bhukong’u. Nina akamubhuurira, “Awe omwaana waane, kwaki otukoreeri ego? Twoosi twaari twoobhohiri, turakumoohya bhukong’u!”

<sup>49</sup> Akamukyoora, “Kwaki mwaari muranimoohya? Mutaamenyiri kubha nireenderwa nibhe munyuumba ya Taata waane?” <sup>50</sup> Nawe abhiibhuri bhaaye bhataamenyiri rikyooro rya Yeesu riyo.

<sup>51</sup> Kyaamwe, akagya hamwe nabho mumugye gwaabhu gwa Nazareeti, akabha arabhiigwa. Nina akagatuura amang’ana gayo goosi mukoro yaaye. <sup>52</sup> Yeesu

\* **2:46 Abheegya bhe emigiro** ni abhaatu bhano bhaari kweegya emigiro gya Musa ku Bayahudi. Rora Amakeerenio ga Amang’ana Amakong’u kubhuteero bhwe ekitabhu kino.



akabha arakiina no okwoongera amang’eeni, aramuzomera Taatabhugya na abhaatu.

### Ameegyo ga Yohana Omubatiizi

(Mataayo 3:1-12; Mariko 1:1-8; Yohana 1:19-28)

**3**<sup>1</sup> Ehaabha omwaaka gwi ikumi ne etaano gwa mubhukaangati bhwo omutemi omukuru Tiberio, no omwaanaangwa we ekyaaro kya Yudea ahaabha Pontio Pirato. No omukaangati we ekyaaro ya Gariraaya ahaabha Herode, no omukaangati we ebhyaaro za Iturea na Tarakoniti ahaabha Firipo, wamwaabhu Herode. No omukaangati we ekyaaro ya Abirene ahaabha Risania.  
<sup>2</sup> Na abhaseengeri abhakuru nibho bhahaabha Anasi hamwe na Kayafa.

Kwe eriibhaga riyo, Yohana omwaana wa Zakaria wuyo, ahaabha mwitiirigo, na hano yaari eyo akahaabhwa eng’ana ne Emuungu. <sup>3</sup> Yohana, yaari aragya kuhitira ekyaaro kyoosi kino kibhateeni ne ekitaaro kya Yorodaani, eno ararwaazira eng’ana yiyo. Yaari arabhabhuurira abhaatu kubha, “Mute ebhibhi bhyeenyu bhyoosi, na mubhuranibhwe, niho Taatabhugya abhaabhire.” <sup>4</sup> Niigo amang’ana gayo ga Yohana gabheeri kyeego gakaamirwe mukitabhu no omurooti Isaya:

“Mwiitegeerere, eriiraka ikuru ryo omuutu wuno akubhirikira kurwa mwitiirigo:

‘Mumukorere Omukuru enzira,  
Mugororere kira ahagiho hano akuhita.

<sup>5</sup> Muriinde kira eriiruuma,  
na muroosye kira ekiguru na akaguru.  
Mugorore eziinzira zo okwiikika,  
na munyoohye hoosi he ehuruuma ehisuuhu.

<sup>6</sup> Niho abhaatu bhoosi bharaarore obhutuurya bhuno bhukurwa ku Taatabhugya.”\*

<sup>7</sup> Abhaatu bhaaru bhaari bharamuuzaku Yohana, kubha abhabatiize. Kyaamwe, akabha arabhabhuurira, “Emwe orwiibhuro rwe enzoka! Weewi abhabhuuriiri kubha muranagya kuryaaza obhutemwa bhwe Emuungu bhuno bhukuuzza kwo okubatiizwa ego? <sup>8</sup> Mukore amang’ana gano, garerekye kubha mukata ebhibhi bhyeenyu! Na mutabha muriing’eena kweeki ene muriiseega, ‘Twoosi, Aburahamu niwe zaazi weetu.’ Nirabhabhuurira kubha, Emuungu aranagya kukora amagina gano gabhe abhaana bha Aburahamu! <sup>9</sup> Na bhoono obhuhaari bhwa Taatabhugya kweemwe ni kye ehaazi yino etuurirwe haguhi no omuti, ebheeri yo okugutina. No omuti gwogwoosi, guno gutakuruusya emisumo emizomu, guratinwa na gurekeerwe mumuriro!”

<sup>10</sup> Niho eriihazira rya abhaatu bhano bhaabharimu, bhakamubhuurya Yohana, “Bhoono! Tukoreki?” <sup>11</sup> Akabhakyoora, “Kira wuno ane emyeenda ebhiri, aruusye ogumwe kuwurya ataanagwe. Na kira wuno ane ebhyaakurya, ewe woosi asoondere wuno atanabho.”

<sup>12</sup> Kwiihizo riyo bhaari bhariho na abhatobhya bhe eriigooti,\* neebho bhakamuuzaku Yohana, okubha abhabhuuranie. Bhakamubhuurya, “Ee Omweegya, na neetwe tukoreki?”

<sup>13</sup> Akabhakyoora kubha, “Muraatobhe eriigooti, mutatobha ikuru kukira ekireengero kino kiterweho.”

\* 3:6 Isaya 40:3-5

\* 3:12 *Abhatobhya bhe eriigooti* ni orugaanda rwa abhaatu bhano bhaari kukumania eziimbirya musirikare ya Rooma. Rora Amakeerenio ga Amang’ana Amakong’u kubhuteero bhwe ekitabhu kino.

<sup>14</sup> Neebho bhaari bhariho abhasirikare, bhakamubhuurya, “Neetwe tukoreki?”

Akabhakyooru kubha, “Mutaaza kuruusya omuutu ebhigiro bhyaaye, na mutaaza kumubheheera! Na kweeki mwiswe na amariho gano mukuhaabhwa.”

<sup>15</sup> Abhaatu bhoosi, bhaari bhariibhuurya no okwiiseega muziikoro zaabhu kubha, hamwe Yohana araabhe niwe Krisito. <sup>16</sup> Yohana akabhabhuurira bhoosi igo, “Enye, nirabhabhuurania kwa amaanzi ageene. Nawe araaza omuutu wuno araankire amanaga, nitaang’ariiri naabhe kubha omubhagati waaye, wo okumutazurira eziisiri ze ebhikweera bhyaaye! Ewe, niwe araabhabhuuranie kwe Ekoru Muhoreeru na kwo omuriro. <sup>17</sup> Ewe arasora abhaatu kyo omuutu wuno akugwaata oruhuungo mukubhoko, aseese engano. Engano yiyo, araikumanirya mukitara kyaaye, nawe omukuunyu, aragurekera mumuriro, na gutaarime kweeki!”

<sup>18</sup> Kwa amang’ana gayo goosi na agaandi, Yohana yaari arabhirihya no okukumiirirya abhaatu bhayo, kwo okubharwaazira amang’ana amazomu ga Taatabhugya.

<sup>19</sup> Nawe Yohana akamuharira Herode, kwo okubha Herode akamusikirya Herodia no okumukora mukaaye, nawe Herodia wuyo yaari akweerirwe no omuhiiri waaye. \* Yohana akamurekya kung’ana yiyo, na kwe ebhibhi ebhiindi bhyoosi bhino yaari arakora. <sup>20</sup> Niho, Herode akaaruhya ebhibhi bhyaaye kweeki, kwo okumubhoha Yohana munyuumba ya abhabhohwa.

### Okubhuuranibhwa kwa Yeesu

*(Mataayo 3:13-17; Mariko 1:9-11)*

<sup>21</sup> Hano Yohana ya akyaari kubhohwa, abhaatu bhaaru bhaari bharabhuuranibhwa, Yeesu woosi akaaza kubhuuranibhwa. Eriibhaga yaari kusabha, <sup>22</sup> erisaaro rikiiguka, ne Ekoru Muhoreeru akamwiikira iguru yaaye kye ekiguuti. Mwiisaaro muyo rikarweeramu eriiraka, rirabhuga, “Awe, nawe Omwaana waane omuseegwa! Nzomeerwe naawe!”

### Ehamati ya Yeesu Krisito

*(Mataayo 1:1-17)*

<sup>23</sup> Eriibhaga rya Yeesu okataanga emirimo gyaaye, ahaabha ne emyaaka miroongo etatu. Abhaatu bhahiiseega kubha, ahaabha omwaana wa Yusufu.

<sup>24</sup> Na Yusufu wuyo, yaari omwaana wa Heri,

na Heri, yaari omwaana wa Matati,

na Matati, yaari omwaana wa Raawi,

na Raawi, yaari omwaana wa Meriki,

na Meriki, yaari omwaana wa Yanai,

na Yanai, yaari omwaana wa Yusufu,

<sup>25</sup> na Yusufu, yaari omwaana wa Matatia,

na Matatia, yaari omwaana wa Amosi,

na Amosi, yaari omwaana wa Nahumu,

na Nahumu, yaari omwaana wa Esiri,

na Esiri, yaari omwaana wa Nagai,

<sup>26</sup> na Nagai, yaari omwaana wa Mati,

na Mati, yaari omwaana wa Matatia,

na Matatia, yaari omwaana wa Semei,

na Semei, yaari omwaana wa Yoseki,

na Yoseki, yaari omwaana wa Yoda,

---

\* 3:19 Herodia yaari omukari wa Firipo, wamwaabhu Herode.

<sup>27</sup> na Yoda, yaari omwaana wa Yoana,  
 na Yoana, yaari omwaana wa Resa,  
 na Resa, yaari omwaana wa Zerubabeeri,  
 na Zerubabeeri, yaari omwaana Shearitieri,  
 na Shearitieri, yaari omwaana wa Neri,  
<sup>28</sup> na Neri, yaari omwaana wa Meriki,  
 na Meriki, yaari omwaana wa Adi,  
 na Adi, yaari omwaana Kosaamu,  
 na Kosaamu, yaari omwaana wa Erimadamu,  
 na Erimadamu, yaari omwaana wa Eri,  
<sup>29</sup> na Eri, yaari omwaana wa Yoshua,  
 na Yoshua, yaari omwaana wa Eriezeri,  
 na Eriezeri, yaari omwaana wa Yorimu,  
 na Yorimu, yaari omwaana wa Matati,  
 na Matati, yaari omwaana wa Raawi,  
<sup>30</sup> na Raawi, yaari omwaana wa Simioni,  
 na Simioni, yaari omwaana wa Yuuda,  
 na Yuuda, yaari omwaana wa Yusufu,  
 na Yusufu, yaari omwaana wa Yonamu,  
 na Yonamu, yaari omwaana wa Eriakimu,  
<sup>31</sup> na Eriakimu, yaari omwaana wa Merea,  
 na Merea, yaari omwaana wa Mena,  
 na Mena, yaari omwaana wa Matata,  
 na Matata, yaari omwaana wa Natani,  
 na Natani, yaari omwaana wa Daudi,  
<sup>32</sup> na Daudi, yaari omwaana wa Yeese,  
 na Yeese, yaari omwaana wa Obeedi,  
 na Obeedi, yaari omwaana wa Boazi,  
 na Boazi, yaari omwaana wa Sarimooni,  
 na Sarimooni, yaari omwaana wa Nasoni,  
<sup>33</sup> na Nasoni, yaari omwaana wa Aminadabu,  
 na Aminadabu, yaari omwaana wa Adimini,  
 na Adimini, yaari omwaana wa Arini,  
 na Arini, yaari omwaana wa Hezirooni,  
 na Hezirooni, yaari omwaana wa Pereesi,  
 na Pereesi, yaari omwaana wa Yuuda,  
<sup>34</sup> na Yuuda, yaari omwaana wa Yaakobo,  
 na Yaakobo, yaari omwaana wa Isaaka,  
 na Isaaka, yaari omwaana wa Aburahamu,  
 na Aburahamu, yaari omwaana wa Teera,  
 na Teera, yaari omwaana wa Nahoori,  
<sup>35</sup> na Nahoori, yaari omwaana wa Serugi,  
 na Serugi, yaari omwaana wa Reu,  
 na Reu, yaari omwaana wa Peregi,  
 na Peregi, yaari omwaana wa Ebheri,  
 na Ebheri, yaari omwaana wa Sheera,  
<sup>36</sup> na Sheera, yaari omwaana wa Kenaani,  
 na Kenaani, yaari omwaana wa Arifakisadi,  
 na Arifakisadi, yaari omwaana wa Shemu,  
 na Shemu, yaari omwaana wa Nuhu,  
 na Nuhu, yaari omwaana wa Rameki,

<sup>37</sup> na Rameki, yaari omwaana wa Metuseera,  
na Metuseera, yaari omwaana wa Enoki,  
na Enoki, yaari omwaana wa Yareedi,  
na Yareedi, yaari omwaana wa Maharareri,  
na Maharareri, yaari omwaana wa Kenaani,  
<sup>38</sup> na Kenaani, yaari omwaana wa Enoshi,  
na Enoshi, yaari omwaana wa Seeti,  
na Seeti, yaari omwaana wa Adaamu,  
na Adaamu, yaari omwaana we Emuungu.

### Yeesu arasakibhwa na Seetaani

*(Mataayo 4:1-11; Mariko 1:12-13)*

**4**<sup>1</sup> Yeesu akarwa orubhaara rwe ekitaaro kya Yorodaani, akabha yiizuriibhwe ne Ekoru Muhoreeru, ne Ekoru ekabha eramukaangatya mwiitirigo. <sup>2</sup> Akamara eziisiku miroongo ene, na kwe eriihbaga riyo, atariri ekigiro kyokyoosi, na Seetaani ahaaza kumusakya. Na kubhuteero enzara ekabha eramuruma bhukong’u.

<sup>3</sup> Niho Seetaani akamubhuurira, “Abhe heene awe ni Omwaana wa Taatabhugya, obhuurire eriigina rino, riikyoore kubha omukaate.”

<sup>4</sup> Yeesu akamukyoora, “Zeyi! Ekaamirwe mu Makaamo Amahoreeru, ‘Ti ebhyaakurya ebhyeene, bhino bhiramukore omuutu abhe no obhuhoru.’”

<sup>5</sup> Niho kweeki, Seetaani akamuhira Yeesu ahagiro hano haari iguru bhukong’u, rugeendo rumwe ego akamweerekye obhutemi bhwe ebhyaaro bhyoosi.

<sup>6</sup> Akamubhuurira, “Nirakuha obhukaangati bhwoosi bhuno, hamwe no obhuniibhi bhwamu, kwo okubha goosi gano, neenye nikahaabhwa, na niratura kuha omuutu wowoosi, wuno nikweenda. <sup>7</sup> Kweego, oraantemere ebhiru no okuniseengera, nirakuha bhyoosi bhiyo bhibhe ebhyaazo.”

<sup>8</sup> Yeesu akamukyoora, “Zeyi! Ekaamirwe, ‘Omuseengere no okumubhagatira Taatabhugya Omukuru waazo omweene ego.’”

<sup>9</sup> Niho kweeki, Seetaani akamuhira Yeesu Yerusaremu, akamwiimeererya iguru ye ekiisoonge, kye enyuumba ya Taatabhugya, akamubhuurira, “Abhe heene awe ni Omwaana wa Taatabhugya, irekera haasi, <sup>10</sup> kwo okubha ekaamirwe, ‘Taatabhugya aratuma bhamaraika bhaaye, bhakurinde.

<sup>11</sup> Bharakugwaata mumabhoko no okununga amaguru gaazo, gataaza giiteme eriigina.’”

<sup>12</sup> Nawe Yeesu akamukyoora, “Ekaamirwe, ‘Otige okusakya obhunagya bhwa Taatabhugya Omukuru waazo.’”

<sup>13</sup> Hano Seetaani yaari amariri kumusakya Yeesu, akamutiga tee, abhone omweeya uguundi gwo okumusakya.

### Yeesu arataanga emirimo gyaaye Gariraaya

*(Mataayo 4:12-17; Mariko 1:14-15)*

<sup>14</sup> Kyaamwe Yeesu akakyoora Gariraaya, akabha yiizuriibhwe no obhunagya bhwe Ekoru Muhoreeru. Eng’ana iguru yaaye, ekanyaragana bhukong’u mukyaaro kiyo kyooosi. <sup>15</sup> Akagya areegya abhaatu, muziinyumba zaabhu ze esaango. Neebho bhoosi, bhakabha bharamukuma.

\* 4:4 Kumbukumbu la Torati 8:3

\* 4:8 Kumbukumbu la Torati 6:13

\* 4:11 Zaburi 91:11-12

\* 4:12 Kumbukumbu la Torati 6:16

## Yeesu araangwa Nazareeti

(Mataayo 13:53-58; Mariko 6:1-6)

<sup>16</sup> Orusiku rumwe, akakyoora yiika Nazareeti, omugye guno yarereerwe. No orusiku rwo okumuunya, akasikira munyuumba ye esaango,\* kyeego yaanariri, akiimeerera okusoma Eng'ana ya Taatabhugya. <sup>17</sup> Akahaabhwa ekitabhu kino kikaamirwe no omurooti Isaya, akakikundukura kumoohya ahagiho hano hakaamirwe, niigo yahabweeni, akasoma,

<sup>18</sup> “Ekoro ya Taatabhugya, eri hamwe neenye,  
kwo okubha, anisoriri  
kubharwaazira abhataka amang'ana amazomu.  
Anitumiri nibhazweenie abhabhohwa,  
kubha bhariigurirwa,  
na abhahoku,  
kubha bhariigurirwa ameeso,  
na bhano bhakunyaakibhwa,  
kubha nirabhatuurya.

<sup>19</sup> Kweeki anitumiri nibharaarike abhaatu,  
kubha bhoono Taatabhugya areerekya omureembe gwaaye.”\*

<sup>20</sup> Niigo Yeesu yamariri okusoma amang'ana gayo, akakundikirya ekitabhu, akamuha omuhokya, akiikara ataange okweegya. Na abhaatu bhano bhoosi bhaari munyuumba ye esaango, bhakamutaangarira mumeeso. <sup>21</sup> Akataanga okubhabhuurira, “Reero yino, muriigwa kwa amatwi geenyu, kyeego Amakaamo Amahoreeru gabheeri embere yeetu.”

<sup>22</sup> Abhaatu bhoosi bhaari bharamugaamba kisi. Nawe bhaari bhararuguura amang'ana gaaye iguru yo omureembe gwa Taatabhugya, na bhakataanga kwiikeerenerya, “Awe, wuno nawe! Tiwe omwaana wa Yusufu?”

<sup>23</sup> Yeesu akabhabhuurira, “Nawe nitakubha ne ehaha, muraanikyoore ekireengyo kino, ‘Awe omugabhu wuno, wihorye omweene.’ Neemwe muragaamba, ‘Gano goosi twiigwiiri okoriri mumugye gwa Kaperinamu, ogakore na mumugye gwaazo hano!’” <sup>24</sup> Akeendera okugaamba, “Nirabhabhuurira obhuheene, omurooti atakwiikiriribhwa murubheri rwaaye.

<sup>25</sup> “Kwiibhaga rya Eriya, embura etatweekiri emyaaka etatu ne emyeeri esaasabha, enzara ekasikira ekyaaro kyoosi kya Iziraeri, na kwiibhaga riyo ekyaaro kyaari na abhatuumba bhaaru. <sup>26</sup> Hata ego, Eriya atatumirwe kuwumwe waabhu, nawe akatumwa kumutuumba wumwe wa Sarepta, mukyaaro kya Sidooni.

<sup>27</sup> “Na mukyaaro kya Iziraeri kwiibhaga ryo omurooti Erisha, bhaabharimu bhe ebhigeenge bhaaru. Hata ego, ataarimu wowoosi wuno akahorya, ni wumwe omweene yahorirye ewe ni Naamani wo okurwa mukyaaro kya Siria.”

<sup>28</sup> Abhaatu bhoosi, bhano bhabhiikumenie munyuumba ye esaango, hano bhakiigwa amang'ana gayo, bhakatiinda bhukong'u. <sup>29</sup> Niho bhakiimeerera bhwaangu. Bhakagya bharamuhuna, tee omuhiriingito omuhaari gwe ekiguru, kino omugye gwaari gwoombokirwe iguru yaku, kubha bhamurekere haasi.

<sup>30</sup> Nawe! Akahita gatigati ye eriihizo rya abhaatu, akagya zaaye.

\* **4:16 Enyuumba ye esaango** ni enyuumba yino Abhayahudi bhaari kusangira kurusiku rwo okumuunya. Rora Amakeerenio ga Amang'ana Amakong'u kubhuteero bhwe ekitabhu kino.

\* **4:19 Isaya 61:1-2**

## Yeesu araheebha amasaambwa amabhi kurwa kumuutu

(Mariko 1:21-28)

<sup>31</sup> Orusiku rumwe Yeesu akagya omugye gwa Kaperinamu, mukyaaro kya Gariraaya. orusiku rwo okumuunya,\* akasikira munyuumba ye esaango, na akataanga kweegya abhaatu. <sup>32</sup> Aamegyo gaaye, gakabharuguurya bhukong’u, kwo okubha gaari no obhunagya.

<sup>33</sup> Na munyuumba yiyo ye esaango, jaarimu omuutu wumwe wuno yatirirwe ne eriisaambwa eriibhi. Eriinani riyo, rikarira no okumwaaya, rirabhuga, <sup>34</sup> “Ah! Yeesu wa Nazareeti, otatunyaakya twoosi! Otwiiziiri otumareho? Nikumenyiri awe, kubha nawe wurya wurya, wuno okasorwa na Taatabhugya!”

<sup>35</sup> Yeesu akahiinya eriisaambwa riyo arabhuga, “Ribha omunwa gwaazo! Orwemu kumuutu wuno!” Niho ego eriisaambwa eriibhi riyo, rikamugwiisya omuutu wuyo haasi, embere ya abhaatu bhoosi. Niho rikarwamu ritaari kumunyahaara.

<sup>36</sup> Abhaatu bhoosi bhakaruguura bhukong’u, bhariibhuurya, “Amang’anaki gayo? Ndora omuutu wuno, niigo akugahama amasaambwa amabhi kwo obhunagya bhwaaye, kubha, garwe mubhaatu, kamwe ego gararwamu!”

<sup>37</sup> Kweego, amang’ana ge emirimo gya Yeesu, gakabha garanyaragana mukyaaro kyoosi.

## Yeesu arahorya abharweeri bhaaru

(Mataayo 8:14-17; Mariko 1:29-34)

<sup>38</sup> Hano Yeesu akarwa munyuumba yiyo ye esaango, akasikira munyuumba ya Simooni. Na munyuumba muyo jaarimu inyabhyaara Simooni ni murweeri we ehooma haari. Neebho, bhakamusabha Yeesu amuhorye. <sup>39</sup> Niho akiimeerera haguhi nawe, akahiinya ehooma yiyo, rugeendo rumwe ego ekasira. Omukari wurya akabhuuka, akataanga okubhaha ebhyaakurya.

<sup>40</sup> Na hano eryoobha ryaari riratuubhira, orusiku rwo okumuunya nkusira rwaari, abhanyarobho bhaaru bhakamureetera Yeesu abharweeri bhaabhu, bha amarweeri hagarihagari. Yeesu akabhatuurira kira owumwe, amabhoko gaaye, akabhahorya. <sup>41</sup> Hamwe na gayo, Yeesu akaheebha amasaambwa amabhi, mubhaatu bhaaru neego gakarira, “Awe ni Omwaana wa Taatabhugya!” Na kwo okubha amasaambwa amabhi gayo, gaari gamenyiri kubha Yeesu niwe Krisito, akagiirihya no okugaribhira, gatagaamba kweeki.

## Yeesu areegya abhaatu

(Mariko 1:35-39)

<sup>42</sup> Tabhoori yaho, hano kukakya, Yeesu akarwa hayo, akagya ahagiho hano hataari na abhaatu. Abhaatu, bhaari bharamumohya kira ahagiho, na hano bhakamurora, bhakeenda okumurekya kubha, atabhatiga. <sup>43</sup> Nawe, Yeesu akabhabhuurira, “Ereenderwa nigye mumigye egiindi gyoosi, nibhe nirabharwaazira amang’ana amazomu, go obhutemi bhwa Taatabhugya.\* Kwiiguru ya gayo nikyo kikagirya nikatumwa.” <sup>44</sup> Niho, Yeesu okuhitira ekyaaoro kya Yudea,\* ararwaazira abhaatu muziinyumba zaabhu ze esaango.

\* **4:31 orusiku rwo okumuunya** ni rusiku rwa Jumamosi runo Taatabhugya yamuunyiri hano yamariri okuteema ebhigiro bhyoosi. Rora Amakeerenio ga Amang’ana Amakong’u kubhuteero bhwe ekitabhu kino.

\* **4:43 Obhutemi bhwa Taatabhugya** ni ahagiho hayo hoosi hano Taatabhugya niwe omukaangati. Rora Amakeerenio ga Amang’ana Amakong’u kubhuteero bhwe ekitabhu kino.

\* **4:44 Yudea** Amakaamo agaandi ga Ekiyunaani gakaamirwe *Gariraaya*.

## Yeesu arataanga kutuura abheega bhaaye

(Mataayo 4:18-22; Mariko 1:16-20)

**5**<sup>1</sup> Orusiku rumwe, Yeesu ahaabha yiimeereeri embarika ye enyaanza ya Genezareti,\* yaari areegya abhaatu bhaaru eng'ana ye Emuungu. Neebho, bhakabha bharamwiirumbiririra kwo okumuhiga, keembo bhamwiitegeerere. <sup>2</sup>Na kubarika ye enyaanza hayo, Yeesu akarora amaato abhiri gaari imbarika hayo, hano abhategi bhabhakwoogya eziinzero zaabhu. <sup>3</sup>Akatiira mubhwaato obhumwe, bhuno bhwaari bhwa Simooni, akamusabha Simooni kubha, yisukye obhwaato hasuuu munyaanza. Niho, Yeesu akiikara muusi yeege abhaatu.

<sup>4</sup>Na hano akamara kubheegya, akabhuurira Simooni na abharikyaaye, “Mugeendye obhwaato, tugeende gati munyaanza, mwiikye eziinzero zeenyu, mutege eziiswe.”

<sup>5</sup>Simooni akamukyoora, “Ee taata weetu, obhutiku kukya twaari turakora emirimo, gyo okutega kwo omukya, ndora tutabhweeni ekigiro! Nawe, kwo okubha naawe omburirigo, niraziikya muusi bhoono.”

<sup>6</sup>Niho Simooni na abharikyaaye, bhakiikya eziinzero zaabhu mumaanzi. Hano bhakooririgo, bhakagwaatya eziiswe nzaru bhukong'u, tee eziinzero zaabhu zikataanga kuranduka. <sup>7</sup>Bakabhirikira abharikyaabhu, bhano bhaari mubhwaato obhuundi, kwo okubhasimya kwa mabhoko keembo bhiize okubhasakirya. Neebho, hano bhakaaza bhakiizurya amaato abhiri eziiswe, tee kukagirya amaato gakabha haguhi okutubhira.

<sup>8</sup>Simooni Petero, hano yaruuzi kyeego bhabhweeni eziiswe, akahigama embere ya Yeesu, akamubhuurira, “Ee Omukuru Yeesu, onitige enye, kwo okubha enye niwe ebhibhi!” <sup>9</sup>Simooni akabhuga amang'ana gayo, kwo okubha ewe hamwe na abharikyaaye bhoosi, bhakaruguura bhukong'u obhwaaru bhwe eziiswe zino bhategiri. <sup>10</sup>Bhaari bhariho abhamura bhabhiri bha Zebedaayo, Yaakobo na Yohana, bhaari bhatega hamwe na Simooni, neebho bhoosi, gayo gakabharuguurya.

Niho Yeesu akabhuga, “Awe Simooni, otoobhoha! Kweemera reero yino, orabha omutege wa abhaatu.” <sup>11</sup>Kweego Simooni na abharikyaaye, bhakakyoorya amaato kumwaambuko, bhakatiga ebhigiro bhyaabhu bhyoosi, bhakatuniirira Yeesu.

## Yeesu aramuhorya we ebhigeenge

(Mataayo 8:1-4; Mariko 1:40-45)

<sup>12</sup>Yeesu yaari mumugye ogumwe, niho akaaza omuutu wuno yaari mugeenge.\* Hano we ebhigeenge wuyo yamuruuzi Yeesu, akatema ebhiru embere waaye, akiihiinya tee akahikya obhusyo haasi, akamusabha, “Ee Omukuru, nimenyiri oranagya okunihorya okubha nieribhwe. Eraabhe oryeende, nirasabha onihorye!”

<sup>13</sup>Yeesu akagororokya okubhoko kwaaye, akamubhataku, akamubhuurira, “Nireenda, ohore weeribhwe!” Hayohayo, akahora obhurweeri bhwaaye.

<sup>14</sup>Kyaamwe, Yeesu akamubhuurira, “Itegeerera, otamubhuurira omuutu wowoosi iguru ya rino! Nawe wiyeerekye kumuseengeri, oruusye ekimweeso kyeego emigiro gya Musa gikuswaagya, okubha weerekye abhaatu kubha weeribhwe.”\*

\* 5:1 enyaanza ya Genezareti Eriina ryaaye eriindi ni enyaanza ya Gariraaya.

\* 5:12 Ku Bayahudi omuutu wuno yaari mugeenge yaari ikunene ataari okusaanga hamwe na abhaatu bhano bhataari ne ebhigeenge, naabhe okwiikara nabho hamwe muroobho yimwe. Kweeki wuno atana ebhigeenge niigo araamukuniekuru woosi arabha ikunene.

\* 5:14 Rora Abharaawi 14:1-32

<sup>15</sup> Nawe, amang'ana ga Yeesu, gakoongera okumenywa bhukong'u kubhaatu. Abhaatu bhaari bhahaamuuzaku amahizo kwa amahizo, korereki bhanagye kwiitegeerera ameeogyo gaaye, no okuhoribhwa amarweeri gaabhu. <sup>16</sup> Nawe, kirakeego, Yeesu yaari arabhatiga, aragya kusabha ahagiho hano hataari na abhaatu.

### Yeesu aramuhorya omurema

(Mataayo 9:1-8; Mariko 2:1-12)

<sup>17</sup> Orusiku rumwe, Yeesu yaari areegya abhaatu. Na gati yaabhu, bhabhiikeeri Abhafarisayo,\* hamwe na abheegya bhe emigiro. Bhayo, bhakarweera kira emigye gya Gariraaya na Yudea, na abhaandi bhakarweera Yerusaremu. Yeesu yaari na amanaga go okuhorya kurwa ku Taatabhugya, na yaari arahorya abhaatu.

<sup>18</sup> Niho, abhaatu bhakaaza, bhano bhaari bhagegiri omuutu wuno yaremeeri, eno ahiindiriri obhuriri bhwaaye. Bhakeenda kumusikirya munyuumba, na bhamuhiindiriyeye embere ya Yeesu. <sup>19</sup> Nawe etaaturikeeni, kwo okubha kwaari no omuhigano mwaaru gwa abhaatu. Niho bhakatiira obhutiiriro bhakahita kwiirongo rye enyuumba, eno bhagegiri omuutu wuyo. Hano bhaari kwiirongo, bhakahobhora omwoobho kwo okumamura ziimbegyo kuruusara,\* bhakamwiikya embere ya Yeesu, gati ya abhaatu bhoosi bhayo. <sup>20</sup> Hano, Yeesu akamenya obhwiikirirya bhwa abhaatu bhayo ne enzira yino bhakoriri, akamubhuurira, "Omusaani waane, ebhibhi bhyaazo, bhyaabhiirwe!"

<sup>21</sup> Abheegya bhe emigiro na Abhafarisayo bhayo, niigo bhakiigwa ego bhakataanga kuririira muziikoro, bharabhuga, "Wuno niwi? Ndora aragaamba amang'ana go okumwaanga Taatabhugya? Atariho wuno akunagya kwaabhira ebhibhi, ni Taatabhugya omweene ego!"

<sup>22</sup> Gano bhaari kwiiseega, Yeesu akagamenya, akabhabhuurira, "Kwaki muranianga muzikoro zyeenyu? <sup>23</sup> Ni rihe eriinyoohu bhukong'u?" Ni kubhuurira omuutu, 'Ebhibhi bhyaazo bhyaabhiirwe,' kisi ni okumubhuurira, 'Imeerera, ogeende?' Ni heene goosi gano gatakuturikana! <sup>24</sup> Nawe, nireenda mumenye bhwaheene kubha, enye Omwaana wo Omuutu\* nino obhunagya bhwo okwaabhira ebhibhi mukyaaro hano."

Niho Yeesu akamubhuurira omuutu wuyo, "Nirakubhuurira, imeerera! Gega obhuriri bhwaazo, ogeende yiika."

<sup>25</sup> Hayohayo, omuutu wuyo akiimeerera embere ya abhaatu bhayo, akagega obhuriri bhwaaye bhuno yaari ahiindiriri, akagya yiika, eno aramukumya Taatabhugya. <sup>26</sup> Abhaatu bhoosi, bhakaruguura bhukong'u no okugwaatwa no obhwoobha. Bhakabha bharamukumya Taatabhugya, niho bharabhuga, "Bamure! Reero, turuuzi amang'ana ge ekiriguuro!"

### Yeesu aramubhirikira Raawi, omutobhya we eriigooti, amutuniirire

(Mataayo 9:9-13; Mariko 2:13-17)

<sup>27</sup> Hano gayo gahwiiri, Yeesu akarwa munyuumba, akarora omutobhya we eriigooti wumwe, eriina ryaaye niwe Raawi. Na Raawi wuyo ahaabha yiikeeri mukihuuna kyaaye kyo okutinira eriigooti.

\* **5:17 Abhafarisayo** ni orugaanda rwa abhaatu bhano bhakubhoneka Iziraeri. Rora Amakeerenio ga Amang'ana Amakong'u kubhuteero bhwe ekitabhu kino.

\* **5:19 kuruusara** Abhayahudi abhaandi bhaari bharatuura no okuseretera eziimbegyo enyuumba zaabhu kwo okuhiindirya eziimbaawa iguru yaku.

\* **5:23 Kwiing'ana eriinyoohu**, oryeende kurimenya bhwaheene, rora Mariko 10:25, Ruuka 16:17.

\* **5:24 Omwaana wo Omuutu** ni riina eriindi rya Yeesu. Rora Danyeri 7:13 na Amakeerenio ga Amang'ana Amakong'u kubhuteero bhwe ekitabhu kino.



Yeesu akamubhuurira, “Ee Raawi! Ontuniirire!”<sup>28</sup> Niho Raawi akiimeerera, akatiga bhyoosi, akataanga kumutuniirira Yeesu.

<sup>29</sup> Niho, Raawi akamukorera Yeesu enyaangi ekuru yiika waaye. Munyuumba muyo, bhakiikumana abhatobhya bhe eriigooti bhaaru na abhaatu abhaandi, na bhahaabha bharyana hamwe mwiigari.<sup>30</sup> Ekagirya Abhafarisayo abhaandi, na abheegya bhaabhu bhe emigiro, bhakagya kwiiririirira abhaanabheega bha Yeesu, bharabhuga, “Ndora murarya no okunywa hamwe na abhatobhya bhe eriigooti, na abhaandi bhe ebhibhi?”

<sup>31</sup> Yeesu akabhakyoora, “Abhaatu abhahoru, bhatakweenda omureri, nawe abhaatu abharweeri nibho bhakumweenda!”<sup>32</sup> Kweego, enye neenye nitiiziri kubhabhirikira bhano bhakwiirira abhaheene embere ya Taatabhugya bhanituniirire, nawe, niiziri kubhabhirikira bhe ebhibhi kubha, bhate ebhibhi bhyaabhu.”

### Yeesu niwe obhutaangi bhwa amang’ana amahya

(Mataayo 9:14-17; Mariko 2:18-22)

<sup>33</sup> Abhafarisayo na abheegya bhe emigiro bhayo bhakamubhuurira Yeesu, “Eriibhaga ryaaru abhaanabheega bha Yohana bhariisiitya ebhyaakurya, kwo okumusabha Taatabhugya. Neebho abhaanabheega bha Abhafarisayo, nabho bhoosi bhakora egoego. Nawe ndora bho owaazo, bhatakwaanga ebhyaakurya, bhareenderera kurya no okunywa!”

<sup>34</sup> Yeesu akabhakyoora, “Hano omukweeri, akubha akyaari hamwe na abhagini bhaaye mubhuryaakari, muranagyaabhwu kubhakora abhagini bhayo, bhiisiitya okurya ebhyaakurya no okunywa?”<sup>35</sup> Nawe, eziisiku zino zikuuza, bharausibhwamu omukweeri wuyo. Muziisiku ziyo, nizo bhariisiitya ebhyaakurya.”

<sup>36</sup> Yeesu akabhabhuurira ekirengyo ekiindi, akabhuga, “Atariho omuutu wuno, araanagye kutina ekiraka kurwa kungibho ehya, no okukitumira kungibho ekuungu. Kwo okubha, arakore ego, arabha arandwiri engibho yaaye ehya. Hamwe na gayo, ekiraka kiyo kye engibho ehya, kitakwiigwaana ne engibho ekuungu.

<sup>37</sup> “Na atariho omuutu wuno, yakunagya kutuura amarwa amahya mukiko ekikuungu. Kwo okubha, arakore ego, amarwa amahya garaatya ekiko kiyo, na amarwa gariitika. Ekiko kiyo na marwa gaamu, bharasarika.”<sup>38</sup> Nawe, amarwa amahya, gareenderwa gaturwe mukiko ekihya!

<sup>39</sup> “No omuutu wuno anariri amarwa ge ekare, niwe atana enaamba na amarwa amahya. Arabhuga, ‘Ge ekare nigo amazomu.’”

### Yeesu niwe Omukuru wo orusiku rwo okumuunya

(Mataayo 12:1-14; Mariko 2:23–3:6)

**6**<sup>1</sup> Orusiku rumwe rwo okumuunya,\* Yeesu ahaabha arahita mumiguundu gye engano na abhaanabheega bhaaye, abhaanabheega bhakiigwa enzara, bhakataanga okubhuna ebhigara bhye engano, no okurya eziiheke zyaku.

<sup>2</sup> Niho Abhafarisayo abhaandi bhakabhabhuurya, “Ndora murakora gano gatakweenderwa kukorwa kurusiku rwo okumuunya!”

<sup>3</sup> Yeesu akabhakyoora, “Awe! Mutakasomiri mu Makaamo Amahoreeru kyeego Daudi na abharikyaaye bhaakoriri eriibhaga rino bhaari bhane enzara?”<sup>4</sup> Akasikira munyuumba ye Emuungu, akagega emikaate gino gyaatuurirwe embere we

\* 6:1 Orusiku rumwe rwo okumuunya ni orusiku rwo okuseengera rwa Abhayahudi, erwe ni Esabhaata.

Emuungu, akagirya! Na abhaandi bhoosi, bhano yaari nabho, akabhaha emikaate giyo. Nawe, ehaabha mugiro kubha, ni abhaseengeri abheene bhano bhaheerwe omweeya okurya emikaate gye etuubho yino.”\* <sup>5</sup> Yeesu akoongerereera kugaamba, “Nireenda mumenye bhwaheene kubha enye Omwaana wo Omuutu, niwe Omukuru wo orusiku rwo okumuunya.”

<sup>6</sup> Kurusiku oruundi rwo okumuunya, Yeesu akasikira munyuumba ye esaango, akataanga kweegya abhaatu. Musi muyo, yaarimu omuutu wumwe, wuno okubhoko kwaaye kwo obhuryo kwaari kuremeeri. <sup>7</sup> Abhafarisayo na abheegya bhe emigiro, bhaari bharaganya Yeesu, bharore kyeego araahorye omuutu wuyo kurusiku rwo okumuunya, kwo okubha bhaari bharamohya eringi’ana ryo okumuzoongera.

<sup>8</sup> Nawe, Yeesu akamenya amiiseego gaabhu. Kweego, akamubhuurira omuutu omurema wo okubhoko, “Nawuuzi, wimeerere gatigati hano.” Niho, omuutu wuyo akaaza, akiimeerera gatigati waabhu.

<sup>9</sup> Rumwe ego, Yeesu akabhabhuurira Abhafarisayo na abheegya bhe emigiro, “Nawe, nibhabhuurye amabhuuryo, orusiku rwo okumuunya, emigiro giratutuma kukoraki? Amazomu, kasi amabhi? Orusiku ruyo, tuhorye, kasi twiite?” <sup>10</sup> Yeesu akamumogorera kira omuutu mumeeso gaaye. Niho akamubhuurira omuutu wuyo, “Gorora okubhoko kwaazo.” Woosi, hano yakugorweeri ego, kukahora.

<sup>11</sup> Abhafarisayo bhayo, bhakabha no obhururu bhuhaari bhukong’u. Bhakataanga okuzuzuuma enzira yo okumukorera Yeesu amabhi.

### Yeesu arasora abheega ikumi na bhabhiri

(Mataayo 10:1-4; Mariko 3:13-19)

<sup>12</sup> Kuziisiku ziyo, Yeesu akagya kukiguru okumusabha Taatabhugya, akasabha obhutiku kukya. <sup>13</sup> Na hano kukakya, akabhabhirikira abhaanabheega bhaaye. Gati yaabhu akaahura ikumi na bhabhiri, akabhatoga eriina rya abheega.\* Na abheega bhayo, nibho bhano: <sup>14</sup> Simooni wuno Yeesu akamutoga eriina rya Petero, Andurea mura waabhu Simooni, Yaakobo, Yohana, Firipo, Baritoromayo, <sup>15</sup> Mataayo, Tomaso, Yaakobo omwaana wa Arifayo, Simooni wuno akubhirikirwa Omuzeroote,\* <sup>16</sup> Yuuda omwaana wa Yaakobo, na Yuuda Isikariyoti, wurya yaruusirye Yeesu kubhabhisa bhaaye.

### Yeesu areegya iguru yo orubhaango no okwiiriha

(Mataayo 4:23-5:12)

<sup>17</sup> Yeesu akiituuma kurwa kukiguru, hamwe na abheega bhaaye. Na hano akahika ahagiho ha mutandaari, akiimeerera. Hayo, bhakiikuma abhaanabheega bhaaye bhaaru, ne esaango ekuru bhukong’u rya abhaatu bhano bharwiiri mukyaaro kyoosi kya Yudea, kurwa mumugye gwa Yerusaremu, no okurwa ahagiho ho omwaambuko gwa Tiro na Sidooni.

<sup>18</sup> Abhaatu bhayo, bhakaaza kumwiitegeerera Yeesu no okuhoribhwa amarweeri gaabhu, na bhano bhaari kunyaakibhwa na amasaambwa amabhi, bharahoribhwa. <sup>19</sup> Abhaatu bhoosi, bhaari bharasakya okumugwaataku Yeesu, kwo okubha yaari ne eziinguru zo okuhorya, na akabahorya bhoosi.

<sup>20</sup> Yeesu akabhiisuunza abhaanabheega bhaaye bhayo, akabhabhuurira, “Hakiriku bhano bhakwiimemya kubha ni bhataka bhe eziikoro,

\* **6:4** Rora 1 Samueli 21:1-6.

\* **6:13 Abheega** ni orugaanda rwa abhaatu ikumi na bhabhiri bhano bhasorirwe na Yeesu. Rora Amakeerenio ga Amang’ana Amakong’u kubhuteero bhwe ekitabhu kino.

\* **6:15 Omuzeroote** ni omuutu wuno akwiitanira ekyaaoro kyaaye.

kwo okubha obhutemi bhwe Emuungu ni bhweenyu.

<sup>21</sup> Hakiriku emwe bhano mukwiigwa enzara bhoono,

kwo okubha muriigutibhwa.

Hakiriku emwe bhano mukurira bhoono,

kwo okubha muraaza kuseka.

<sup>22</sup> “Hakiriku emwe, hano abhaatu bharabhatiindire, kwo okubhatania, okubhatuka, no okubhagaambira amabhi, kwiiguru yo Omwaana wo Omuutu.

<sup>23</sup> “Kuziisiku ziyo, muzomererwe no okubhinabhina. Mumenye kimwe kubha murabha murabhiikirwa omubhano omukuru mwisaaro, kwo okubha na bhazaazi bhaabhu, niigo bhaari bharanyaakya abharooti.

<sup>24</sup> “Nawe, emwe ni abhaniibhi, mwiirihe,

kwo okubha obhurori bhweenyu, mubhubhweeni!

<sup>25</sup> Nawe, mwirihe bhano mukwiiguta bhoono,

kwo okubha eriibhaga rirahita muraaza kusingira.

Mwiirihe bhano mukuseka bhoono,

kwo okubha muraaza kurira no okuririira!

<sup>26</sup> Mwiirihe, hano abhaatu bhakubhakumya,

kwo okubha bhazaazi bhaabhu niigo ego bhaari kukorera abharooti bho orurimi.

### **Ameegyo iguru yo okuseega abhabhisa**

*(Mataayo 5:38-48; 7:12)*

<sup>27</sup> “Nirabhabhuurira emwe bhano mukunitegeerera, museege abhabhisa bheenyu. Abhaatu bhano bhakubharega, emwe mubhasakiryeye. <sup>28</sup> Na abhaatu bhano bhakubhihiima, emwe mubhatweere ebhite. Na abhaatu bhano bhakubhanyaakya bhukong’u, emwe mubhasabhire ku Taatabhugya.

<sup>29</sup> “Omuutu arakuteme etama yimwe kwo okukuzeera, omukyoserye ne eyiindi. No omuutu arakuruusye ekabhuuti yaazo, omutigire agege ne eriigooti.

<sup>30</sup> Wowoosi wuno arakusabhe ekigiro, omuhe. Na omuutu wuno aragege ebhigiro bhyaazo, otamusabha akukyoorerye. <sup>31</sup> Mukorere abhaandi kyeego mukweenda bhahakorere.

<sup>32</sup> “Hano muraasege bharya abheene bhakubhaseega emwe, ni heene mukoriri eng’ana enzomu yo okubhaguungya? Zeyi tiigo! Yiingabha na bhe ebhibhi bhahaseegiri abhaatu bhano bhakubhaseega! <sup>33</sup> Na hano mukusakirya bharya abheene bhakubhasakirya emwe, ni heene mukoriri eng’ana enzomu yo okubhaguungya? Zeyi tiigo! Yiingabha na bhe ebhibhi bhoosi, niigo ego bhakukora! <sup>34</sup> Na muraabhahe eziimbirya bharya abheene mukuganya kubha bharabhakyoorerya, ni heene mukoriri eng’ana enzomu yo okubhaguungya? Zeyi tiigo! Yiingabha na bhe ebhibhi bhoosi bharabhaha abharikyaabhu, kwo okubha bharabhaganya kukyooriribhwa bhyoosi!

<sup>35</sup> “Nawe emwe, museege abhabhisa bheenyu, mubhasakiryeye. Mubhahe eziimbirya na mutaaza kuganya kubha murakyooriribhwa. Kweego niigo muraabhone emibhano emikuru, no okubha abhaana bha Taatabhugya wi iguru wa bhyoosi, kwo okubha Taatabhugya arabhasakirya bhano bhatakubhuga ozomirye, na abhakori bhe ebhibhi. <sup>36</sup> Murorere ebhigoongi abhaandi, kyeego wuuso weenyu akubharorera ebhigoongi.

### **Ameegyo iguru ya kutania abhaandi**

*(Mataayo 7:1-5)*

<sup>37</sup> “Mutatinira abhaandi ebhiina, neemwe mwoosi mutakutinirwa ebhiina. Na mutagaamba kubha abhaandi bhatiniirwe, niho ne emwe mutakutinirwa kibhi.

Mubhaabhire abhaatu bhano bhambahabhiriye, niho na neemwe muraabhiirwe.

<sup>38</sup> Mubhahe abhaandi ebhigiro, niho na neemwe murahaabhwe. Ne ebhigiro bhino murahaabhwe, bhirabha kukireengero ekizomu bhukong’u. Ekireengero kirasiingisibhwa no okwiigatirwa, tee kiizure zabhi, no okwiitika. Kwo okubha, ekireengero kino mukureengera abhaandi, nikyo na neemwe muraarengerwe.”

<sup>39</sup> Yeesu akabhabhuurira ekireengyo kino, “Bhoono heene! Omuhoku aranagya kumukaangatya umuhoku omurikyaaye? Etariho haho, bhoosi bhabhiri bharatubhira mumwobho!

<sup>40</sup> “Omwaanamweega, atakunagya kubha omukaari kukira omweegya waaye. Nawe, hano akweegibhwa no okugagwaata goosi, niho araatuubhane no omweegya waaye.

<sup>41</sup> “Ndora oramogorera ekibhorooryo ekisuuhu kino kiri muriiso ryo omurikyaazo, nawe otakwiiseegera ekiti ekikuru kino kiri muriiso ryaazo?

<sup>42</sup> Na oranagyabhwi kumubhuurira omurikyaazo wuyo, ‘Awe omuhiiri waane, tiga nikuruusye ekibhorooryo ekisuuhu kino kiri muriiso ryaazo,’ eribhaga awe omweene otakurora ekiti ekikuru kino kiri muriiso ryaazo? Omuzoogenia awe! Otaange okuruusya ekiti kino kiri muriiso ryaazo, niho oraanagye okurora bhwaheene no okuruusya ekibhorooryo ekisuuhu muriiso ryo omurikyaazo.

### **Abhaatu bharamenyekana kuziteemwa zyaabhu**

*(Mataayo 7:16-20; 12:33-35)*

<sup>43</sup> “Gutariho omuti omuzomu, guno gukuruusya emisumo emibhi. Na gutariho omuti omubhi, guno gukuruusya emisumo emizomu. <sup>44</sup> Abhaatu bhatakugesa emisumo gye etiini naabhe emizabibu kumiti gye emireera. Na kira omuti gumenyekeni kumisumo gyaaye.

<sup>45</sup> “Niigo gaari, no omuutu omuzomu, amang’ana gaaye amazomu gariibhurwa na amiiseegi amazomu gano gari mukoro yaaye. Na niigo ego, omuutu omubhi, amang’ana gaaye amabhi gariibhurwa na amiiseegi amabhi gano gari mukoro yaaye. Kwo okubha amang’ana gano omuutu akugaamba, gararwa mumiiseegi gano giizwiiri mukoro yaaye.”

### **Okwoomboka kwiitare no okwoomboka kumarobha**

*(Mataayo 7:24-27)*

<sup>46</sup> “Kwaki murambirikira, ‘Ee Omukuru Yeesu! Ee Omukuru Yeesu,’ nawe amang’ana gano nikubhabhuurira, mutakugakora? <sup>47</sup> Wowoosi wuno akunizaku, kwo okwiitegerera amang’ana gaani no okugakora, nirabhakeerenerya kyeego araabhe kwe ekireengyo.

<sup>48</sup> “Atubheeni no omwoomboki we enyuumba wuno yatukiri haasi bhukong’u, tee akahikira eriiitara, akoomboka obhurusa iguru yaku. Na kwiibhaga rye embura, ekitaaro kizizura amaanzi no omusabhuko, gukatema enyuumba yiyo. Ne eyo, etiisingisiryeyo, kwo okubha yaari yoombokirwe bhwaheene.

<sup>49</sup> “Nawe, woyowosi wuno akwiitegerera amang’ana gaani no okutama okugakora, wuyo, atubheeni no omuutu wuno yombokiri enyuumba yaaye kumarobha ageene, gano gatana obhurusa. Na hano omwaanariro gwe ekitaaro gukaaza, amaanzi gakiitema enyuumba yiyo, rumwe ego ekagwa haasi, muu! Ekanyamuka yoosi.”

### **Obhwiikirirya bhwo omusirikare omukuru**

*(Mataayo 8:5-13)*

**7** <sup>1</sup> Hano Yeesu akamara okubhabhuurira esaango ya abhaatu, amang’ana gayo goosi, akagya akasikira mumugye gwa Kaperinamu. <sup>2</sup> Mumugye guyo yaari

arimu omukuru owumwe wa abhasirikare bhe Ekirooma. Omusirikare wuyo, yaari no omubhagati wuno yamuseegiri bhukong'u, nawe omubhagati wuyo yaari omurweeri wo okukwa.

<sup>3</sup> Kimwe, omusirikare wuyo, hano yiigwiiri eng'ana iguru ya Yeesu, akatuma abhakaruka abhaandi bha Abhayahudi ku Yeesu, bhamusabhe yiize okumuhorya omubhagati waaye. <sup>4</sup> Abhakaruka bhayo, hano bhakahika kuYeesu, bhakamwiisasaama bhukong'u bhakamubhuurira, "Omuntu wuno, areenderwa umukore eng'ana yino, <sup>5</sup> kwo okubha aseegiri abhaatu bha mukyaaro kyeetu. Na niwe atwoombokeeri enyuumba yeetu ye esaango."

<sup>6</sup> Niho Yeesu akagya hamwe na abhakaruka bhayo. Na hano bhaari bhagwiisukiiri omugye gwo omusirikare, omusirikare wuyo akatuma abhasaani bhaaye, bhakagya ne eng'ana ku Yeesu, bhakamubhuurira, "Awe Omukuru, otiinyaakya bhukong'u, kwo okubha etakweenderwa osikire munyuumba yaane. <sup>7</sup> Kweeki niruuzi kubha nitakweenderwa kuuza owaazo. Nirasabha ogaambe eng'ana, omubhagati waane arahora. <sup>8</sup> Nimenyiri arahora, kwo okubha enye niri iyaasi ya abhakuru bhaane, na ninabho abhasirikare iyaasi waane. Niraamubhuurire owumwe, 'Nogye,' aragya. Niraamubhuurire owuundi, 'Nawuuzi,' woosi araaza. No omubhagati waane, niraamubhuurire, 'Kora ego,' niigo arakore."

<sup>9</sup> Hano Yeesu yiigwiiri gayo, akamuruguura bhukong'u. Akiikibhukira esaango ya abhaatu bhano bhaari bharamutuniirira, akabhabhuurira, "Nirabhabhuurira, naabhe gati ya Abhiiziraeri bhoosi, nikiyaari kurora omuntu wowoosi wo obhwiikirira bhukuru kya bhuno!"

<sup>10</sup> Na hano, abhasaani bho omusirikare bhakakyoora mumugye gwo omusirikare wuyo, bhakabhona omubhagati ahoriri.

### **Yeesu aramuryora omumura wuno akuuri**

<sup>11</sup> Eriibhaga isuuu, Yeesu akagya kumugye gwa Naini, ari hamwe na abheega bhaaye, na abhaatu abhaandi bhaaru bhaari bharamutuniirira. <sup>12</sup> Na hano ahaabha yiisukiri ekisyooko kyo omugye, akasikana na abhaatu bhano bhaari bhagegiri omuuku we ekisubhe bharahuruka igutu yo omugye. Omusubhe wuyo, ahaabha omwaana omweene kunina, neewe ahaabha omutuumba. Nina wuyo, ahaataara na abhaatu bhaaru bho omugye guyo.

<sup>13</sup> Hano Omukuru akamurora omutuumba wuyo, akamurorera ebhigoongi, akamubhuurira, "Nookire omukariono." <sup>14</sup> Akiisukira eryaariro rino omuku yaari iguru yaku, akakikuniaku. Na abhaatu bhano bhakigegiri, bhakiimeerera.

Yeesu akabhuga, "Awe omumura, nirakubhuurira, bhuuka!" <sup>15</sup> Omumura wurya yaari akuuri, hayo hayo akabhuka, akiikara, akataanga kukeerenia kweeki. Niho, Yeesu akamuhirira nina.

<sup>16</sup> Abhaatu bhayo bhoosi, bhakaruguura no okugwaatwa no obhwoobha bhwaaru, bhakataanga kumukumya Taatabhugya, bharabhuga, "Omurooti omukuru arweereri gati yeetu!" Bakagaamba kweeki, "Taatabhugya yiiziri kusakirya abhaatu bhaaye!" <sup>17</sup> Na amang'ana gayo gi iguru ya Yeesu, gakanyaragana bhukong'u mu Yudea yoosi, na mubhyaaro ebhiindi bhya haguhi.

### **Yeesu niwe Masiya**

*(Mataayo 11:2-19)*

<sup>18</sup> Hano Yeesu ahaabha arakora gayo goosi, Yohana akiigwa amang'ana ge eyo kurwa kubhaanabheega bhaaye. Kweego Yohana neewe akabhabhirikira abhabhiri bhaabhu, <sup>19</sup> akabhatuma kubha bhagye kumubhuurira Yeesu, "Awe naawe Masiya wurya akuuzi, kasi tumuganye owuundi?"

<sup>20</sup> Hano abhabhiri bhayo bhakamuhikira, bhakamubhuurira, “Yohana Omusubhi atutumiri kwaawe, tukubhuurye, ‘Awe naawe Masiya wurya akuuza, kasi tumuganye owuundi?’”

<sup>21</sup> Kwiibhaga riyo riyo, Yeesu ahaabha arahorya abhaatu bhaaru amarweeri gaabhu, na bhano bhaari bhayaangahiri na amasaambwa amabhi. Na ahaabha arahorya abhahoku bhaaru, bharore.

<sup>22</sup> Niho, Yeesu akabhakyoora, “Mugeende mumuzweenie Yohana goosi gano muruuzi, na goosi gano mwiigiwiiri. Okubhakwe, abhahoku bhararora, abharema bharageenda, abhageenge bharahora, abharibhi bha amatwi bhariigwa, abhaku bhararyoorwa na abhataka bhararwaazirwa Amang’ana Amazomu ge Emuungu.\*

<sup>23</sup> Hakiriku ya bhano bhatana ehaha no okuniikirirya enye!”

<sup>24</sup> Kumara abhabhiri bhayo bhakagya, Yeesu akataanga kubhabhuurira esaango ya abhaatu iguru ya Yohana, kubha, “Mwaari muragya kuroraki kwiibhara? Ni bhamaara wuno akusingisingisa kwo obhukama? Zeyi! <sup>25</sup> Kweeki, mwaari muriisiga kurora omuutu yibhohiri emyeenda emizomu? Zeyi! Ti abhaatu bhayo bhakwiibhoha emyeenda gyo obhuguri obhuhaari no okwiizomya kwo obhwaaru bhwe ebhigiro, bhayo bharabha bhariikara muziinyumba eziikuru zo obhutemi?

<sup>26</sup> “Kimwe! Mwaari muragya kuroraki? Omurooti? Niigo, nirabhabhuurira kubha, niwe omukuru kukira omurooti. <sup>27</sup> Wuyo niwe wuno Amakaamo Amahoreeru gakubhuga iguru waaye,

‘Rora, niramuragania omubhagati waane embere waazo, akubhanurire enzira.’\* ”

<sup>28</sup> Yeesu akabhuga kweeki, “Nirabhabhuurira kubha, gati ya abhaatu bhoosi atariho wuno ano obhukuru kukira Yohana. Yiingabha wuno ano obhusuuhu kukira abhaandi mubhutemi bhwa Taatabhugya niwe ano obhukuru kumukira ewe.”

<sup>29</sup> Abhaatu bhayo bhoosi, hamwe na abhatobhya bhe eriigooti, hano bhakiigwa amang’ana ga Yeesu, bhakiikirirya kubha amiiseego ga Taatabhugya gaari mazomu, kwo okubha nibho bharya Yohana abhasubhiri. <sup>30</sup> Nawe Abhafarisayo na abheegya bhe emigiro, bhakaanga amiiseegi ga Taatabhugya kweebho, kwo okubha bhatasubhirwe na Yohana.

<sup>31</sup> Kweeki Yeesu akabhuga, “Abhaatu bho orwiibhuro runo, nibhatuubhanie naki? Ni bha tuubhoki? <sup>32</sup> Bhatuubheeni na abhaana bhano bhakwiikara kumuteera, bharabhirikira abharikyaabhu,

‘Tukabhatemera ekireere, nawe mutaabhiniri!

Tukabheembera ameembo go okwaaramira, nawe mutana obhwooyo!’

<sup>33</sup> “Kwo okubha, hano Yohana Omubatiizi yiiziri, ataari ararya emikaate, naabhe okunywa amaanzi go omuzabibu.\* Emwe muragaamba kubha agwaatirwe na eriisaambwa eriibhi! <sup>34</sup> Enye Omwaana wo Omuutu hano niiziri, nihaabha nirarya emikaate no okunywa amaanzi go omuzabibu. Emwe muragaamba, ‘Murore! Neewe ni musoohu, kweeki munywi, omusaani wa abhatobhya bhe eriigooti, na abhaatu bhe ebhibhi!’ <sup>35</sup> Kweego, amang’eeni ge Emuungu gararorekana ni ge eheene, na abhaatu bhoosi bhano bhakumwiigwa.”

### Yeesu aramwaabhira omukari we ebhibhi

<sup>36</sup> Yaari ariho Omufarisayo owumwe, akamuginihya Yeesu yiize kurya owaaye. Niho, Yeesu akasikira mumugye gwaaye, akabha mwiigari. <sup>37</sup> Na muroobho muyo,

\*7:22 Omurooti Isaya akaroota kubha Masiya arakora amang’ana gayo.

\*7:27 Ku Maraki 3:1 Taatabhugya Omukuru akagaamba amang’ana gayo.

\*7:33 Emikaate na amaanzi go omuzabibu ni ebhyaakurya bha kira orusiku ku Bayahudi.

yaari arimu omukari owumwe, wuno amenyekeeni kubha ariikara obhwiikari obhubhi.

Omukari wurya, hano yiigwiiri kubha Yeesu ararya wo Omufarisayo wuyo, akasikira muyo ne enzubha yino ekorirwe ne eriigina eryeero, na yaari etuurirwemu amaguta gano gakureetya. <sup>38</sup> Akahigama haguhi na amaguru ga Yeesu, akataanga kurira. Eziingusuri zaaye ziratonyera amaguru ga Yeesu, yaari arazitarikya ne eziinzweeri zaaye, akahuumbatahuumbata amaguru gaaye, no okumuhaka amaguta go okuraangasira.

<sup>39</sup> Omufarisayo wuyo, hano akarora gayo, akiiseega mumwooyo gwaaye kubha, “Omuutu wuno, yaangabheeri omurooti, yaangamenyiri kubha, omukari wuno akumubhatabhata, ni muutu wa tuubhoki. Yaangamenyiri kubha, ewe ariikara obhwiikari obhubhi!”

<sup>40</sup> Yeesu akamubhuurira, “Awe Simooni, nine eng’ana yo okukubhuurira.”

Woosi akamukyoora, “Awe Omweegy, mbuurira.”

Niho, Yeesu akabhuga, <sup>41</sup> “Bahaabhaho abhaatu bhabhiri, bhano bhoosi bhaari bharatunibhwa eziimbirya no omuhaani. Owumwe waabhu, ahaabha agegiri eziidinaari magana ataano. Omurikyaaye woosi, akagega eziidinaari miroongo etaano. \* <sup>42</sup> Babhiri bhayo, bhakabhurwa eziimbirya zo okumuriha endihi yaabhu, wuyo akabhaabhira, bhataraha. Kimwe, gati ya abhabhiri bhayo, ni wuuhe aramuseege bhukong’u?”

<sup>43</sup> Simooni akamukyoora, “Niriiseega kubha, erabha ni wurya yaabhiirwe endihi ekuru.”

Yeesu akamubhuurira, “Eriikyooro ryaaazo ni zomu.”

<sup>44</sup> Niho, Yeesu akamwiikibhukira omukari wuyo, akamubhuurira Simooni, “Oramurora omukari wuno? Nisikiiri mumugye gwaazo, ndora otanisuung’aaniri kwo okuuniha amaanzi go okwiisaabha amaguru gaani, \* nawe ewe, atobhirye amaguru gaani ne eziingusuri zaaye, no okugatarikya ne eziinzweeri zaaye. <sup>45</sup> Na hano okanikeerya, otanibhumbatiri, nawe ewe, kurwa eriibhaga nisikiiri muno, akyaari kurosa kuhuumbata amaguru gaani. <sup>46</sup> Otanisuukiri kwo okunihaka amaguta omutwe gwaane, nawe ewe, ahakiri amaguru gaani, amaguta go okureetya! <sup>47</sup> Kweego nirakubhuurira, kwo okubha ebhibhi bhyaaye bhyaaru bhyaabhiirwe, akeereky obhuseegi bhwaaru. Kyaamwe, woyo woosi wuno yaabhiirwe ebhibhi bhisuuu, areereky obhuseegi bhusuuu.”

<sup>48</sup> Niho, Yeesu akamubhuurira omukari wuyo, “Ebhibhi bhyaazo nibhyaabhiiri.”

<sup>49</sup> Abhagini abhaandi bhano bhaari mwiigari, bhakataanga kwiibhuurya, kubha, “Niwi wuno, hata araabhiira ebhibhi?”

<sup>50</sup> Niho, Yeesu akamubhuurira omukari wuyo, “Otuuriibhwe no obhwiikirirya bhwaazo! Ogye no omureembe.”

### Abhakari bhano bhaari bharamusakirya Yeesu

**8** <sup>1</sup> Niho kweeki, Yeesu ahaabha aragya kuhita mumigye na muziirrobho. Yaari arabhararikira abhaatu amang’ana amazomu go obhutemi bhwa Taatabhugya. Akagya hamwe na abheega bhaaye ikumi na bhabhiri, <sup>2</sup> na abhakari abhaandi bhano yaari abhahorirye amarweeri gaabhu, no okubharuusya amasaambwa amabhi. Musaango ya abhakari bhayo, yaariho Mariamu wa Magidarena, wuno Yeesu ahaabha arusirye amasaambwa amabhi muhuungati. <sup>3</sup> Na yaariho Yoana,

\* **7:41 Eziidinaari** ni eziimbirya ze ekyaaoro kya Abharooma. Edinaari yimwe yaari ya amariho go orusiku rumwe kumuhokya we emirimo.

\* **7:44** Ku Bayahudi, yaari enyaangi okumuhaana omugini amaanzi go okwiisaabha amaguru gaaye, kwo okubha eziinzira zaari zo oruteeri hamwe amatoto, eriibhaga rye embura.

omukari wa Kuza. Kuza wuyo, niwe yaari yimeerereri ebhigiro bhyo omutemi Herode. Bhaari bhariho Suzana na abhakari abhaandi bhaaru. Abhakari bhayo, bhaari bhararuusya ebhigiro bhyaabhu, kwo okubhasakirya Yeesu na abheega bhaaye.

### Ekireengyo kyo omubhusuri

(Mataayo 13:1-9; Mariko 4:1-9)

<sup>4</sup>Orusiku rumwe, abhaatu bha mumigye myaaru, bhaari bharamuuzaku Yeesu, bhakiikumania esaango ekuru. Niho, akabhabhuurira ekireengyo kino, arabhuga, <sup>5</sup>“Yaariho omubhusuri, wuno akagya kubhusura eziimbibho zyaaye mumuguundu. Na hano ahaabha arabhusura, eziindi zikagwa munzira, zikatazwa, ne ebhinyonyi bhikaaza bhikazirya. <sup>6</sup>Eziindi zikagwa mumarobha gano gari kwiitare, na hano zikamera, zikabhurwa amanzi, zikooma. <sup>7</sup>Eziindi zikagwa gati ya amahwa, na hano zikamera, zikahigwa, zikakwa. <sup>8</sup>Ne eziindi zikagwa mumarobha amazomu, na hano zikakong’a, zaari zirageswa kira embibho igana igana!”

Eriibhaga Yeesu akamara kugaamba gayo, akatiirya eriraka arabhuga, “Wuno ana amatwi go okwiigwa, yiitegeerere kisi!”

### Yeesu aragarura ekireengyo kyo omubhusuri

(Mataayo 13:10-23; Mariko 4:10-20)

<sup>9</sup>Abheega bha Yeesu bhakamubhuurya, “Ekireengyo kino, kireegyaki?”

<sup>10</sup>Akabhakyooro, “Taatabhugya abhasakirye emwe okumenya amang’ana gano abhaandi bhatagamenyiri iguru yo obhutemi bhwaaye. Nawe, abhaandi nirabhabhuurira kwe ebhirengyo kubha,

‘Yiingabha bhariisuunza, bhatakurora.

Na yiingabha bhariigwa, bhatakumenya.’\*

<sup>11</sup>“Obhugazuro bhwe ekireengyo kino, niyo yino: Embibho ni eng’ana ye Emuungu. <sup>12</sup>Ne eziimbibho zino zikagwa munzira, zireerekyabhaatu bhano bhariigwa eng’ana ye Emuungu, nawe, hayohayo, Seetaani akaaza akariruuusya mumyoyo gyaabhu, bhataaza kuriikirirya no okutuurihwa.

<sup>13</sup>“Ne eziimbibho zino zikagwa mumarobha gano gari kwiitare, zireerekyabhaatu bhano bhariigwa eng’ana ya Taatabhugya, bhararigega kwo obhuzomererwa, bhariikirirya kwiibhaga. Na hano bhakusakibhwa, bhararitiga, kwo okubha bhatuubheeni ne ebhituutu bhitana emiri.

<sup>14</sup>“Ne eziimbibho zino zikagwa gati ya amahwa, zireerekyabhaatu bhano bhakwiigwa eng’ana ya Taatabhugya, nawe hasuuhwiigo, bharabha ne ehaha, enaamba yo obhuniibhi, no okuzomererwa kwe ebhigiro bhye ekyaaro. Amang’ana gayo gakubha mubhwiikari bhwaabhu, garabhakora abhaatu bhayo bhatuubhane ne ebhituutu bhino bhitakuruusya emisumo emizomu.

<sup>15</sup>“Ne embibho yino ekagwa mumarobha amazomu, ereerekyabhaatu bhano bhariigwa eng’ana ya Taatabhugya, bharayigwaatirira mumyoyo emizomu, bhariigwa no okuribhiika kwo okwiikong’eererya, tee hano bharatubhane ne ebhituutu bhino bhikuruusya emisumo.

### Goosi gararorekana mubhweero

(Mariko 4:21-25)

<sup>16</sup>“Atariho omuutu wuno araakye etara, kimwe ayikuundikirye, kasi ayituure mwiiruungu. Nawe arayituura iguru mukikuumbo, okubha abhaatu hano bhakusikira, bharore obhweero. <sup>17</sup>Niigo ego, bhyoosi bhino bhibhisirwe bhoono,

\* 8:10 Isaya 6:9



bhiraaza kukuundukurwa. Na bhyoosi bhino bhikuundikiirwe, bhiraturwa kubhweero bhimenywe.

<sup>18</sup> “Kweego, mugitegeerere bhwaheene kyeego mukwiigwa! Kwo okubha, omuutu wuno akubha araniigwa bhwaheene na amang’eeni maaru, niwe aroongeribhwa agaandi. Nawe, omuutu wuno atakuniigwa naabhe amang’eeni amasuuhu gano akwiisigira kubha anago, ararusibhwa.”

### **Bhawamwaabhu Yeesu bhe ekisubhe**

*(Mataayo 12:46-50; Mariko 3:31-35)*

<sup>19</sup> Niho, nina na bhawamwaabhu Yeesu bhe ekisubhe, bhakaaza bhamurore. Nawe bhatanagirye kumwiisukira, kwo okubha abhaatu bhaaru bhaari bharahigana.

<sup>20</sup> Abhaatu abhaandi bhakamubhuurira Yeesu, “Nina weenyu na bhawamweenyu bhe ekisubhe, bhiimeereeri habhoori, bhareenda murorene.”

<sup>21</sup> Yeesu akabhakyoora, “Maayi na bhawamweetu bhe ekisubhe, ni bhoosi bhano bhakwiigwa eng’ana ye Emuungu, no okwiitegerera.”

### **Yeesu arahama omukama omuhaari na amabhooka**

*(Mataayo 8:23-27; Mariko 4:35-41)*

<sup>22</sup> Orusiku rumwe, Yeesu akatiira mubhwaato, hamwe na abheega bhaaye, akabhahuurira, “Twambuke enyaanza.” Kimwe, bhakagya.

<sup>23</sup> Hano bhaari kugya, munyaanza muyo Yeesu akasuundagira. Obhukama obhuhaari bhukong’u bhakarweera munyaanza hayo. Obhwaato bhuyo, bhukataanga kwiizura amaanzi, na bhoosi bhakabha munyaako.

<sup>24</sup> Abheega bhayo, bhakamugyaku Yeesu, bhakamubhuukya, bhakamubhuurira, “Taata weetu! Taata weetu! Turasika!”

Yeesu akabhuuka. Niho, akahama obhukama obhuhaari na amabhooka, bhikahoreera. Bhikakira, hakabha kiri.

<sup>25</sup> Niho, Yeesu akabhahhuurya abheega bhaaye, “Obhwiikirirya bhweenyu bhuri hayi?”

Abheega bhayo bhakoobhoha no okuruguura bhukong’u, eno bhakiibhuurya, “Niwi wuno, arahama obhukama obhuhaari na amabhooka, na bhyoosi bhiramwiigwa?”

### **Yeesu amuruusirye omuutu amasaambwa amabhi**

*(Mataayo 8:28-34; Mariko 5:1-20)*

<sup>26</sup> Yeesu na abheega bhaaye, hano bhakaambuka enyaanza ya Gariraaya, bhakahikira ekyaro kya Abhagerasi, kurubhaara rwa kabhiri rwe ekyaro kya Gariraaya. <sup>27</sup> Na hano Yeesu akiituuma kumwaambuko, akasikana no omuutu owumwe wa mumugye gurya, wuno ahaabha na amasaambwa amabhi. Kwiibhaga itaambi atahiikara yiika, ahiikara muziimbiihira za mumabhigi, \* ne eriibhaga riyo ryoosi ahageenda king’aabhi.

<sup>28-29</sup> Eriinani eriibhi riyo, ryaari riramunyaakya kaaru. Abhaatu bhahaabha bharamuriibha kwo okumubhoha ne eminyororo ne ebhiraang’ani. Nawe, ahaabha arabhibhunabhuna, ne eriisaambwa eriibhi rihamuhira ahagiho hano hataari na abhaatu.

Hano omuutu wuyo akasikana na Yeesu, Yeesu akaswaagya eriisaambwa riyo eriibhi rimuhurukemu. Omuutu wuyo akiirirya kwiiraka ikuru, akiirekera

\* **8:27 Eziimbiihira zya mumabhigi** nizo Abhayahudi bhahaabhaaza kumatare no okubhiikamu abhaku.

bhubhuumari embere ya Yeesu, akamubhuurira, “Awe Yeesu, omwaana wa Taatabhugya wuno ori iguru ya bhyoosi, ndora wiiziri kuninyaakya! Nirakwiisasaama, otanisarya!”

<sup>30</sup> Yeesu akamubhuurira, “Eriina ryaazo niwi?”

Woosi akamukyoora, “Eriina ryaane ni Eriihizo.” Akagaamba ego, kwo okubha amasaambwa maaru gaari gamusikiriri. <sup>31</sup> Amanani gayo, gakataanga kumwiisasaama Yeesu, atagaswaagya gagye nyaari.

<sup>32</sup> Ahagiroyo hayo, haari na akaguru. Akaguru kayo kaari ne ekihiringito ekihaari. Ne eyo ryaari ririho erihizo ikuru rye eziimbiizi, zino zaari kuriisya. Kimwe, amasaambwa gayo gakamwiisasaama Yeesu kubha, agahe orugusa gagye gasikire muziimbiizi. Akagabhuurira gagye, <sup>33</sup> gakahuruka kumuutu wuyo, gagaya gakiisikirira kuzimbiizi ziyo. Eziimbiizi zoosi, zikaryaarira kukihiringito ekihaari munyaanza, zikakweera mumaanzi.

<sup>34</sup> Bhariho abhariisya bhe eziimbiizi ziyo. Hano bhakarora gayo goosi gatuukiri, bhakaryaara, bhakagya mumugye na mumiguundu, bharanyaragania amang’ana kubhaatu. <sup>35</sup> Kweego, abhaatu bhakaaza kurora amang’ana gayo kyeego gaari gatuukiri, bhakamuhikira Yeesu.

Hano bhakamuhikira, bhakamurora omuutu wuno, amasaambwa amabhi gaari gahurukirimu. Yaari yiikeeri haguhi na amaguru ga Yeesu, yibhohiri eziingibho, abheeri muhoru. Abhaatu bhayo, bhakagwaatwa no obhwoobha. <sup>36</sup> Abhaatu bharya bharuuzi ebhitiika bhyoosi, bhakabhuurira abharikyaabhu kyeego wurya ahoriibhwe. <sup>37</sup> Niho abhaatu bhoosi bhano bhaari bhiikumeenie kurwa mukyaara kya Abhagerasi, bhakagwaatwa no obhwoobha bhukong’u. Bhakamusabha Yeesu kubha arwe owaabhu. Kweego, akatiira muhwaato, ataange okubhuuka.

<sup>38</sup> Omuutu wuno amasaambwa amabhi garwirimu, akamwiisasaama Yeesu kubha bhagye hamwe. Nawe Yeesu akamukyoorya, akamubhuurira, <sup>39</sup> “Okyoore mumugye, obhabhuurire abhaatu gano Taatabhugya akukoreeri.” Niho, omuutu wuyo akabhuuka hayo, akagya arabhabhuurira abhaatu bhoosi bha mumugye guyo, goosi gano Yeesu amukoreeri.

### **Yeesu arahorya kwo obhwiikirira bhwa abhaatu**

*(Mataayo 9:18-26; Mariko 5:21-43)*

<sup>40</sup> Hano Yeesu akakyoora Gariraaya, akaturuung’aanwa ne esaango ya abhaatu, kwo okubha bhahamuganya.

<sup>41</sup> Niho, akaaza omuutu owumwe, eriina ryaaye niwe Yairo, omukuru we enyuumba ye esaango, akatema ebhiru embere wa Yeesu. Akamwiisasaama kubha yiize mumugye gwaaye, <sup>42</sup> kwo okubha omuukya waaye omweene ego we emyaaka ikumi ne ebhiri, yaari haguhi kukwa.

Eriibhaga Yeesu ahaabha aragya harya, esaango yiyo ya abhaatu ehaamutuniirira no okumuhiga bhukong’u. <sup>43</sup> Na gati ya abhaatu bhayo, yaariho omukari, wuno ahaabha no obhurweeri bhwo okurwa amanyiinga kwiibhaga rye emyaaka ikumi ne ebhiri. [Yiingabha yaari amariri obhuniibhi bhwaaye bhwoosi, okuriha abhagabhu,] ataari ariho wuno akunagya kumuhorya. <sup>44</sup> Kimwe, omukari wuyo akagya inyuma wa Yeesu, akagwaataku omuriingo gwo omweenda gwaaye. Rugeendo rumwe, obhurweeri bhwaaye bhukahora.

<sup>45</sup> Yeesu akabhuurira, “Niwi angwaatiriku?”

Abhaatu bhoosi, bhakahakana kubha, “Atariho wuno akugwaatiriku.”

Petero woosi akamubhuurira Yeesu, “Ee taata, abhaatu mbaaru bhakukwiiruguura no okukuhiga!”

<sup>46</sup> Kyaamwe, Yeesu akabhuga, “Nimenyiri ariho omuutu wuno anigwaatiriku, kwo okubha niriigwa, obhunagya bhwo okuhorya bhuniriiriku.”

<sup>47</sup> Omukari wuyo, hano akarora atana enzira yo okwiibhisa kweeki, akaaza ku Yeesu, ararigita.\* Akatema ebhiru, akamubhuurira embere ya abhaatu bhayo bhoosi, ekigirye kyo okumugwaataku, ne enzira yino ahoriibhwe rugeendo rumwe ego. <sup>48</sup> Yeesu akamubhuurira, “Obhwiikirirya bhwaazo bhukuhonirye! Ogye no omureembe.”

<sup>49</sup> Hano Yeesu yakyakeerenia, akaaza omuutu kurwa mumugye gwa Yairo, akamubhuurira Yairo, “Omuukya waazo, akuuri. Otige kweenderera kumunyaakya Omweegy.” <sup>50</sup> Hano Yeesu yiigiwiiri amang’ana gayo, akabhuurira Yairo, “Otoobhoha! Obhe no obhwiikirirya, no omuukya waazo arahoribhwa.”

<sup>51</sup> Hano Yeesu yahikiri mumugye gwa Yairo, akarekya abhaatu abhaandi okusikira munyuumba murya. Nawe akabhikirirya Petero, Yohana, Yaakobo, na abhiibhuri bho omuukya wuyo bhasikire neewe. <sup>52</sup> Abhaatu bhoosi mumugye guyo, bhaari bhararira rwo obhwooyo bhwo omuukya wuyo. Kyaamwe, Yeesu akabhabhuurira, “Mutige kurira! Akyari kukwa, ndora ahiindiiri!” <sup>53</sup> Abhaatu bhayo bhakamuseka, kwo okubha bhabhamenyiri akuuri.

<sup>54</sup> Yeesu, akagwaata okubhoko kwo omuukya wuyo, akamubhuurira, “Awe omwaana waane, bhuuka!” <sup>55</sup> Rugeendo rumwe, omuukya wuyo, ekoro yaaye ekamukyoorera, akiimeerera. Yeesu akabhabhuurira kubha, bhamuhe ebhyaakurya. <sup>56</sup> Hano abhiibhuri bhaaye bhakarora gayo, bhakaruguura bhukong’u. Kyaamwe Yeesu akabharekya kubha, bhatamubhuurira omuutu wowoosi gano gatuukiri.

### Yeesu aratuma abheega bhaaye ikumi na bhabhiri

(Mataayo 10:5-15; Mariko 6:7-13)

**9**<sup>1</sup> Orusiku rumwe, Yeesu akabhabhirikira abheega bhaaye ikumi na bhabhiri. Akabhaha obhunagya bhwo okuheebha amasaambwa amabhi kurwa kubhaatu, no okuhorya amarweeri. <sup>2</sup> Akabhatuma, bhage kurwaazira abhaatu amang’ana go obhutemi bhwa Taatabhugya, na bhahorye abharweeri.

<sup>3</sup> Akabhabhuurira, “Kurugeendo rweenyu mutagega ekigiro kyokyoosi, etabha hiimbo, abhe murigo, abhe ebhyaakurya, abhe eziimbirya, abhe engibho ibhiri zo okukirania.

<sup>4</sup> “Na hano muraasikire enyuumba yoyoosi, mwiikare muyo, tee orusiku rwo okureka muroobho yiyo. <sup>5</sup> Ne eraabhe abhaatu bho omugye gwogwoosi bhatakubhahigikirya, murwemu, na mwiikung’uute oruteeri kumaguru geenyu.\* Okukora ego, ebhe okubhasigania kubhubhi bhwaabhu.”

<sup>6</sup> Niho abheega bhayo, bhakagya bhakahita muziirrobho. Bhaari bhararwaazira abhaatu amang’ana amazomu, no okuhorya abharweeri bha kira ahagiyo.

### Yeesu aramuhahya Herode

(Mataayo 14:1-12; Mariko 6:14-29)

<sup>7</sup> Omukaangati Herode, yaari ariigwa goosi gano Yeesu yaari kukora, neego gakamuhahya kwo okubha, abhaatu abhaandi bhaari bharabhuga, Yeesu niwe Yohana aryokiri mubhaku. <sup>8</sup> Na abhaandi, bhaari bharagaamba kubha, omurooti Eriya yiiziri kweeki. Nawe abhaandi bhaari bharabhuga, owumwe wa abharooti bhe ekare aryokiri.

\* **8:47** Yaari ararigita kwe ehaha kwo okubha omuutu wo obhurweeri bhwo okurwa amanyiinga yaari ikunene, ataari kweenderwa okumugwaataku hamwe okwiisaanginia na abhaatu abhaandi. Rora Abharaawi 15:25-33.

\* **9:5 Okukung’uute oruteeri kumaguru** ni okweereky kubha Taatabhugya abhaangiri abhaatu bho omugye guyo, kwo okubha bhakaanga abhabhagati bhaaye.

<sup>9</sup>Kyaamwe, Herode akabhuga, “Yohana, nikamung’era omutwe! Niwi wuyo, wa amang’ana ge eteemwa yiyo nikwiigwa?” Kweego, yaari aramohya enzira arorane na Yeesu.

### **Yeesu ariigutya abhaatu bhikwe bhitaano**

*(Mataayo 14:13-21; Mariko 6:30-44; Yohana 6:1-14)*

<sup>10</sup>Abheega bhayo bha Yeesu, bhakakyoora kuYeesu, bhakamubhuurira goosi gano bhakoriri. Niho, akabhakaangata bhakagya abheene mumugye gwa Betisaida.

<sup>11</sup>Abhaatu bhakabhona amang’ana kubha agiiri harya, bhakamutuniirira. Akabhaturuung’aana bhuzomu, akataanga kubheegya amang’ana go obhutemi bhwa Taatabhugya, na yaari arahorya abharweeri gati yaabhu.

<sup>12</sup>Na hano ekahika engoroobha, abheega bhayo ikumi na bhabhiri, bhakagya bhakamubhuurira, “Hano turi, ni mwiitirigo. Obhahaatire abhaatu bhano bhagye muziuroobho, ne eziinyumba zya haguhi, kubha bhiihlonere obhuraari ne ebhyaakurya.”

<sup>13</sup>Yeesu akabhakyoora, “Emwe, mubhahe ebhyaakurya.”

Bakamukyoora, “Twoosi tutana ebhyaakurya, tunagyo emikaate etaano, ne eziiswe ibhiri ego. Oreenda heene, tugeende tubhagurire ebhyaakurya abhaatu bhoosi bhano!” <sup>14</sup>Na abhasubhe bhaari kye ebhikwe bhitaano ego.

Yeesu akabhabhuurira abheega bhaaye, “Bhabhuurire abhaatu bhano bhiiikare amagari kumagari, kira eriigari abhaatu miroongo etaano.” <sup>15</sup>Niho, bhakakora kyeego abharageenie, tee abhaatu bhoosi bhaari bhiikeeri.

<sup>16</sup>Yeesu akagega emikaate giyo etaano, ne eziiswe ibhiri. Akarora iguru mwiisaaro, akabhuga, “Ozomirye Taatabhugya.” Niho akagibhega, akabhaha abheega bhaaye, kubha bhabhahaane abhaatu bhayo. <sup>17</sup>Boosi bhakarya, bhakiiguta. Bhakakumania amasaagyo ge ebhyaakurya, gakiizurya ebhikapu ikumi na bhibhiri.

### **Petero ariikirirya kubha Yeesu niwe Krisito**

*(Mataayo 16:13-28; Mariko 8:27-9:1)*

<sup>18</sup>Orusiku rumwe, Yeesu na abheega bhaaye, bhaari hamwe mukikoro. Yeesu yaari aramusabha Taatabhugya. Hano akamara akabhabhuurira, “Abhaatu bharagaamba kubha enye niwi?”

<sup>19</sup>Bakamukyoora, “Abhaandi, bharabhuga kubha awe ni Yohana Omusubhi. Na abhaandi, awe ni Eriya. Yiingabha abhaandi bharabhuga, awe ni omurooti we ekare aryokiri.”

<sup>20</sup>Yeesu akabhabhuurira kweeki, “Emwe muragaamba enye niwi?”

Petero akamukyoora, “Awe naawe Krisito! Awe otumirwe na Taatabhugya!”

<sup>21</sup>Yeesu akabharekya bhatabhuurira omuutu eng’ana yiyo. <sup>22</sup>Akabhabhuurira, “Enye Omwaana wo Omuutu, nireenderwa ninyaakibhwe bhukong’u, niangwe na abhakaruka bha Abhayahudi, na abhakuru bha abhaseengeri, na abheegya bhe emigiro, na niitwe. Nawe, kurusiku rwa katatu, eheene ninaryokorwa.”

<sup>23</sup>Yeesu akabhabhuurira bhoosi kubha, “Omuutu wowoosi wuno akweenda kubha omweega waane, areenderwa atige okwiinyaakira omweene, yiikirirye okunyaakibhwa naabhe kukwa kwiiguru waane, niho anituniirire. <sup>24</sup>Kwo okubha, wowoosi wuno akweenda kutuurya obhwiikari bhwaaye, niwe araabhuhurye. Na wowoosi wuno araabhuhurye kwiiguru waane niwe araabhutuuurye. <sup>25</sup>Kuna bhweeraki bhwo omuutu, okubhona obhuniibhi bhwoosi bhwe ekyaaaro kyoosi, nawe yibhurye omweene?”

<sup>26</sup>“Wowoosi wuno, araandorere eziisoni enye na amang’ana gaane, niwe araarorerwe eziisoni, enye Omwaana wo Omuutu, hano nikuuzza mukyaaro,

na mubhuguungo bhwa Taata, na bhwa bhamaraika abhahoreeru. <sup>27</sup>Eheene nirabhabhuurira, gati weenyu bhano mwimeereri hano, bhariho bhano bhatakukwa, bhakyaari okurora obhutemi bhwa Taatabhugya!”

### **Obhutemi bhwa Taatabhugya bhurarorekana kuYeesu**

*(Mataayo 17:1-8; Mariko 9:2-8)*

<sup>28</sup>Hano eziisiku inyaanye zikahita, Yeesu akagega Petero, Yohana, na Yaakobo, akatiira nabho mukiguru, agye kusabha ku Taatabhugya.

<sup>29</sup>Hano yahikiri mukiguru, akataanga kumusabha Taatabhugya. Niho, obhusyo bhwaaye bhukiikyooro, eziingibho zaaye, zikabha nirabhu za pee, zikamesya bhukong’u.

<sup>30-31</sup>Hayo hayo, bhakarorekana kwo obhuguungo Musa na Eriya bharakeeryenia na Yeesu, kyeego Taatabhugya yeendiri amare oruku ryaaye Yerusaremu.

<sup>32</sup>Kwiibhaga riyo, Petero na abhaandi bhaari bhahiindiiri eziitiro ndito. Na hano bhakabhuuka, bhakamurora Yeesu ang’ariiri mubhuguungo bhwaaye, na abhasubhe bhahiri, bhimeereeri haguhi neewe.

<sup>33</sup>Eriibhaga bhahiri bhayo bhaari kutiga Yeesu, Petero akamubhuurira, “Awe taata weetu, ni bhuzomu tubhe hano. Twoomboke hano ebhihuuna bhitatu, ekimwe ekyazo, ekiindi kya Musa, ne ekiindi kya Eriya.” Gano Petero akagamba, ataagamenyiri.

<sup>34</sup>Hano Petero yakugaamba gayo, iguru yaabhu rikatuuka eriisaaro, rikabhakundikirya. Abheega bhayo, bhakoobhoha bhukong’u. <sup>35</sup>Rikarweera mwiisaaro eriiraka ikuru, rirabhuga, “Wuno niwe omwaana waane nimusoriri. Bhoono mumwiitegerere!”

<sup>36</sup>Na hano eriiraka riyo rikahwa, abheega bhayo bhakarora Yeesu yaari omweene. Neebho bhakakira na bhatabhuuriiri muutu wowoosi kuziisiku ziyo gano goosi bharuuzi.

### **Yeesu araheebha eriisaambwa eriibhi kurwa kumumura**

*(Mataayo 17:14-18; Mariko 9:14-27)*

<sup>37</sup>Hano kukakya, Yeesu na abheega bhayo bhatatu, bhakituuma kurwa mukiguru, bhakasikana ne esaango ekuru ya abhaatu.

<sup>38</sup>Na gati ya abhaatu bhayo, yaariho omuutu wumwe akatiirya eriiraka, “Ee Omweegya, nirakusabha, ondorere omumura wuno, kwo okubha ewe ni omwaana waane omweene. <sup>39</sup>Ekabha eriisaambwa eriibhi riramurwaania, riramukora ateme ekituri. Kweeki rirabha riramuturira eriirimu, tee eriihuro riramurwa mumunwa. Rirageenderera kumunyaakya bhukong’u, na ritakumutiga bhwaangu.

<sup>40</sup>Nibhiisasaamiri abheega bhaazo kubha bhariiheebhe, nawe bhatanagirye.”

<sup>41</sup>Yeesu akabhuga, “Emwe abhaatu mutabhakeeni, bhano mutana obhwiikirirya, ni abhabhi bhukong’u! Niriikara neemwe no okwiikong’eererya, tee ryoori? Nireetera omwaana waazo.” <sup>42</sup>Hano omwaana wuyo yakuuza, eriisaambwa riyo eriibhi rikamugwiisya haasi, rikamutuurira eriirimu. Kyaamwe, Yeesu akaguhiiya, akamuhorya omwaana wuyo, akamukyoorerya wiise. <sup>43</sup>Abhaatu bhoosi, hano bhakarora obhunagya obhukuru bhwa Taatabhugya, bhakataangara no okuruguura bhukong’u.

### **Yeesu aragaamba kweeki iguru yo oruku rwaaye**

*(Mataayo 17:22-23; Mariko 9:30-32)*

Hano abhaatu bhayo, bhaari bhakyaruguura etemo ya Yeesu, ewe akabhabhuurira abheega bhaaye, <sup>44</sup>“Mwiitegerere kisi, amang’ana gano

nikubhabhuurira bhoono. Enye Omwaana wo Omuutu niraangwa no okwiitwa na abhaatu.”

<sup>45</sup>Nawe, gano Yeesu akabhabhuurira, bhatagamenyiri, kwo okubha eriing’ana riyo ryaari ribhisirwe kweebho, bhatamenyeekereerye ekeembo yaaye. Na bhaari bharoobhoha okumubhuurya iguru ya amang’ana gaaye.

### **Obhukuru bhwe eheene**

*(Mataayo 18:1-5; Mariko 9:33-37)*

<sup>46</sup>Abheega bha Yeesu, bhakataanga kwiibhuurya kubha, niwi omukuru kukira abhaandi gati yaabhu. <sup>47</sup>Kwo okubha Yeesu akagamenya amiiseegi gaabhu, niho akagega omwaana omusuuhu, akamwiimeererya haguhi neewe. <sup>48</sup>Akabhabhuurira, “Omuutu wuno aramuturuung’aane omuutu wi iyaasi kyo omwaana wuyo kuriina ryaane, neenye anituruung’aaniri. No omuutu wuno anituruung’aaniri, niwe aturuung’aaniri wurya anitumiri. Kwo okubha, omusuuhu gati weenyu, wuyo niwe omukuru kukira bhoosi.”

### **Omuutu wuno atakuhakana neemwe, ari rubhaara rweenyu**

*(Mariko 9:38-40)*

<sup>49</sup>Yohana akamubhuurira, “Awe taata weetu, tukarora omuutu wuno ahahebha amasaambwa amabhi kuriina ryaazo, tukamurekya, kwo okubha ewe atari murikyeetu.”

<sup>50</sup>Yeesu akabhuga, “Mutamurekya kweeki, kwo okubha omuutu wuno atakubhahakania emwe, ari rubhaara rweenyu.”

### **Abhasamaria abhaandi bharaanga Yeesu**

<sup>51</sup>Eriibhaga rya Yeesu okukyoora mwiisaaro ryaari haguhi, niho akiigomba kubha agye Yerusaremu, akataanga orugeendo. <sup>52</sup>Niho akabhatuma abhaatu bhamukaangatire, neebho bhakagya bhakasikira muroobho yimwe ya Abhasamaria, kubha bhamubhanurire ahagiho ho okuhiindira ne ebhigiro bhyoosi. <sup>53</sup>Nawe, abhaatu bha muroobho yiyo bhakaanga kumuturuung’aana, kwo okubha yaragya Yerusaremu.

<sup>54</sup>Abheega bhaaye, Yaakobo na Yohana, hano bhakarora gayo, bhakamubhuurya, “Awe Omukuru Yeesu weetu, oreenda tusabhe omuriro gwiwe kurwa mwiisaaro gubhasikye, [kyeego omurooti Eriya woosi akakora]?”\*

<sup>55</sup>Hano bhakabhuga gayo, Yeesu akabhiikyoorera, akabharekya, [akabhuga, “Mutamenyiri ni koroki yino munayo.”] <sup>56</sup>Bakagya muroobho eyiindi.

### **Ebhisigo ebhibhi bhya abhaatu bhano bhakweenda kutuniirira Yeesu**

*(Mataayo 8:19-22)*

<sup>57</sup>Hano Yeesu na abhaanabheega bhaaye bhaari bharaageenda munzira, omuutu owumwe akamubhuurira, “Hohoosi hano oraabhe oragya, nirabha nirakutuniirira!”

<sup>58</sup>Yeesu woosi akamukyoora, “Bhanyamubhwe bhana amabhigi ne ebhinyonyi bhine ebhinyumba, nawe enye Omwaana wo Omuutu, nitana naabhe ho okuhiindirya omutwe gwaane.”

<sup>59</sup>Yeesu akamubhuurira omuutu owuundi, “Onituniirire!”

---

\*9:54 Rora 2 Wafalme 1:10, 12, 14

\*9:55 Ebhitabhu ebhiindi bhye ekare bhirabhuga “Emwe ni abhaatu bha teemoki? Enye Omwaana wo Omuutu nitiiziri okuzisikya ezikoro zya abhaatu, nawe kuzituurya.”

Omuutu wuyo akamukyoora, “Awe Omukuru Yeesu, onihaatire hiinga nigeende nimubhiike taata waane.”

<sup>60</sup> Kyaamwe Yeesu akamukyoora, “Tiga abhaku bhabhiike abhaku abharikyaabhu. Nawe awe, noogye obhabhuurire abhaatu eng’ana yo obhutemi bhwa Taatabhugya.”

<sup>61</sup> Yiiingabha, omuutu owuundi akamubhuurira Yeesu kubha, “Awe Omukuru Yeesu, nirakutuniirira, nawe, onihaatire nigeende nibharage abhaatu bha yiika.”

<sup>62</sup> Yeesu akamubhuurira, “Omuutu wowoosi wuno ataangiri okurima kwiigeembe, araabhe ariikyoora na arasomya inyuma, wuyo, atakweenderwa kubhubhagati bhwo obhutemi bhwa Taatabhugya.”

### Yeesu aratuma abhaanabheega abhaandi miroongo muhungati na bhabhiri

**10**<sup>1</sup> Niho okumara, Omukuru Yeesu akiitoora abhaanabheega abhaandi miroongo muhungati na bhabhiri. Akabhatuma bhabhiri bhabhiri, bhamukaangatire kira eroobho na kira omugye, hano yaakweenda ahike omweene. <sup>2</sup> Akabhabhuurira, “Amagesa ni maaru, nawe abhagesi ni bhasuuhu. Kweego, mumusabhe Omukuru wo omuguundu, atumanie abhagesi abhaandi mumuguundu gwaaye.

<sup>3</sup> “Ambe, mugeende, nawe mumenye kubha nirabhatuma kya amang’oonda gano gakugetenda gati ye eziisuuzi! <sup>4</sup> Mutagega ekiguzi kye eziimbirya, naabhe murigo, naabhe ebhikweera ebhiindi bhyo okukirania. Na hano muraabhe munzira, mutabhurya eriihbaga kwo okukeerenia na abhaatu.

<sup>5</sup> “Na hano muraasikire munyuumba, mukeerye abhaatu bha muyo kwo okubhuga, ‘Emwe, mubhe no omureembe.’ <sup>6</sup> Na araabhe omuutu wo omureembe ari munyuumba muyo, omureembe guyo mumuheeri guratama munyuumba muyo. Nawe, eraabhe bhatana omuutu wo omureembe, omureembe gweenyu gurabhakoorera. <sup>7</sup> Mutabha murasamasama kwo okuhiindira muziinyumba eziindi. Kweego, mwiikare munyuumba yiyo yiyo yino musikirimu, murye no okunywa bhino bhakubhaha, kwo okubha, omubhagati arenderwa ahaabhw amariho gaaye.

<sup>8</sup> “Hano muraasikire omugye omurebhe, na abhiikari bhamu bharaabhasuung’aane, murye ebhyaakurya bhino bharaabhahe. <sup>9</sup> Na mubhahorye abharweeri bhano bhari mumugye guyo. Mubhabhuurire kubha, obhutemi bhwa Taatabhugya bhubhahikiiri.

<sup>10</sup> “Na hano muraasikire mumugye omurebhe, na abhiikari bhatakubhaturuung’aana, emwe muhite kuzinzira za muroobho muyo, murabhuga, <sup>11</sup> ‘Hata ego oruteeri rwo omugye gweenyu, rugwaateeni na amaguru geetu, turagakung’uuta, ebhe obhweerekereryo kubhaatu bhoosi okubha Taatabhugya abhaangiri. Nawe, mumenye kubha, obhutemi bhwa Taatabhugya bhubhahikiiri!’ <sup>12</sup> Nirabhabhuurira kubha, orusiku rurya Taatabhugya araabhatinire ekiina abhaatu bhe ekyaaaro, arabhahiinya abhaatu bho omugye guno, kukira abhaatu abhabhi bha mumugye gwa Sodoma!\*

### Yeesu arahiinya abhaatu bha mumugye gino bhakamwaanga

(Mataayo 11:20-24)

<sup>13</sup> “Murore, abhaatu bha Korazini! Murore, abhaatu bha Betisaida! Kwo okubha, ebhitiika bhino nikakora embere weenyu, naabhe niingabhikoriri mumugye gya Tiro na Sidooni,\* abhaatu bhe emigye giyo bhaangateeri ebhibhi bhyaabhu

\* 10:12 Rora Obhweemero 19:1-29

\* 10:13 Abhaatu bha **Tiro** na **Sidooni** bhatahaabha Abhayahudi, bhaari amakuneene.

kare. Bhaangerekirye obhwiisasaami bhwaabhu kwo okwiibhoha emyeenda gya amagonera, no okwiihaka ekibhu. <sup>14</sup> Kweego, orusiku runo Taatabhugya araabhatinire ekiina abhaatu bhe ekyaa, arabhahiinya kukira kyeego arahiinye, abhaatu abhabhi bha Tiro na Sidooni!

<sup>15</sup> “Neemwe, abhaatu bha Kaperinamu, muriiseega kubha muratiiribhwa tee mwiisaaro? Zeyi, mutakukorerwa ego! Muriituumibhwa tee nyaari!”

<sup>16</sup> Kweego, Yeesu akabhabhuurira abhaanabheega bhaaye, “Omuutu wuno arabhiitegeerere emwe, anitegereeri enye. No omuutu wuno arabhaange emwe, aniangiri enye. Na wuno akunianga, yangiri wuno anitumiri.”

### **Abhaanabheega bha Yeesu bharakyoora**

<sup>17</sup> Niho, abhaanabheega bhayo miroongo muhungati na bhabhiri bhakakyoora, bharazomererwa. Bhakamubhuurira, “Yeesu Omukuru weetu, turaheebha amasaambwa amabhi kuriina ryaazo, garatwiitegeerera!”

<sup>18</sup> Yeesu akabhabhuurira, “Nikamurora Seetaani rirituuma kyo orukubha kurwa mwiisaaro. <sup>19</sup> Emwe mumenye kubha, nibhaheeri obhunagya bhwo okukira eziinguru zoosi zo omubhisa weenyu. Muranagya okugeenda gati ye enzoka ne ekitoromooni no okuzitaza, na kitariho ekigiro kyokyoosi kino kirabhanyahaare.

<sup>20</sup> “Mutazomererwa kubha, amasaambwa amabhi garabhiitegeerera. Nawe, muzomererwe kubha, amariina geenyu gakaamirwe mwiisaaro.”

### **Obhuzomererwa bhwa Yeesu**

*(Mataayo 11:25-27; 13:16-17)*

<sup>21</sup> Eriibhaga riyo, Ekoru Muhoreu akakora Yeesu akazomererwa bhukong’u, niho Yeesu akabhuga, “Taata, awe Omukuru wa mwiisaaro ne esi! Ozomirye, kwo okubha kumang’ana gano obhabhisiri abhang’eeni na abhasomi, ukabhakundukurira abhaatu bhano bhakwiikiirirye kya abhaana. Niigo Taata, niigo ekuzomeeri.”

<sup>22</sup> Niho akabhuga, “Taata aniheeri obhunagya bhwoosi, na atariho wuno amumenyiri omwaana, ni Taata omweene ego. Atariho wuno amumenyiri Taata, nawe ni omwaana omweene niwe amumenyiri, na wowoosi wuno omwaana akweenda kumukuundukurira.”

<sup>23</sup> Niho Yeesu akabhikibhukira abhaanabheega bhaaye, akabhabhuurira, “Hakiriku emwe, kwo okubha murarora amang’ana gano kumeeso geenyu!

<sup>24</sup> Nirabhabhuurira kubha, bhaari bhariho abharooti bhaaru, na abhatemi bhaaru, bhano bhaari ne enaamba yo okugarora gano mukurora, nawe bhataagaruuzi. Na gano mukwiigwa emwe, bhaari ne enaamba yo okugiigwa, nawe bhatagwiiri.”

### **Omusamaria omuzomu wuno akamusakirya omubhisa waaye Omuyahudi**

<sup>25</sup> Orusiku rumwe, omweegya we emigiro akiimeerera, akamubhuurya Yeesu eriibhuuryo ryo okumusakya, “Awe Omweegya, nikorebhwi, niize nibhone obhuhoru bhwa kirakeego?”

<sup>26</sup> Yeesu akamubhuurya, “Awe kumigiro ekaamirwebhwi? No ogimenyiribhwi?”

<sup>27</sup> Akamukyoora, “Ekaamirwe kubha, ‘Omuseege Taatabhugya Omukuru, niwe Taatabhugya waazo, kukoro yaazo yoosi, kumanaga gaazo goosi, na kumang’eeni gaazo goosi.’\* Na ‘Omuseege omurikyaaazo, kyeego wiiseegiri omweene.’\* ”

<sup>28</sup> Yeesu akamubhuurira, “Eriikyooro ryaazo ni zomu! Kora ego, naawe orabhona obhuhoru.”

\* 10:27 Kumbukumbu la Torati 6:5

\* 10:27 Abharaawi 19:18



<sup>29</sup> Nawe, omweegywa we emigiro wuyo, akeenda okweerekywa kubha yikiriribhwe embere wa Taatabhugya, nikyo kikagirya akamubhuurya Yeesu, “No umurikyaane niwi?”

<sup>30</sup> Yeesu akamukyoora ego, “Yaari ariho omuutu wumwe, wuno arwiiri Yerusaremu, ahaabha aragya mumugye gwa Yeriko, na munzira hayo akarwaanibhwa na abhabhisa. Bhakamuruusya emyeenda gino yaari yiibhohiri, bhakamutema bhukong’u, bhakamutiga ari haguhi yo okukwa.

<sup>31</sup> “Kwe eriiruguto, munzira hayo, akaaza omuseengeri owumwe. Nawe omuseengeri wuyo, hano akamurora omuutu wuyo, akahita imbarika orubhaara oruundi rwe enzira.

<sup>32</sup> “Niho kweeki Omuraawi\* woosi akahika, niigo akamurora omuutu wuyo, akahita imbarika orubhaara oruundi rwe enzira.

<sup>33</sup> “Kubhuteereero, akahita Omusamaria\* wumwe, wuno ahaabha murugeendo rwaaye. Hano akamurora omuutu wuyo, akamurorera ebhigoongi, <sup>34</sup> akamwiisukaku, akamuragura ebhigaati bhyaaye kwo okubhituuraku amaguta na amaanzi go omuzabibu, akabhibhoha bhwaheene. Hano yamariri akamutiira kutikiri yaaye, akamuhira munyuumba ya abhagini, akabha aramusakirira muyo.

<sup>35</sup> “Etabhoori yaho, akarusya mukiguzi eziidinaari ibhiri, \* akamuha mweene enyuumba, akamubhuurira, ‘Omutuge omuutu wuno, na hano oraahokeerye eziimbirya eziindebhe kwo okumutuga, hano niraahite, nirakuriha.’”

<sup>36</sup> Niho, Yeesu akamubhuurya omweegywa we emigiro wuyo, “Kubhwiiseegi bhwaazo, hano omuutu wuyo akarwaanibhwa na abhabhisa, ni wuuhe gati ya abhaatu bhatatu bhayo, wuno ahaabha omurikyaaye kwo okumukorera amazomu?”

<sup>37</sup> Akamukyoora, “Ni wurya akamurorera ebhigoongi.”  
Yeesu akamubhuurira, “Nogyeye, obhe orakora egoego!”

### Mariamu areenda kubha omwaanamweega wa Yeesu

<sup>38</sup> Hano Yeesu na abhaanabheega bhaaye bhaari munzira, bhakasikira muroobho yimwe. Na muroobho muyo, yaarimu omukari owumwe, ne eriina ryaaye ni Maarita, akabhaginihya mumugye gwaaye. <sup>39</sup> Maarita wuyo, yaari na musubhaati waaye, wuno yakubhirikirwa Mariamu. Na Mariamu akiikara haguhi na amaguru ga Yeesu, aramwitegeerera.

<sup>40</sup> Nawe Maarita, akabha ne eriihari kwo okunyaaka kubhahokeerya ebhyaakurya. Akagya kuYeesu, akamubhuurira, “Awe Omukuru weetu, otakurora bhubhi kubha, musubhaati waane antigiiri emirimo gyoosi? Ambe, omubhuurire yiye anisakirye!”

<sup>41</sup> Kyaamwe Yeesu akamukyoora, “Maarita, Maarita! Ono obhwiitiimaati iguru ya amang’ana maaru. <sup>42</sup> Nawe, eriho eng’ana yimwe yo obhweera, kweeki ni nzomu kukira goosi. Mariamu niwe yitooriri, na atariho wuno aramuruusye.”

### Ameegyo iguru yo okumusabha Taatabhugya

(Mataayo 6:9-13; 7:7-11)

**11** <sup>1</sup> Orusiku rumwe, Yeesu ahaabha ahagiho aharebhe aramusabha Taatabhugya. Na hano akamara, owumwe wa abheega bhaaye

\* **10:32 Abharaawi** bhaari abhahokya bha Taatabhugya, bhano bhaari bharamuhokeerya munyuumba yaaye. Kung’ana endebhe, rora Hesabhu 3:1-13.

\* **10:33** Abhayahudi bhaari bhararega **Abhasamaria**, kwo okubha bhakarora kubha Abhasamaria bhakamuseengera Taatabhugya kuzira gano gatari bhwaheene kweebho.

\* **10:35 Eziidinaari** ni eziimbirya ze ekyaaro kya Abharooma. Edinaari yimwe yaari ya amariho go orusiku rumwe kumuhokya we emirimo.

akamubhuurira, “Awe Omukuru, otweegye okumusabha Taatabhugya, kyeego Yohana Omusubhi akeegya abhaanabheega bhaaye.”

<sup>2</sup> Yeesu akabhabhuurira, “Hano mukubha muramusabha Taatabhugya, mugaambe ego,

“Taata [weetu wa mwiisaaro],

eriina ryaaazo riguungibhwe.

Obhutemi bhwaazo bhuuze,

[obhuseegi bhwaazo bhukorwe mukyaaro hano,

na kyeego bhukorwa mwiisaaro].

<sup>3</sup> Otuhe ebhyaakurya bhyeetu bhya kira orusiku.

<sup>4</sup> Na otwaabhire ebhibhi bhyeetu,

kyeego twoosi tukubha turabhaabhira

bhano bhakutukorera amabhi.

Otatusikirya mubhitiika,

[nawe otutuurye na wurya omubhi].”

<sup>5</sup> Niho Yeesu akabhabhuurira, “Tubhuge owumwe weenyu yaangagiiri kumusaani waane, mubhutiku gati, amubhuurire, ‘Musaani waane! Nirasabha emikaate etatu, <sup>6</sup> kwo okubha nitariirwe no omusaani waane wuno yaari murugeendo, na neenye nitana ebhyaakurya bhyo okumuha.’

<sup>7</sup> “No omusaani waaye wa munyuumba akamukyoora, ‘Otaninyaakya! Ndora nimariri kwiigara ekiseku, enye na abhaana bhaane tuhiindiri, na nitakunagya kubhuuka no okukuha ekigiro kyokyoosi.’

<sup>8</sup> “Nirabhabhuurira, naabhe omuutu wuyo atakweenda okumuha omurikaayee emikaate kwo okubha ewe ni omusaani waaye, arabhuuka no okumuha ekigiro kino akweenda, kwo okubha omurikaayee akeenderera kumusabha kwo okwiiririirya.

<sup>9</sup> “Kweego, enye nirabhabhuurira, musabhe na murahaabhwa, mumohye na murabhona, mubhuge hanoo, na muraturuung’aanwa. <sup>10</sup> Niigo eraabhe, kira omuutu wuno akusabha, arahaabhwa, na wuno akumoohya, arabhona, na wuno akubhuga hanoo, araturuung’aanwa.

<sup>11</sup> “Awe! Ariho omwiibhuri wowoosi gati weenyu, wuno\* omwaana waaye araamusabhe eswe, aramuha enzoka? <sup>12</sup> Kasi omwaana araamusabhe erige, aramuha ekitoromooni? <sup>13</sup> Kweego, emwe ni abhabhi, nawe mumenyiri okubhaha abhaana bheenye ebhigiro ebhizomu. Ambe! Taata wuno ari mwiisaaro atakubhaha amazomu bhukong’u! Niigo eraabhe, kumuutu wuno araasabhe Ekoru Muhoreeru, arahaabhwa!”

### Yeesu ano obhunagya kukira Seetaani

(Mataayo 12:22-30, 43-45; Mariko 3:20-27)

<sup>14</sup> Orusiku rumwe, Yeesu ahaabha araheebha eriisaambwa, rino rikamukora omuutu wumwe kubha imuumu. Hano eriisaambwa rikamurwaku, akataanga okugaamba kweeki. Yaari eriho esaango ya abhaatu, neebho hano bharuuzi gayo, bhakaruguura bhukong’u.

<sup>15</sup> Nawe, abhaandi bhakabhuga, “Araheebha amasaambwa kubhunagya bhwa Beerizeburi, omukuru wa amasaambwa!”

<sup>16</sup> Abhaandi bhakeenda bhamusakye Yeesu, kwo okumusabha abheerekye ekyeerekenio kurwa mwiisaaro.

\* 11:11 Amang’ara agaandi za Ekiyunaani ziroongerya *omwaana waaye amusabhe omukaate, aramuha eriigina, kasi omwaana waaye amusabhe eswe.*

<sup>17</sup> Nawe, kwo okubha Yeesu akamenya amiiseegi gaabhu, akabhabhuurira, “Obhutemi bhwobhwoosi bhuriitane obhweene, bhuranyaragana. Na bhe enyuumba yoyoosi bharaataane, bhatakubha no obhumwe. <sup>18</sup> Niigo ego, hano Seetaani ariihakanie omweene, obhutemi bhwaaye bhuriimeererabhwi? Nibhabhuurirye eriibhuuryo riyo, kwo okubha murabhuga niraheebha amasaambwa kwo obhunagya bhwa Beerizeburi. <sup>19</sup> Bhoono! Eraabhe enye niraheebha amasaambwa kwo obhunagya bhwa Beerizeburi,\* hata abhaanabheega bheenye bharaheebha amasaambwa kwo obhunagya bhwaaye. Kweego, ebho nibho bharaabhatinire ekiina. <sup>20</sup> Nawe, eraabhe enye niraheebha amasaambwa kwo obhunagya bhwa Taatabhugya, ambe obhutemi bhwaaye bhubhahikiiri.

<sup>21</sup> “Omuutu wa amanaga kya ga Seetaani, araabhe ne ebhigwaato, hano arariibhe ebhigiro bhya mumugye gwaaye, ebhigiro bhiyo bhitakukunikwaku. <sup>22</sup> Nawe, omuutu owuundi wa amanaga amaru, araaze kumurwaania, na araamuhize, aramuruusya ebhigwaato bhyaaye bhiyo yakwiisigira, aribha bhyoosi bhino bhiri mumugye, na okubhitwaania kubhaandi.

<sup>23</sup> “Omuutu wowoosi wuno atakuhokya emirimo hamwe neenye, ewe niwe omubhisa waane. Kweeki wowoosi wuno atakuhokya emirimo hamwe neenye, kwe eheene arasarya emirimo gyaane.

<sup>24</sup> “Emwe, mwiitegeerere ekirengyo kino. Hano erisaambwa eriibhi rikurwa kumuutu, ririruguuruguura ahagiro ahoomu riramohya ho okumuunya. Na hano rikubhurwa, rirabhuga, ‘Nirakyoora munyuumba yaane murya naari.’ <sup>25</sup> Hano rikahika, rikabhona enyuumba etarikiibhwe ne ebheeri nzomu. <sup>26</sup> Niho, erisaambwa riyo rikagya kureeta amasaambwa agaandi muhuungati amabhi bhukong’u kurikira. Gayo goosi, garamusikira omuutu wuyo, no okumwiikaramu. Na kubhuteero, eteemo yo omuutu wuyo erabhiha bhukong’u kukira obhweemero harya.”

### **Hakiriku bhano bhana obhwiitegereri**

<sup>27</sup> Hano Yeesu ahaagaamba gayo, musaango ya abhaatu murya yaari arimu omukari wumwe, akamwaaya kwiiraka ikuru arabhuga, “Hakiriku omukari wuno akwiibhwiiri no okukukookya!”

<sup>28</sup> Nawe Yeesu akabhuga, “Tiigo! Ni hakiriku bharya bhakwiigwa eng’ana ye Emuungu no okwiitegerera.”

### **Yeesu aregya ekyeerekenio kya Yoona**

*(Mataayo 12:38-42; Mariko 8:12)*

<sup>29</sup> Hano abhaatu bhakaaruha no okumwiikumania, Yeesu akabha areenderera kweegya, arabhuga, “Emwe ni rwiibhuro rwa abhaatu abhabhi mutari abhaheene embere we Emuungu, na bhono mureenda ekyeerekenio? Nitakubhakorera ekyeerekenio kyokyoosi. Nawe ekyeerekenio kimwe muraarore ni kyabhura Emuungu yakoriri kumurooti Yoona. <sup>30</sup> Kwo okubha, kyeego Yoona yaari ekyeerekenio kubhaatu bho omugye gwa Ninaawi, ego niigo enye Omwaana wo Omuutu, nirabha ekyeerekenio kubhaatu bho orwiibhuro runo.

### **Yeesu ni mukuru kukira Soromooni na Yoona**

<sup>31</sup> “Orusiku rwo okutina ekiina, akatuuka Marikia wo orubhaara rwa maamu, ewe arabhatinira ekiina abhaatu bho orwiibhuro runo. Kwo okubha, Marikia wuyo, akagya orugeendo kurwa ebhyaaro bhya kure bhukong’u, kubha yiigwe

\* 11:19 *abhaanabheega bheenye* Ekeembo eyiindi eratura kubha *abhaanabheega bhaane, Abhayahudi abharikyeenyu.*

amang'ana ga amang'eeni ga Soromooni. Nawe, hano ariho owumwe wo obhukuru kukira Soromooni!

<sup>32</sup> “Orusiku rwo okutina ekiina, abhaatu bha Ninaawi bharatuuka, neebho bharatugaamba abhaatu bho orwiibhuro runo. Kwo okubha, abhaatu bha Ninaawi bhayo, hano Yoona akabhabhuurira eng'ana ya Taatabhugya, rugeendo rumwe bhakata ebhibhi bhyaabhu. Nawe, owumwe ari hano wo obhukuru kukira Yoona!”

### **Etara yo omubhiri ni ameeso**

*(Mataayo 5:15; 6:22-23)*

<sup>33</sup> “Atariho omuutu wuno araakye etara, kimwe ayikuundikirye. Nawe arayituura iguru mukikumbo, okubha abhaatu bharaasikire gatiyo, bharore obhweero.

<sup>34</sup> “Ameeso gaazo, ni kye etara yo omubhiri. Garaabhe mahoru, omubhiri gwaazo gwoosi gurabha gwiizwiiri obhweero. Nawe, ameeso gaazo garaabhe masariku, omubhiri gwaazo gurabha gwiizwiiri ekiirima. <sup>35</sup> Kweego, omenyeekereerye kubha ono obhweero muusi waazo, etabha kiirima! <sup>36</sup> Eraabhe omubhiri gwaazo gwoosi guno obhweero, otana ekiirima kyokyoosi, oramesya kye etara yino ekukumurika.”

### **Yeesu arabharekya Abhafarisayo**

*(Mataayo 23:1-36; Mariko 12:38-40; Ruuka 20:45-47)*

<sup>37</sup> Hano ya kumara okugaamba gayo, Omufarisayo owumwe akamuginihya Yeesu kubhyaakurya mumugye gwaaye. Yeesu akasikira, akiikara kwiigari.

<sup>38</sup> Omufarisayo wuyo, akamurora Yeesu akyaari kwiisaabha kyeego emigiro gyaari kweenda, akataanga kurya, akaruguura bhukong'u.

<sup>39</sup> Niho, Omukuru Yeesu akabhabhuurira, “Emwe Abhafarisayo, mutakweerya ekikoombe ne ekitubha kwa habhoori. Nawe muusi weenyu, emyoyo giizwiiri obhuteesya no obhubhi. <sup>40</sup> Emwe abhageege! Wurya akateema habhoori, atari niwe akateema muusiyo? <sup>41</sup> Mubhasakiry e abhataka kwe ebhigiro ne emyoyo gyeenyu gyoosi, niho bhyoosi bhirabha bhyeeribhwe kweemwe.

<sup>42</sup> “Muraaza kurora, emwe Abhafarisayo! Muramuruusirya Taatabhugya akabhaara akamwe kiikumi ka kira ekirungo kye ebhyaakurya, kyo omuuny, ebhitunguru, ne ebhiindi ebhyaaru, ndora mutakwiisiga obhuheene kubhaatu, mutana obhuseegi ku Taatabhugya! Mureenderwa okumuruusirya ekimweesero kiyo, nawe muteebha okukora na agaandi gayo.

<sup>43</sup> “Muraaza kurora, emwe Abhafarisayo! Museegiri okwiikara ebhitumbi bhya abhakuru munyuumba ye esaango, museegiri kukeeribhwa no okwiitegeerera kumuteera. <sup>44</sup> Muraaza kurora! Emwe ni kye eziimbiihira zino zitakurorekana, eno abhaatu bharazitaza kwo okutomenya.”\*

<sup>45</sup> Hasuuhwiigo, omweegya owumwe we emigiro akabhuga, “Omweegya, kumang'ana gayo okugaamba na neetwe oratutuka.”

<sup>46</sup> Yeesu akamukyoora, “Na neemwe abheegya bhe emigiro, muraaza kurora! Murabhagegya abhaatu amang'ana amarito ge emigiro. Na neemwe abheene, mutakubhasakirya naabhe hasuuhu okugagega!

<sup>47</sup> “Muraaza kurora! Muroomboka eziimbiihira bhuzomu zya abharooti, nawe abhaatu bhano bhakabhiita abharooti bhayo, ni bhasukuru bheenyu! <sup>48</sup> Kweego, mureerekyia kubha mwiikiriye gano bhasukuru bheenyu bhakoriri, kwo okubha nibho bhakiita abharooti bhayo, neemwe mutakusuuka, muroomboka ego eziimbiihira zyaabhu. <sup>49</sup> Niyo ekakora Taatabhugya akabhuga, kumang'eeni

\* 11:44 Ku Bayahudi gwaari mugiro okutaza naabhe kutoozaku kuzimbiihira.

gaaye, ‘Nirabhatumira abharooti na abheega. Nawe, bharabhiita abharebhe no okubhanyaakya abhaandi.’<sup>50</sup> Kweego, abhaatu bho orwiibhuro runo bharabhuuribhwa kwiiguru ya amanyiinga ga abharooti bhoosi bhano bhakiitwa, kurwa kubhutaangi bhwe ekyaaro.<sup>51</sup> Amanyiinga gakiitika kutaanga ku Abeeri, tee amanyiinga ga Zakaria,<sup>52</sup> wurya akiitirwa mwiiseengerero, gati gati ye enyuumba ya Taatabhugya ne ahagiho ho okuruusirya ekimweeso. Eheene, nirabhabhuurira kubha abhaatu bho orwiibhuro runo bharabhuuribhwa iguru ya gayo goosi.

<sup>52</sup>“Muraaza kurora, emwe abheegya bhe emigiro! Mwiigeeri ekiseku kyo okuhitira, kino abhaatu bhaari bhareenda okuhitiramu okubha bhamumenye Taatabhugya. Neemwe abheene, mutasikiiri, na bharya bhaari kweenda kusikira muusi, mubharibhiiri.”

<sup>53</sup>Hano Yeesu akarwa hayo, Abhafarisayo na abheegya bhe emigiro bhakataanga kumuhakania kwo obhuhaari, no okumubhuurya amabhuuryo maaru,<sup>54</sup> okubha bhahbone enzira yo okumugwaata kwa amang’ana gaaye.

### Ameegyo iguru yo orubheehi

**12**<sup>1</sup>Eriibhaga riyo, ebhikwe kwe ebhikwe bhya abhaatu bhaari bhariikuma, tee bhakiitaza.

Yeesu akataanga kubhabhuurira abhaanabheega bhaaye, “Mwiirihe no orurimi rwa Abhafarisayo, kwo okubha orurimi ruyo, ruranyaragana kye Ekibhwiisya.

<sup>2</sup>Kira kino kikuundikirwe, kirakuundukurwa, kira kino kibhisirwe, kiramenywa.

<sup>3</sup>Kira kino mugaambiri mukiirima, kiriigweerwa mubhweero. Na kira kino mwiimoonyereerye mumatwi mubhyuumba bhya muusi, gararaarika okubha bhoosi bhiigwe.”

### Taatabhugya niwe wo okwoobhohwa

(Mataayo 10:28-31)

<sup>4</sup>“Emwe abhasaani bhaane, nirabhabhuurira mutoobhoha abhaatu bhano bhakwiita omubhiri. Hano bhakumara kwiita, bhatakunagya kukora kyokyoosi.

<sup>5</sup>Nawe, nirabhabhuurira wuno mukweenderwa kumwoobhoha, mumwoobhohe Taatabhugya! Hano akumara okumwiita omuutu, ano obhunagya bhwo okumutaasa mumuriro gwa nyaari. Wuyo mureenderwa mumwoobhohe, ewe omweene!

<sup>6</sup>“Mumenyiri kubha ebhitorookobhwe bhitaano, bhiraguribhwa kwo obhuguri bhusuuu bhukong’u? Nawe, Taatabhugya atakukyebha naabhe ekimwe kyaabhu.

<sup>7</sup>Na neemwe, muno obhweera bhukong’u kukira ebhitorookobhwe bhyaaru! Yiingabha eziinzweeri ze emitwe gyeenyu zibharirwe, kweego mutoobhoha.

### Mwisiriryehi obhwiikirirya bhweenyu embere ya abhaatu

(Mataayo 10:32-33; 12:32; 10:19-20)

<sup>8</sup>“Enye nirabhabhuurira, omuutu araaniikiriryehi embere wa abhaatu kubha ewe no owaane, enye Omwaana wo Omuutu woosi niramwiisirirya embere wa bhamaraika bhe Emuungu.<sup>9</sup> Nawe, araaniange embere ya abhaatu, na neenye niramwaanga embere ya bhamaraika bha Taatabhugya.<sup>10</sup> Hano omuutu araagaambe amang’ana amabhi kwe enye Omwaana wo Omuutu, araabhirwa.

<sup>11:51</sup> Ku Makaamo Amahoreeru ga Abhayahudi, wuno yitirwe embere ahaabha **Abeeri**, na wuno yitirwe kwa obhuteero, ahaabha omurooti **Zakaria**. Gayo, ogasome mukitabhu kya Mwanzo 4:8, na mu 2 Mambo ya Nyakati 24:20-22.

Nawe, hano akugaamba amang'ana amabhi go okwaanga no okuzeera Ekoro Muhoreeru, wuyo atakwaabhirwa.

<sup>11</sup> “Hano muraahirwe munyuumba ye esaango okutinirwa ekiina, ne embere ya abhakaangati, ne embere ya abhanaangwa, mutiinyaakya. Mutabha ne ehaha iguru ya amang'ana gano muraagaambe kwo okwiibhagiirira, <sup>12</sup> kwo okubha eriibhaga riyo riyo, Ekoro Muhoreeru araabheegye amang'ana gano mukweenderwa okugagaamba.”

### **Obhuhoru bhwo omuutu, bhutakurweera kubhwaaru bhwe ebhigiro bhyaaye**

<sup>13</sup> Musaango yiyo ya abhaatu, omuutu owumwe akamubhuurira Yeesu, “Omweegya, omubhuurire mura weetu, anitwaanire engabho yino taata akatutigira.”

<sup>14</sup> Yeesu akamukyoora, “Weewi akanituura nibhe omutaania gati weenyu?”

<sup>15</sup> Kweego Yeesu akabhabhuurira abhaatu bhayo, “Murore! Mwaangarire etuubho ne enaamba ye ebhigiro, kwo okubha, obhuhoru bhwo omuutu, bhutakurweera kubhwaaru bhwe ebhigiro bhyaaye.”

<sup>16</sup> Kweeki Yeesu akabhabhuurira ekireengyo, akabhuga, “Yaari ariho omuniibhi wumwe, no omuguundu gwaaye gukiibhura amagesa maaru bhukong'u.”

<sup>17</sup> Akiibhuurya mumwooyo gwaaye, ‘Bhoono nikorebhw? Amagesa gano goosi ni gaane, nitana ahagiro hano niraagatuure!’

<sup>18</sup> “Kweego akabhuga, ‘Nirakora ego. Niraasya ebhitara bhyaane, no okuruka ebhikuru bhukong'u. Muyo niraturamu amagesa gaani goosi, ne ebhigiro bhyaane ebhiindi. <sup>19</sup> Kweeki niriigaambira mumwooyo gwaane, “Bhoono wituuriri ekibhuumbiko kye ebhigiro bhyaaru bhuzomu. Bhirakwiisa kumyaaka myaaru! Kimwe, muunya ambe. Orye no onywe, ozomererwe!”

<sup>20</sup> “Nawe, Taatabhugya akamubhuurira, ‘Awe ni omugeege! Obhutiku bhwa reero, orakwa! Na ebhigiro bhyoosi bhino wibhuumbiri, bhirabha bhyawi?”

<sup>21</sup> Yeesu akamara kwo okugaamba, “Niigo eraabhe, kumuutu wurya akwiibhuumbira ebhigiro bhye ebhibhi kwe ekigirirye kyaaye omweene, nawe kumahokya ge ebhigiro bhyaaye, atakumwiisiga Taatabhugya.”

### **Ameegyo iguru yo okunyaaka**

*(Mataayo 6:25-34, 19-21)*

<sup>22</sup> Kweego, Yeesu akabhabhuurira abheega bhaaye, “Kweego, mutabha no obhwiitiimaati iguru yo obhwiikari bhweenyu, kubha niki muraarye, kasi iguru ye emibhiri gyeenyu, niki muriibhohe. <sup>23</sup> Ndora obhwiikari bhuna obhweera kukira ebhyaakurya, no omubhiri nagwe, guna obhweera bhukong'u kukira emyeenda.

<sup>24</sup> “Mwiiseege ekireengyo kya bhanyamuko, bhatakweemya naabhe bhatakugesa, bhataana ekibhuumbiko naabhe ebhitara, nawe Emuungu arabhariisa. Na neemwe muno obhweera bhukong'u kukira ebhinyonyi! <sup>25</sup> Niwi gati weenyu akubha no obhwiitiimaati na aranagya kwiiyoongerya obhwiikari bhwaaye naabhe kwe esa yimwe?” <sup>26</sup> Ambe! Mutakunagya kukora eng'ana esuuhu kya yiyo, kwaki mutakwiitiimaata iguru ya agaandi?

<sup>27</sup> “Murore ebhibharyo kyeego bhikubharya, bhitakukora emirimo na bhitakutuma emyeenda. Yiatingaba, nirabhabhuurira ego, Soromooni mubhwaame bhwaaye bhwoosi, bhatamwiibhohirye bhuzomu kye ekibharyo ekimwe!

<sup>28</sup> Kweego, niigo Emuungu akuzomya amanyaaki ga mwiitirigo, yiatingaba gariho

\* 12:25 Kwiiyoongerya obhwiikari bhwaaye naabhe kwe esa yimwe, obhugazuro bhiindi bhiratura kubha, kwiiyoongera obhutaambi bhwaaye naabhe kwo okubhoko kumwe?

reero na tabhoori gararekerwa mumuriro, ni heene arabhiibhohya emwe, abhaatu bho obhwiikirirya bhusuuhi!

<sup>29</sup> “Kweego, mutiinyaakya muraryaki, kasi muranywaki, mutabha ne ehaha.

<sup>30</sup> Abhaatu bhano bhata Abhayahudi, bharanyakira ebhigiro bhiyo. Nawe, Wuuso weenyu wa mwiisaaro amenyiri bhuzomu kubha murabhyeenda! <sup>31</sup> Nawe, mukore go obhutemi bhwa Taatabhugya, na arabhoongerereerya ebhigiro bhyoosi.

<sup>32</sup> “Emwe eriihizo isuuhi, mutoobhoha, kwo okubha wuuso weenyu aseegiri kubhaha obhutemi bhwaaye. <sup>33</sup> Mugurye ebhigiro bhyeenyu, na mubha abhataka eziimbirya. Kwo okokora ego murabha mwiituiriri ebhiguzi bhyeenyu mwiisaaro, hano bhitasarika. Eyo, atariyo mwiibhi, naabhe isindira ryo okubhisarya. <sup>34</sup> Ahagiro hano mukutuura eziihata zyeenyu, niho ne eziikoro zyeenyu zikubha.”

### Abhaatu bhiirate kwo okuza kwaaye Krisito Yeesu

<sup>35</sup> “Eriibhaga ryoosi, obhutiku no omwiisi, mubhe mwiibhanwiri okumukorera Omukuru emirimo. <sup>36</sup> Mubhe kya abhahokya bhano bhakuganya omukuru waabhu akyoore kurwa mubhweenga. Hano araaze no okubhuga hano, na bhamwiigurire ekiseku rugeendo rumwe. <sup>37</sup> Hakiriku ya abhabhagati bhano omukuru waabhu araabhabhone bharamuganya hano akuuza, bharabhona orubhaango. Nirabhabhuurira obhuheene, ariibhanura, arabhiikarya mwiigari, no okubhahokeerya! <sup>38</sup> Hano omukuru araakyoore mubhutiku gati, abhe etabhoori zuri, no okubhabhona bhamariri kwiibhanura, abhahokya bhayo bharabhona orubhaango! <sup>39</sup> Mumenye kisi eriiing’ana rino. Mweene enyuumba, yaangamenyiri eriiibhaga rino omwiibhi akuuza, yaarirata, no omwiibhi atakusikira mumugye gwaaye yiiibe. <sup>40</sup> Niigo ego, enye Omwaana wo Omutu, niraaza kwiibhaga rino mutarimenyiri.”

### Ekireengyo kyo omubhagati omuheene, na wuno atari omuheene

*(Mataayo 24:45-51)*

<sup>41</sup> Niho, Petero akamubuurya Yeesu, “Ee Omukuru, ekireengyo kino otubhuuriiri, ni kweetwe abheene, kasi ni kwa abhaatu bhoosi?”

<sup>42</sup> Yeesu akamukyoora, “Ni weewi omubhagati omwiikirirya na wa amang’eeni? Ni mubhagati wuno omukuru waaye amutuuiriri abhe omwiimeerereri wa abhabhagati abhaandi munyuumba yaaye, okubha abhe arabhaha ebhyaakurya kwe eriiibhaga rino rikweenderwa. <sup>43</sup> Omukuru waabhu araakyoore kurwa orugeendo, no okumubhona omubhagati wuyo arakora ego, niho araabhone orubhaango. <sup>44</sup> Nirabhabhuurira obhuheene, omukuru waaye aramukora abhe omwiimeerereri we ebhigiro bhyaaye bhyoosi.

<sup>45</sup> “Nawe omubhagati wuyo akiiseega mukoro yaaye, ‘Omukuru waane akezeeri bhukong’u kukoora,’ niho araataange kubhatema abhabhagati abharikyaaye, abhasubhe na abhakari. Araataange okurya no okunywa, tee agwaatwe. <sup>46</sup> Omukuru waaye araakyoore kurwa orugeendo, araaza orusiku runo omubhagati atakumwiiseegera eriiibhaga rino atamenyiri. Niho omukuru waaye aramutema bhukong’u, no okumutuura hamwe na abhaatu abhabhi bhano bhatakumwiitegerera Omukuru.

<sup>47</sup> “Omubhagati wuno amenyiri obhuseegi bhwo omukuru waaye, nawe atiibhanwiri kwo okugakora kyeego akweenderwa, aratemwa bhukong’u. <sup>48</sup> Nawe, omubhagati wuno atamenyiri obhuseegi bhwo omukuru, araakore eriiing’ana rino rikweenderwa aratemwa, ewe aratemwa hasuuhi. Omutu wuno aheerwe bhyaaru, aratunibhwa bhyaaru, no omutu wuno aheerwe bhyaaru bhukong’u, aratunibhwa bhyaaru bhukong’u.”

## Yeesu ni ekigirye kya abhaatu okutaana

(Mataayo 10:34-36)

<sup>49</sup> “Enye niiziri mukyaaro hano okuhemba omuriro. Na niingaseegiri nirore omuriro guyo gwakiri! <sup>50</sup> Nawe enye omweene, nino obhwaaranibhwa bhwe enyaako kong’u tee oruku, bhuno nikweenderwa, neebhwe ereenderwa nibhuturuung’aane okubha bhubhe bhubheeri, no okubhuturuung’aana nirabha ninyaakiri bhukong’u. <sup>51</sup> Awe, muriiseega kubha niiziri mukyaaro okureeta omureembe? Zeyi! Nirabhabhuurira, niiziri okwaahura abhaatu. <sup>52</sup> Okutaanga bhoono, musaango ya abhaatu bhataano, bhatatu bhariyaahura kubhabhiri. Bhabhiri nabho, bhariyaahura kubhatatu. <sup>53</sup> Wiise aratamania no omwaana waaye, no omwaana woosi, aratamania na wiise waabhu. Nina aratamania no omuukya waaye, no omuukya woosi aratamania na nina waabhu. Inyibhyaara ariyaahura kumukari wo omwaana waaye, no omukari woosi, aratamania ni inyibhyaara.”

### Okutama okumenya ebhirengyo bhyo okuza kwa Yeesu

(Mataayo 16:2-3)

<sup>54</sup> Okumara Yeesu akabhuurira eziisaango za abhaatu, “Hano mukurora amasaaro gararweera nyaanza, niho muraabhuge, ‘Embura eri haguhi kutweeka,’ na heene niigo eraabhe. <sup>55</sup> Na hano mukurora obhukama bhurarweera maamu, murabhuga, ‘Harabha no orwooya,’ na niigo ekubha. <sup>56</sup> Emwe abhabheehi! Ndora mumenyiri kira eng’ana, ya mwiisaaro na mukyaaro! Nawe bhoono kwaki, mutaamibhwe okumenya ekeembo ya amang’ana gano gakutuuka eziisiku zino?”

### Abhaatu bhano omukya okwiigwaana no omuzoongeri waabhu

(Mataayo 5:25-26)

<sup>57</sup> “Na kwaki, emwe abheene mutakutina ebhiina okukora gano gakweenderwa? <sup>58</sup> Hano omuzoongeri waazo akukuhira mukiina, kora omukya okwiigwaana neewe mukyaari munzira. Okore ego, ataaza kukuhikya embere yo omutini we ekiina, wuno araakuhire kumusirikare, okubha akusikirye munyuumba ya abhabhohwa kwa nguru. <sup>59</sup> Nirakubhuurira kubha, eheene otakurwamu, tee hano oraarihe esiiri yoosi!”

### Mute ebhibhi bhyeenyu mutasika

**13** <sup>1</sup> Kwiibhaga riyo, abhaatu abhaandi bhakabhuurira Yeesu kubha, Pirato akaswaagya abhasirikare bhiite Abhagariraaya abhaandi, hano bhaari bharruusya emitugo gyaabhu gigwagwe kwo okuruusibhwa ebhimweeso ku Taatabhugya.

<sup>2</sup> Yeesu akabhabhuurira, “Awe! Muriiseega kubha Abhagariraaya bhayo, bhaari ne ebhibhi kukira Abhagariraaya abhaandi bhoosi, kwo okubha bhakakwa kuteemo yiyo? <sup>3</sup> Nirabhabhuurira kubha, tiigo! Muraatame kuta ebhibhi bhyeenyu, murasika mwoosi. <sup>4</sup> Kasi, bharya abhaatu ikumi na bhanaane, bhano bhakagwerwa ne etimu ekuru yeeyo Siroamu, muriiseega kubha ebho nibho abhabhi kukira abhiikari abhaandi bhoosi bha Yerusaremu? <sup>5</sup> Nirabhabhuurira kubha, tiigo! Muraatame kwiisasaama ebhibhi bhyeenyu, murasika mwoosi.

### Ekireengyo kyo omuti guno gutakutwaara emisumo

<sup>6</sup> Kyaamwe, Yeesu akabhabhuurira abhaatu ekireengyo kino, “Yaari ariho omuutu wumwe, na wuyo akeemya omuti gwe emisumo mumuguundu gwaaye. Hano eriibhaga rikahita, akagya kukomyaku emisumo, nawe atabhweeniku



kyokyoosi. <sup>7</sup> Kimwe, akamubhuurira omuhokya wa mumuguundu, ‘Rora! Kumyaaka etatu naari niraaza kukomya emisumo kumuti guno, nawe nitakabhweeniku ekigiro. Bhoono, awe gutine, gutige okusarya esi!’

<sup>8</sup> “Nawe, omuhokya wuyo akamubhuurira, ‘Omukuru, ogutige omwaaka gumwe ogweene, nigurimire no okugutuurira oruse. <sup>9</sup> Neegwe guraatwaare emisumo, ni bhwaheene! Nawe guraatame okutwaara, ogutine.”

### **Yeesu arahorya omukari orusiku rwo okumuunya**

<sup>10</sup> Orusiku rumwe rwo okumuunya, Yeesu ahaabha munyumba yimwe ye esaango, areegya abhaatu. <sup>11</sup> Gati ya abhaatu bhayo, yaarimu omukari wumwe, na yaari agwaatirwe ne erisaambwa kumyaaka ikumi ne enaane. Ne erisaambwa riyi, rikamukumba omugoongo, na atanagirye kugororoka bhweema.

<sup>12</sup> Hano Yeesu akamurora, akamubhirikira, akamubhuurira, “Maayi, obhurweeri bhwaazo bhuhoriibhwe, na obheeri bhwaheene bhoono!” <sup>13</sup> Yeesu akamutuurira amabhoko, rugeendo rumwe, omukari wuyo akagororoka bhweema, akataanga okumukumya Taatabhugya.

<sup>14</sup> Kyaamwe omukuru we enyumba ye esaango akatiinda, kwo okubha Yeesu akahorya omuutu orusiku rwo okumuunya. Kweego, akabhabhuurira abhaatu, “Kubhutuuro, eziisiku zo okukora emirimo ni isaasabha. Kuziisiku ziyo muuze muhoribhwe, nawe mutaaza kuhoribhwa orusiku rwo okumuunya!”

<sup>15</sup> Nawe Omukuru Yeesu akamukyoora, “Emwe ni abhabheehi! Ndora, emwe mwoosi murakora emirimo eziisiku zyo okumuunya! Kira owumwe weenyu, atakusyookorera eziing’oombe ne eziitiki zaaye kurwa mwiibhaanza, no okuzihira kunyweesya orusiku rwo okumuunya? <sup>16</sup> Ndora omukari wuno we ekisyooko kya Aburahamu, amariri emyaaka ikumi ne enaane abhohirwe na Seetaani. Ewe neewe, etakweenderwa yigurirwe orusiku rwo okumuunya?”

<sup>17</sup> Hano Yeesu akagaamba gayo, abhahakani bhaaye bhoosi, bhakarora eziisoni. Nawe abhaandi bhoosi, bhakazomererwa bhukong’u iguru ya amahokya amazomu gano Yeesu ahaabha aragakora.

### **Ebhirengyo bhye etetere esuuhu no obhutuunduuru**

*(Mataayo 13:31-33; Mariko 4:30-32)*

<sup>18</sup> Kimwe Yeesu akabhuurya, “Obhutemi bhwa Taatabhugya bhuribhwi? Na nibhutubhanie naki? <sup>19</sup> Hamwe nibhutubhanie ne etetere esuuhu bhukong’u,\* yino omuutu akeemya mumuguundu gwaaye. Ekamera, ekakura gukabha omuti, ne ebhinyonyi bhikaaza bhikoomboka ebhinyumba bhyaabhu kuzisaagya zo omuti guyo.”

<sup>20</sup> Yeesu akabhuurya kweeki, “Nirabhutubhanie obhutemi bhwa Taatabhugya naki? <sup>21</sup> Bhutuubheeni ne Ekibhwiisya kino omukari yaagegiri, akasaanginia ne ebhisehi bhitatu bhyo obhutu, tee obhutu bhwoosi bhukasita.”

### **Okuhitira mukiseku ekiguuti**

*(Mataayo 7:13-14, 21-23)*

<sup>22</sup> Yeesu no orugeendo rwaaye okugya Yerusaremu. Na hano yaari munzira, ahaahita mumigye emikuru ne emisuuu areegya abhaatu. <sup>23</sup> Orusiku rumwe, omuutu akamubhuurya, “Awe! Omukuru Yeesu, abhaatu bhano bharaatuiribhwe ni bhasuuhwiigo?”

Yeesu akabhuga, <sup>24</sup> “Ekiseku kya mwiisaaro ni kiguuti. Nirabhabhuurira, mwiikong’eererye okusikira, kwo okubha bhaaru bharasakya okusikira, nawe

\* 13:19 *Etetere esuuhu bhukong’u* ku Kiyunaani ni *tetere ye eharadari*.

bhatakunagya. <sup>25</sup> Eriibhaga mweene enyuumba akwiigara ekiseku, emwe bhoosi muratamwa okusikira. Muriimeerera habhoori no okutaanga kutema ekiseku, eno murabhuga, ‘Hano!’ Na muramusabha, ‘Omukuru, otwiigurire!’

“Nawe arabhakoora, ‘Nitabhamenyiri emwe, ne eno murweerer!’”

<sup>26</sup> “Neemwe muramubhuurira, ‘Ndora tukarya no okunywa hamwe naawe, kweeki okatweegya muziirrobho zeetu!’”

<sup>27</sup> “Kweeki arabhabhuurira, ‘Nitabhamenyiri emwe, ne eno murweerer!’ Emwe mwoosi ni abhakori bhe ebhibhi, murwe owaane hano.’”

<sup>28</sup> “Niho muraarire no okusaania ameeno, kwo okubha muramurora Aburahamu, Isaaka na Yaakobo, na abharooti bhoosi bhari mubhutemi bhwa Taatabhugya, ndora emwe murabha mutasirwe habhoori! <sup>29</sup> Abhaatu okurwa ruguru na nyaanza, kurwa maamu na range, bharaaza kurya ebhyaakurya munyaangi, mubhutemi bhwa Taatabhugya.

<sup>30</sup> “Mwiitegeerere! Abhaatu bhano bhoono ni bho obhuteero, bharabha bho obhutaangi, na bhano bho obhutaangi bhoono, bharabha bho obhuteero.”

### Yeesu ararorera ebhigoongi Yerusaremu

(Mataayo 23:37-39)

<sup>31</sup> Eriibhaga riyo riyo, Abhafarisayo abharebhe bhakamugyaku no okumubhuurira Yeesu, “Orwe hano, ogye ahagiho ahandi, kwo okubha Herode areenda kukwiita.”

<sup>32</sup> Yeesu akabhakoora, “Herode ewe ni kya nyamubhwe! Mugeende mumubhuurire, ‘Rora! Reero na tabhoori, nirarusya amasaambwa kurwa kubhaatu, no okubhahorya abharweeri, no orusiku rwa katatu niramara emirimo kyeego naari niiziri kukora.’ <sup>33</sup> Hamwe na gayo, ereenderwa nigeenderere no orugeendo rwaane okugya Yerusaremu reero, tabhoori na bhasirya, kwo okubha ereenderwa ku murooti okukwa Yerusaremu, hatari ahagiho ahandi!”

<sup>34</sup> “Emwe abhaatu bha Yerusaremu! Abhaatu bha Yerusaremu! Ndora muriita abharooti no okutema abhaatu amagina bhano Taatabhugya arabhatuma oweenyu. Nigoombiri mara nzaru okukuma abhaatu bhaazo, kyeego ekoko ekukuma ebhizuuzuru bhyaaye, nawe emwe mutaniendiri. <sup>35</sup> Murore bhoono! Muratigirwa enyuumba yeenyu bhusa! Nawe, nirabhabhuurira, eheene mutakuundora kweeki, tee hano muraagaambe, ‘Aguungibhwe wuno akuuza kuriina ryo Omukuru.’”

### Yeesu arahorya omurweeri orusiku rwo okumuunya

**14** <sup>1</sup> orusiku rwo okumuunya, Yeesu akagya kurya ebhyaakurya mumugye gwo omukaangati owumwe wa Abhafarisayo. Na hano yaari mumugye muyo, Abhafarisayo na abhaatu abhaandi bhaari bharamwiisuunza bhukong’u.

<sup>2</sup> Ne embere waaye hayo, yaariho omuutu owumwe wuno yaari no obhurweeri bhwo okubhumba omubhiri. <sup>3</sup> Yeesu akabhuurya Abhafarisayo na abheegya bhe emigiro, “Awe! Kumigiro gyeetu tuno orugusa kuhorya abhaatu orusiku rwo okumuunya, kasi tutakweenderwa kuhorya?” <sup>4</sup> Nawe, ebho bhakakira. Yeesu akamugwaataku omurweeri wuyo, akamuhorya, akamubhuurira agye yiika.

<sup>5</sup> Niho kweeki Yeesu akabhabhuurya, “Ni weewi gati weenyu, wuno etikiri yaaye\* hamwe eng’oombe yaaye yaangatubhiiri mukitaaro orusiku rwo okumuunya, yaange kuirusyamu kwo okubha ni orusiku rwo okumuunya?”

<sup>6</sup> Abhaatu bhayo, bhataari na ryo okugaamba.

\* 14:5 etikiri yaaye Amang’ara agaandi ge Ekiyunaani gakaamirwe omwaana we ekisubhe.

### Okwiiriha iguru yo okwiikomeerya obhuguungibhwa

<sup>7</sup> Yeesu ahaarora kyeego abhagini bhe enyaangi yiyo, bhaari bhakwiitoora ebhitumbi bhye embere. Niho akabhabhuurira ekireengyo akabhuga, <sup>8</sup> “Hano okuraarikwa munyaangi, otiikara omweeya gwo omugini omuguungibhwa. Otakora ego kwo okubha, eratura ekabha araarikirwe omugini owuundi kukukira awe. <sup>9</sup> Na wuno abharaarikiri awe no owuundi hano akuuza arakwiimeererya no okubhuurira, ‘Omutigire wuno omweeya guzo yiikare.’ Hayo, oraaza kurora eziisoni bhukong’u, kwo okubha oraswaagibhwa kugya kwiikara omweeya gwo omuutu omusuuhu bhukong’u.

<sup>10</sup> “Kweego, hano oraraarikwe munyaangi, noogye wiikare kumweeya gwo omuutu wi iyaasi, kwo okubha hano wurya akuraarikiri akuuza, akubhuurire, ‘Omusaani waane, nauze embere hano, niho ahazomu bhukong’u.’ Kweego niigo bharaakusuuke no orabha embere ya abhagini bhoosi. <sup>11</sup> Kwo okubha, omuutu wuno akwiigega, ariikibhwa iyaasi no omuutu wuno akwiikiyika, atatiiribhwa.”

<sup>12</sup> Niho, Yeesu akamubhuurira wurya akamuginihya, “Hano oraabhakore abhaatu ebhyaakurya bhya mumwiisi hamwe engorobha, otabharaarika abhasaani, naabhe bhawamweenyu, naabhe abhahiiri bhaazo, naabhe abhanyarobho bhaazo, naabhe abhaniibhi bha muroobho yaazo. Oraakore ego, neebho bhoosi bharakuraarika, na kweego orabha okyooreriibhwe amariho ku garya obhakoreeri.

<sup>13</sup> “Nawe, okubha orabhakoreeri enyaangi, oraarika abhataka, abharema, amagata na abhahoku. <sup>14</sup> Niho oraabhone orubhaango, kwo okubha bhayo bhatana ekigiro kyo okukukyoorerya. Nawe, Taatabhugya niwe araakukyoorerye, kwiibhaga ryo okuryoora abhaatu bhe eheene.”

### Ekireengyo kye enyaangi yo obhutemi bhwa Taatabhugya

*(Mataayo 22:1-10)*

<sup>15</sup> Omugini owumwe wa bharya bhaari bhiikeeri neewe kwiigari, hano yiigwiiri amang’ana ga Yeesu, akamubhuurira, “Ano orubhaango, omuutu wowoosi wuno araarye enyaangi mubhutemi bhwa Taatabhugya!”

<sup>16</sup> Yeesu akamukyoora kwe ekireengyo, akabhuga, “Yaari ariho omuutu owumwe, wuno akakora enyaangi ekuru no okuraarika abhaatu bhaaru.

<sup>17</sup> Hano enyaangi yahikiri, akatuma omubhagati waaye kubharaarikwa bhoosi, abhabhuurire, ‘Muuze, ebhigiro bhyoosi bhibheeri!’

<sup>18</sup> “Nawe, abharaarikwa bhoosi bhakabha bharasabha okwaabhirwa. Wo obhutaangi akamubhuurira, ‘Niguriri omuguundu, nireenderwa nigeende kugurora. Nirakusabha oniabhire.’

<sup>19</sup> “Owuundi akabhuga, ‘Niguriri eziing’oombe ikumi zo okurimira, na bhoono nkugya niri kuzisakya, nirakusabha oniabhire.’

<sup>20</sup> “No owuundi akabhuga, ‘Niho nakweera omukari, kweego nitakunagya kuuza.’

<sup>21</sup> “Omubhagati wuyo akakyoora, akamubhuurira omukuru waaye gayo goosi. Niho omukuru wuyo akatiinda, akamubhuurira omubhagati waaye, ‘Nogye bhwaangu kunzira ekuru na kuhizira hya mumugye guno, obhareete abhataka, abharema, amagata na abhahoku.’

<sup>22</sup> “Hasuuhu igo, omubhagati wuyo akakyoora, akamubhuurira, ‘Omukuru, gano ondagenie nigakoriri, hata ego omweeya gukyariho.’

<sup>23</sup> “Omukuru akamubhuurira, ‘Ambe! Nogye igutu yo omugye, kuzinzira zo okugya muziuroobho eziisuuhu na mumiguundu, obhakumiirire abhaatu

bhiize bhasikire mumugye gwaane, tee gwiizure. <sup>24</sup>Nawe, bharya bhoosi bhano naraarikiri kubhutaangi, atariho hata owumwe, wuno ararooto enyaangi yaane!”

### Obhurito bhwo okubha omweega wa Yeesu

(Mataayo 10:37-38)

<sup>25</sup> Yeesu ahaabha aratuniirirwa ne esaango ekuru ya abhaatu. Akiikibhuka, akabhahuurira, <sup>26</sup> “Omuutu wowoosi wuno akuuza owaane atakunagya kubha omwaanamweega waane, abhe ataniseegiri kukira wiise na nina, omukari na abhaana bhaaye, abhahiiri na abhasubhaati bhaaye, na hata obuhoru bhwaaye omweene. <sup>27</sup> No omuutu wowoosi wuno, akyaari kugega omusaraba gwaaye anituniirire, atakunagya kubha omwaanamweega waane.

<sup>28</sup> “Tubhuge owumwe weenyu areende okwoomboka etimu etaambi bhukong’u. Eheene, atakwoomboka akyaari okwiikara, no okwiiseega obhuguri bhwe ebhigiro bhino aroombokere etimu yiyo? Kwo okukora ego, niho araamenye kubha ane eziimbirya zo okwiisa okumara kwoomboka. <sup>29</sup> Atakora ego, aranagya akwoomboka obhurusa, nawe hasuuhu igo atamwe okumariirya etimu. Niho abhahiti bharaamuzeere, <sup>30</sup> bharabhuga, ‘Omuutu wuno akataanga okwoomboka, nawe ataanagirye okurimara erikiindaasi riyo!’

<sup>31</sup> “Niruousye ekireengyo ekiindi. Tubhuge abhatemi bhabhiri bhariibhanura okurwaana. Wo obhutaangi ana abhasirikare ebhikwe ikumi igo, owuundi ebhikwe miroongo ebhiri. Wo obhutaangi atakunagya kugya mwirwaana bhakyaari kwiikara, no okwiiseega kyeego araanyagye okurwaana na wuno ana abhasirikare ebhikwe miroongo ebhiri. <sup>32</sup> Araarore kubha arakirwa, arabhatuma abhabhagati bhaaye, bhagye bhwaangu kumutemi owuundi araabhe kure, bhiigwaane.

<sup>33</sup> “Mbe, kweemwe atariho wuno araanyagye kubha omweega waane, kweego akyaari kutiga ebhigiro bhyoosi bhino anabhyo.

### Mubhe no obhweera kyo omuunyu omuzomu

(Mataayo 5:13; Mariko 9:50)

<sup>34</sup> “Omuunyu ni omuzomu, nawe guraabhe gusarikiri, gutakubha no obhuzoma bhwo omuunyu kweeki. <sup>35</sup> Omuunyu gwe etubho yino, gutakweenderwa, naabhe kumarobha, naabhe kutuumo yo oruse, niho erataaswa kure. Kira omuutu wuno ana amatwi go okwiigwa, yiiteegerere!”

### Obhuzomererwa bhwo okubhona eng’oondy yino ekabhura

(Mataayo 18:12-14)

**15** <sup>1</sup> Kwiibhaga riyo, abhatobhya bhe eriigooti na bhano bhakukora ebhibhi, bhoosi bhahaaza kuYeesu bhamwiiteegerere. <sup>2</sup> Ekagirya Abhafarisayo na abheegya bhe emigiro bhariiriirya kubha, “Omuutu wuno, ndora arabhasuung’ana bhano bhakukora ebhibhi na kweeki ararya nabho!”

<sup>3</sup> Kweego, Yeesu akagaamba ekireengyo, akabhuga, <sup>4</sup> “Tubhuge owumwe weenyu ana amang’oondy igana. Araamenye kubha eyimwe ebhuriri, arakorabhwi? Arazitiga zirya miroongo keenda na keenda mubhuriisya, no okugya kuikomya yirya ebhuriri, tee ayibhone. <sup>5</sup> Hano araayibhone, araisesera kwiibhaga kwo obhuzomererwa, <sup>6</sup> no okuyireeta mumugye. Haya arabhahirikira abhasaani na abhanyarobho bhaaye no okubhabhuurira, ‘Tuzomererwe hamwe, kwo okubha eng’oondy yaane yino ekabhura, niyibhweeni!’

<sup>7</sup> “Nirabhahuurira, niigo ego bhuraabhe obhuzomererwa bhwaaru mwiisaaro, hano we ebhibhi owumwe ate ebhibhi bhaaye. Obhuzomererwa bhuyo bhurabha bhukuru kukira bhurya bhwa abhaatu abhazomu emiroongo keenda na keenda bhano bhatana eng’ana yo okuta ebhibhi.”

### Obhuzomererwa bhwo okubhona orubhira runo rukabhura

<sup>8</sup>Niho akabhuurira ekirengyo akabhuga, “Tubhuge kubha, omukari owumwe ane eziidarakima ikumi,\* na arabhura orubhira rumwe. Atakwaakya etara no okutarikya enyuumba yoosi, araikomya kwo omukya tee ayibhone?

<sup>9</sup>Hano araabhona, arabhirikira abhanyabhaana na abhanyarobho bhaaye no okubhabhuurira, ‘Tuzomererwe hamwe, kwo okubha orubhira runo rukabhura, nirubhweeni!’

<sup>10</sup>“Nirabhabhuurira, niigo ego Taatabhugya arazomererwa embere ya bhamaraika,\* hano we ebhibhi owumwe araate ebhibhi bhaaye.”

### Obhuzomererwa bhwo okukyoora kwo omuri we engabho

<sup>11</sup>Yeesu akoongera okugaamba, “Yaariho omuutu owumwe, ahaabha na abhaana bhabhiri bhe ekisubhe. <sup>12</sup>Omusuuhu, akagya kuwiise akamubhuurira, ‘Taata, niha engabho yaane.’ Kyaamwe, wiise akabhatwaania abhaana bhabhiri obhuniibhi bhaaye.

<sup>13</sup>“Hano zikahita eziisiku suuhu, omusuuhu wurya akakuma ebhigiro bhaaye bhyoosi, akagya orugeendo rwe ekyaaro kya kure. Hano akahika eyo, akataanga kusarya ebhigiro bhaaye kwo okubhira kitamutamu. <sup>14</sup>Hano akamara bhyoosi, ekatuuka enzara haari kukyaaro kirya, woosi akabha araraambuka. <sup>15</sup>Kweego, akagya kumuutu wumwe wa mukyaaro kiyo, akamusabha amwiikirirye abhe omubhagati waaye. Omuutu wuyo, akamutuma agye mumuguundu gwaaye okuriisya eziimbiizi.\* <sup>16</sup>Na hano eziimbiizi zaari kurya amakaanda, akabha ne enaamba yo okugarya omweene, nawe atariho omuutu wuno akamuha kiyo kyoosi kyo okurya.

<sup>17</sup>“Hano akumara, akahituka, akiiseega kubha, ‘Abhabhagati bha taata, ndora bhoosi bhararya, tee bhariiguta no okusaagya! Nawe enye hano, nirakwa kwe enzara. <sup>18</sup>Nirakyoora kutaata no okumubhuurira, “Taata, nimusariirye Taatabhugya na nikusariirye na naawe. <sup>19</sup>Nitakweenderwa kweeki kubhirikirwa omwaana waazo. Kweego, onikore kyo owumwe wa abhabhagati bhaazo.”

<sup>20</sup>“Kyaamwe, omumura wuyo akabhuuka hayo, akakyoora kuwiise. Na hano ahaabha akyaari kure ne enyuumba, wiise akamurora, akamurorera ebhigoongi bhukong’u. Niho, akamuryaarira omwaana waaye, akamuhumbata kwo obhuseegi. <sup>21</sup>Omwaana wuyo, akamubhuurira wiise, ‘Taata, nimusariirye Taatabhugya na nikusariirye na naawe. Nitakweenderwa kweeki kubhirikirwa omwaana waazo.\*”

<sup>22</sup>“Nawe, wiise akabhabhuurira abhahokya bhaaye, ‘Mureete bhwaangu engibho enzomu mumwiibhohye! Mumwiibhohye eseeri kukyaara kyaaye ne ebhikweera kumaguru. <sup>23</sup>Mureete emoori enuru yirya, mugwaage. Turye enyaangi kwo obhuzomererwa, <sup>24</sup>kwo okubha omwaana waane wuno yaari abhuriri, nawe bhoono atuukiri! Ahaabha kya wuno akuuri, na bhoono ni muhoru kweeki!’ Niho bhayo bhoosi bhakataanga kukora enyaangi kwo obhuzomererwa.

\* **15:8 Eziidarakima** ni eziimbira ze Ekiyunaani. Edarakima yimwe yaari ya amariho go orusiku rumwe kumuhokya we emirimo.

\* **15:10 Taatabhugya arazomererwa embere ya bhamaraika** Ekeembo eyiindi eratura kubha bhuriho obhuzomererwa embere wa bhamaraika bha Taatabhugya.

\* **15:15** Abhayahudi bhaaazeera bhukong’u eziimbiizi.

\* **15:21** Amang’ara agaandi ge Ekiyunaani garoongerya kubha *Onikore kyo owumwe wa abhabhagati bhaazo*.

<sup>25</sup>“Eriibhaga riyo, omwaana waaye omukuru ahaabha mumuguundu. Hano yaari kukoora no okwiisuka yiika, akiigwa omubhari na abhaatu bharabhina.

<sup>26</sup>Akabhirikira omubhagati owumwe, akamubhuurya, ‘Mang’anaki gari hayo?’

<sup>27</sup>“Akamubhuurira, ‘Omusuuhu waazo yiiziri, na taata amugwaagiri moori enuru yirya, kwo okubha amubhweeni omwaana waaye kweeki, ari muhoru.’

<sup>28</sup>“Omwaana omukuru wuyo akatiinda, akaanga okusikira munyuumba. Wiise akahuruka habhoori, akabha aramwiisasaama asikire yiika. <sup>29</sup>Omwaana omukuru akamukyoora, ‘Itegeerera! Kumyaaka myaaru nikuhokeerye, na nikyaari kutiga okukwiitegeerera obhuswaagi bhwaazo hata rumwe! Nawe enye, otaniheeri naabhe akabhuri, nigwaage nirye hamwe na abhasaani bhaane. <sup>30</sup>Nawe omwaana waazo wuno asarirye obhuniibhi bhwaazo kubhasimbe, angu hano yiiziri, omugwaagiri ewe ekigeni ekinuru!’

<sup>31</sup>“Wiise akamubhuurira, ‘Omwaana waane, turiikara hamwe eziisiku zoosi, ne ebhigiro bhyoosi bhino ninabhyo ni ebhyaazo. <sup>32</sup>Nawe omusuuhu waazo, tweendiri tumukorere enyaangi no okuzomererwa hamwe, kwo okubha ahaabha abhuriri, nawe bhoono atuukiri, ahaabha kya wuno akuuri, nawe bhoono ni muhoru.’”

### Okwiiriha kubhwiikari bhuno bhukuuzza

**16**<sup>1</sup> Yeesu akabhabhuurira abhaanabheega bhaaye, “Hahaabhaho omuniibhi owumwe no omwiimeerereri waaye. Omwiimeerereri wuyo, arasemwa kubha ahaasarya obhuniibhi bhwo omukuru waaye. <sup>2</sup>Kweego, omuniibhi akamubhirikira omwiimeerereri waaye, akabhuga, ‘Awe! Amabhi gano niigwiiri iguru yaazo, ni amang’anaki gayo? Onierekye ekirengo kye ebhigiro bhyaane, kwo okubha otakunagya kweenderera kubha omwiimeerereri waane!’

<sup>3</sup>“Omwiimeerereri wuyo akiibhuurya, ‘Nikorebhwi bhoono? Omukuru waane, anduusiirye mumirimo. Ntana amanaga go okurima, na nirarora eziisoni okusabhasabha. <sup>4</sup>Ambe! Niriimeeriribhwe emirimo gino, niramanya ryo okukora, okubha eriibhaga eriindi abhaatu bhaaze bhanituruung’aane mumigy gyaabhu.’

<sup>5</sup>“Kweego, omwiimeerereri akabhabhirikira owumwe kwo owumwe wa abhasiiri bhoosi bho omukuru waaye. Akamubhuurya wo obhutaangi, ‘Esiiri yaazo kukukuru waane ni iriinge?’

<sup>6</sup>“Akamukyoora, ‘Esiiri yaane ni amabhibha igana ga amaguta ge emizeituni.’

“Omwiimeerereri akabhuga, ‘Gega enyaarubha rino, rikaamirwe endihi yaazo. Ikara hano, oyikyoorye, ikaame miroongo etaano.’

<sup>7</sup>“Niho akamubhuurya omusiiri wa kabhiri, ‘Awe, endihi yaazo ni hang’anahe?’

“Akamukyoora, ‘Amagonera igana ge engano.’

“Omwiimeerereri wurya akabhuga, ‘Gega enyaarubha rino rye endihi yaazo, yikaame miroongo enaane.’

<sup>8</sup>“Niho wurya omuniibhi akamukumya omwiimeerereri wuyo kwo obhung’eeni bhwaaye, kwo okubha, abhaatu bhe ekyaaro kino bhana amang’eeni go okwiikorera amang’ana gaabhu na abharikyaabhu, kukira abhaatu bho obhweero. <sup>9</sup>Enye nirabhabhuurira, mukorere obhuniibhi bhweenyu bhwa mukyaaro kino mwiibhonere abhasaani, kubha hano murahweerwe obhuniibhi, bhahasuung’aane mubhwiikari bhwa kirakeego.

<sup>10</sup>“Omuutu wuno akubha omuheene kumang’ana amasuuhu, arabha omuheene kumakuru. Egoego, omuutu wuno atari omuheene kumang’ana amasuuhu, atari omuheene kumakuru. <sup>11</sup>Na eraabhe mutabheeri abhaheene kwo okuhokeerya obhuniibhi bhwe ekyaaro kino, ambe etakaturikana okuhaabhwa obhuniibhi bhwe eheene! <sup>12</sup>Na araabhe mutabheeri abhaheene kwo okuhokeerya obhuniibhi bho owuundi, etakaturikana muhaabhwe ebhigiro bhyeenyu abheene! <sup>13</sup>Atariho

omubhagati wuno araanagye okuhokyeerya abhakuru bhabhiri. Araaseege omukuru owumwe no okumuhokeerya bhuzomu, niho aramutindire owuundi no okumuzeera. Kweego, mutakunagya okumuhokeerya Taatabhugya hamwe no obhuniibhi!”

<sup>14</sup> Hano Abhafarisayo bhakiigwa amang’ana gayo ga Yeesu, bhakataanga okumuseka kwo okuzeera, kwo okubha bhakaseega eziimbirya bhukong’u. <sup>15</sup> Yeesu akabhabhuurira, “Emwe muriikora bhe eheene embere ya abhaatu, nawe Taatabhugya amenyiri amang’ana gano gari mumyoyo gyeenyu. Obhuheene, amang’ana gano abhaatu bhakwiisigira bhukong’u, garamutindya Taatabhugya.

### **Ameegyo ge emigiro no obhutemi bhwa Taatabhugya**

*(Mataayo 11:12-13; 5:31-32; Mariko 10:11-12)*

<sup>16</sup> “Emigiro gya Musa, na amakaamo ga abharooti, gaari gariitegeererwa na abhaatu tee kuYohana. Okweemera eriibhaga ryaaye, amang’ana amazomu go obhutemi bhwa Taatabhugya gaari gararwaazirwa, na abhaatu bhoosi bhariiswaagya bhasikire.\* <sup>17</sup> Nawe, ni kunyoohu bhukong’u kwe eriisaaro ne ekyaaro okubhura, kukira orukaamo orusuuhu rwe emigiro okuruusibhwaho.

<sup>18</sup> “Omusubhe akuheebha omukari waaye no okukweera owuundi, atungiiri. Neewe omukweeri wo omukari wuno aheebhirwe no omusubhe waaye, atungiiri.”

### **Omuniibhi na Razaro**

<sup>19</sup> “Ahaabhaho omuniibhi wumwe, akiikara obhwiikari bhuzomu kira orusiku, no okwiibhoha emyeenda emizomu gye ezambarauu gyo obhuguri obhuhaari.

<sup>20</sup> Na mukiseku kyo omuniibhi wuyo, hahaabha no omutaka wumwe, eriina ryaaye Razaro. Razaro wuyo, omubhiri gwaaye gwoosi gukiizura amagaati, <sup>21</sup> na eziimbwa zaari ziraaza kumeesa amagaati gaaye. Hano amasaagyo gaakugwa kurwa mwiigari ryo omuniibhi wuyo, Razaro akabha ane enaamba ahaabhwe, kwo okubha ahiigwa enzara.

<sup>22</sup> “Kubhuteero, omutaka Razaro akakwa. Bhamaraika bhakamuhira mwiisaaro, haguhi na Aburahamu. Omuniibhi wurya woosi akakwa, akabhiikwa. <sup>23</sup> Na hano omuniibhi ahaabha aranyaaka bhukong’u eyo nyaari, akagororokya ameeso, akarora Aburahamu kwa kure, na Razaro yaari haguhi neewe. <sup>24</sup> Akamubhirikira kwiiraka, ‘Taata Aburahamu, ondorere ebhigoongi, niranyaaka bhukong’u mumuriro guno! Omutume Razaro yiize kweenye, atobhye esoonga ye ekyaara mumaanzi, agantonyerye kururimi rwaane runyohe.’

<sup>25</sup> “Nawe, Aburahamu akamukyoora, ‘Omwaana waane, ohiite kubha okabhona amang’ana amazomu mubhwiikari bhwaazo, na Razaro akabhona amabhi. Nawe bhoono, ewe arabhona amazomu, na awe oranyaaka bhukong’u. <sup>26</sup> Hamwe na gayo, gati yeetu na neemwe, guterweho omwoobho omukuru bhukong’u. Ekeembo yo omwoobho ni kubha, bharya bhakweenda kurwa eno okugya oweenyu, bhatanagya okwaambuka, na bhano bhakweenda kurwa eyo okuuza oweetu, bhatanagya.’

<sup>27</sup> “Omuniibhi wuyo akabhuga, ‘Ambe taata, nirakusabha omutume Razaro agye yiika kutaata, <sup>28</sup> abharekye abhahiiri bhaane bhataano, bhataaza kuuza eno kunyaako ehaari.’

<sup>29</sup> “Nawe, Aburahamu akamukyoora, ‘Abhahiiri bhaazo bhana amang’ana gano gakaamirwe no omurooti Musa na abharooti abhaandi. Bhabhiitegeerere bhayo!’

\* **16:16 abhaatu bhoosi bhariiswaagya bhasikire** Ekeembo eyiindi eratura kubha *abhaatu bhoosi bhariisikirya kwa nguru.*

<sup>30</sup>“Akamukyoora, ‘Zeyi, taata Aburahamu! Nawe eraabhe omuutu arweere mubhaku abhagyeku, niho bhariikyoore no okuta ebhibhi bhyaabhu.’”

<sup>31</sup>“Aburahamu akamubhuurira, ‘Abhahiiri bhaazo bhayo, abhe bhatiitegeererer gano gakaamirwe na Musa na abharooti, bhatakwiikirirya naabhe omuutu yaangaryokiri kurwa mubhaku.’”

### **Ameegyo iguru ye ebhisigo no okwaabhira**

(Mataayo 18:6-7, 21-22; Mariko 9:42)

**17**<sup>1</sup> Yeesu akabhabhuurira abhaanabheega bhaaye, “Ebhisigo bhino bhiraakore abhaatu bhakore ebhibhi, bhirabhaho kyoomeera. Nawe, araaza kurora omuutu wurya araagakore! <sup>2</sup>Yiingabheeri hakiriku kumuutu wuyo abhoherwe orubhwe mwiigoti, na ataaswe munyaanza, kukira amabhi gano araabhone wuno akumukora owumwe wa abhasuuu bhano akore ebhibhi. <sup>3</sup>Kweego, mwirihe mutaaza kukora ego!

“Kweego, omuhiiri waazo araa kusariye, omuhinye, na ate ebhibhi bhwaaye, omwaabhire. <sup>4</sup>Naabhe araa kusariye muhuungati koosi kurusiku orumwe, na niigo araa kyooore owaazo muhuungati kweeki abhughe, ‘Niteeri ebhibhi,’ omwaabhire!”

### **Obhwiikirirya**

<sup>5</sup>Niho abheega bhayo bhakamubhuurira Omukuru Yeesu, “Turasabha otwoongererye obhwiikirirya bhweetu!”

<sup>6</sup>Akabhakyooora, “Nawe muungabheeri no obhwiikirirya bhusuuu kya bhwe eheke suuhu bhukong’u,\* muungabhuuriiri omuti gwo omuko guno, ‘Ihika weemibhwe munyaanza!’ nagwe guungabhitegeererer.

### **Emirimo gyo omubhagati**

<sup>7</sup>“Tubhughe owumwe weenyu ano omubhagati wuno akurima kasi ararisya eziing’oindu. Omubhagati wuyo araa kyooore mumugye, omukuru waaye we emirimo akore bhwaangu amubhuurire, ‘Haguhu ebhyaakurya?’ <sup>8</sup>Zeyi! Aramubhuurira, ‘Onikorere ebhyaakurya, na wibhanure okunihokeerya tee, nimare kurya no okunywa. Niho awe oraarye no okunywa.’ <sup>9</sup>Ambe, omubhagati araa gakore gano omukuru waaye akamuragania, omukuru wuyo aramubhuurira ozomirye kwo okugakora? Zeyi!

<sup>10</sup>“Niigo ego na neemwe, hano mukwiigwa amaragiriro gaani goosi, mubhughe, ‘Twoosi ni abhabhagati igo. Tukoriri kyeego tukeenderwa.’”

### **Yeesu ahorirye bhe ebhigeenge ikumi**

<sup>11</sup>Hano Yeesu yaari kugya Yerusaremu, akahita kumiimbi gatigati ye ebhyaaro bhya Samaria na Gariraaya. <sup>12</sup>Orusiku rumwe, akasikira muroobho yimwe, akasikana na abhaatu bhe ebhigeenge ikumi. Bhe ebhigeenge bhayo bhakiimeerera kure neewe, <sup>13</sup>bhakatiirya eriiraka bharabhuga, “Taata Yeesu! Otororere ebhigoongi, otuhorye!”

<sup>14</sup>Yeesu akabharora, akabhabhuurira, “Mugeende mwiiyeerekye kubhaseengeri.” Bakagya, na hano bhaari munzira, bhakahoribhwa.

<sup>15</sup>Owumwe waabhu, hano akarora kubha amariri kuhoribhwa, rugeendo rumwe akakyooora kuYeesu, aramukumya Taatabhugya kwiiraka ikuru. <sup>16</sup>Hano akahika, akiitaasa bhubhuumari embere wa amaguru ga Yeesu, aramubhuurira ozomirye. Na omuutu wuyo, ahaabha Omusamaria.

\* 17:6 *Etetere esuuu bhukong’u* ku Kiyunaani ni *tetere ye eharadari*.



<sup>17</sup> Yeesu akabhuga, “Ndora nikahorya abhaatu ikumi! Keenda bharya bhaari hayi? <sup>18</sup> Batariho bhano bhakyooriri kumukumya Taatabhugya, nawe ni omugya wuno emweene?” <sup>19</sup> Kweego, Yeesu akamubhuurira, “Imeerera noogye owaazo, otuuriibhwe no obhwiikirira bhwaazo.”

### Okwiirihya okuhaari iguru ya obhutini bhwe ekiina bhuno bhukuuz

(Mataayo 24:23-28, 37-41)

<sup>20</sup> Orusiku rumwe, Abhafarisayo bhakamubhuurira Yeesu, “Obhutemi bhwa Taatabhugya, bhuraaza ryoori?”

Yeesu akabhakyoora, “Obhuuzi bhwo obhutemi bhwa Taatabhugya, bhutari ekireengyo kino kikurorekana kwa ameeso. <sup>21</sup> Abhaatu bhatakunagya kubhuga, ‘Murore! Buri hano!’ kasi, ‘Murore! Buri harya!’ Mumenye kubha obhutemi bhwa Taatabhugya bhuri gati weenyu.”

<sup>22</sup> Niho Yeesu akabhuurira abheega bhaaye, “Kuziisiku zino zikuuza, mune enaamba okurora naabhe orusiku rumwe, rubhe orusiku rwe enye Omwaana wo Omuutu nikubha niraakaangata ekyaro, na mutakururora. <sup>23</sup> Abhaatu bharabhabhuurira, ‘Murore! Wurya harya!’ kasi ‘Murore! Wuno hano!’ Nawe abhaatu bhayo, mutabharyaarira. <sup>24</sup> Gayo nibhabhuuriiri kwo okubha, enye Omwaana wo Omuutu niraakyoore, niraaza kyo orumesyo runo rukumesya mbaara zoosi ze eriisaaro. <sup>25</sup> Nawe, hano gakubha gakyari kutuuka, niho enye Omwaana wo Omuutu niraabhone enyaako bhukong’u no okwaangwa na abhaatu bho orwiibhuro runo.

<sup>26</sup> “Kyeego ehaabha kuziisiku zya Nuhu, niigo ekubha kuziisiku zye enye Omwaana wo Omuutu. <sup>27</sup> Abhaatu bhaari bhararya no okunywa, bharakweera no okukweerwa, kuziisiku zya Nuhu, tee orusiku rurya Nuhu akasikira musafina.\* Hayo, omusabhuko gwe embura gukaaza, gukabhasikya bhayo bhoosi.

<sup>28</sup> “Kyeego yaari kuziisiku za Roti, niigo ego amang’ana garaabhe kuziisiku zye enye Omwaana wo Omuutu. Abhaatu bhaari bhararya no okunywa, bharagura no okusuruzya, bhararima no okwoomboka.\* <sup>29</sup> Nawe orusiku rurya hano Roti akarwa Sodoma, omuriro omuhaari gwe ekibhiriiti gukiika kurwa mwiisaaro, gukabhasikya bhayo bhoosi.

<sup>30</sup> “Kweego niigo eraabhe orusiku runo enye Omwaana wo Omuutu niraakuundukurwe. <sup>31</sup> Orusiku ruyo, omuutu wuyo woosi aribha iguru ye ekisara kye enyuumba yaaye, ne ebhigiro bhyaaye bhiri munyuumba, atituma kubhigega, aryare ego. Na wuno araabhe mumuguundu, atakyoora yiika kugega kyokyoosi. <sup>32</sup> Muhiite gano gaambhweeni omukari wa Roti!\* <sup>33</sup> Omuutu wowoosi wuno akusakya okuriibha obhwiikari bhwaaye niwe araabhubhurye, no omuutu wuno araabhubhurye, niwe araabhuturye.

<sup>34</sup> “Nirabhabhuurira kubha, obhutiku bhuyo, abhaatu bhabhiri bharabha bhahiindiiri kubhuriri bhumwe, owumwe aragegwa no owuundi aratigwa. <sup>35</sup> Orusiku ruyo, abhakari bhabhiri bharabha bharasya hamwe, owumwe aragegwa no owuundi aratigwa. [<sup>36</sup> Kweeki abhasubhe bhabhiri, bharabha bharakora emirimo mumuguundu, owumwe arahirwa no owuundi aratigwa.]”

<sup>37</sup> Abheega bhakamubhuurira, “Omukuru Yeesu, gayo garakorwa hayi?”

\* 17:27 *Esafina* ni kye emeeri, kasi obhwaato obhukuru.

\* 17:28 Rora eriing’ana rya Roti mukitabhu kya Mwanzo 19.

\* 17:32 Taatabhugya akamuhiinya *omukari wa Roti*, kwo okubha omukari wuyo akabha ne enaamba yo okukyoora Sodoma, omugye guno Taatabhugya ahaabha agutiniiri ekiina no okusikya. Rora Mwanzo 19:26.

Akabhakyooru, “Hano mukurora amatoonyi gariikumira ahagiyo, muramenya kubha ekituundu kiri hayo, na niigo mukurora ekitiika kiyo mumenye kubha orusiku ruyo ruhikiri.”

### Mutaniha okumusabha Taatabhugya

**18**<sup>1</sup> Yeesu akabhabhuurira abhaanabheega bhaaye ekireengyo kino, kubheerekyu kubha ereenderwa kumusabha Taatabhugya bhataaza kuniha. <sup>2</sup> Akabhabhuurira, “Kumugye gumwe, hahaabha na omutini we ekiina owumwe, ewe ataari kumwiigwa Taatabhugya, naabhe okumuseega omuutu wowoosi. <sup>3</sup> Na kumugye guyo, yaariho omutuumba owumwe. Neewe ahaabha aramugyaku omutini we ekiina kirakeego kumwiisasaama, akamubhuurira, ‘Nirasabha onitanie kwe eheene enye no omubhisa waane.’

<sup>4</sup> “Kwiibhaga itaambi, omutini we ekiina wuyo akaanga okumusakirya omutuumba. Nawe kubhuteero, akiigaambira mukoro yaaye, ‘Enye nitakumwiigwa Taatabhugya, naabhe nitakumuseega omuutu wowoosi. <sup>5</sup> Nawe, kwo okubha omutuumba wuno araninyaakya bhukong’u, bhoono niramutania kwo obhuheene, okubha ateenderera okunirosya kwo okunizaku!”

<sup>6</sup> Niho, Omukuru Yeesu akabhuga, “Tweege bhwaheene ekireengyo kyo omutini we ekiina omuzabhuri wuyo, naabhe ewe kubhuteero akatina ekiina bhwaheene. <sup>7</sup> Eraabhe niigo, erabhabhwi ku Taatabhugya, atakubhasakirya abhasorwa bhaaye bharya yaasoriri, bhano bhakumuririra obhutiku no omwiisi? Tubhugye kubha arakeezera kubhasakirya? <sup>8</sup> Nirabhabhuurira, arabhatinira bhwaangu ekiina kwe eheene. Nawe heene, hano enye Omwaana wo Omuutu niraakyoore mukyaaro, nirabhona abhaatu bhakyaari no obhwiikirirya?”

### Ekireengyo kyo Omufarisayo no omutobhya we eriigooti

<sup>9</sup> Kweeki Yeesu akarusya ekireengyo kubhaatu abhaandi, bhano bhakiirora kubha nibho bhe eheene embere ya Taatabhugya, no okubhazeera abhaandi. Akabhuga, <sup>10</sup> “Abhaatu bhabhiri, bhakagya kuseengera mwiiseengerero rye Emuungu. Owumwe yaari Omufarisayo, no owuundi yaari omutobhya we eriigooti.

<sup>11</sup> “Omufarisayo wuyo akiimeerera, amuseengere Taatabhugya iguru ya amang’ana gaaye omweene, ‘Weyaa Taatabhugya, nirabhuga ozomirye, kwo okubha enye nitari omubhi kya abhaandi, abhasoohu, abhabheehi, na abhaseebheeti, naabhe kyo omutobhya we eriigooti wuyo! <sup>12</sup> Niriisiitya ebhyaakurya kabhiri kubhutuuro, na kuzimbirya zyani zoosi, nirakuruusirya yimwe kwikumi ye ebhigiro bhaane.’

<sup>13</sup> “Nawe omutobhya we eriigooti wuyo, akiimeerera kure hasuuu. Na ateendiri naabhe kugorokya ameeso gaaye mwiisaaro, niho akabha ariitematema mukikubha kyaaye kwe ebhigoongi, arabhuga, “Taatabhugya, ondorere ebhigoongi, enye ni we ebhibhi!”

<sup>14</sup> Niho Yeesu akoongera amang’ana gayo, “Nirabhabhuurira kubha, omutobhya we eriigooti wuyo akakyoora mumugye, yaabhirwe na Taatabhugya. Nawe owuundi ewe zeyi! Na kira omuutu wuno akwiigega, Taatabhugya aramwiikya iyaasi. Na kira wuno akwiyiikya iyaasi, Taatabhugya aramutiirya.”

### Yeesu arabhatweera ebhite abhaana abhasuuu

*(Mataayo 19:13-15; Mariko 10:13-16)*

<sup>15</sup> Eriibhaga eriindi, abhaatu bhakamureetera Yeesu naabhe abhaana bhaabhu abhasuuu, kubha abhatuurire amabhoko gaaye na abhatweere ebhite. Hano abheega bhaaye bhakarora ego, bhakataanga kubharekyu abhibhuri. <sup>16</sup> Nawe,

Yeesu akabhabhirikira abhaana bhayo kweewe, akabhuga, “Mubhatige abhaana abhasuuhi bhiize owaane, mutaaza kubharekya, kwo okubha abhaatu kya bhano, nibho abhaatu bho obhutemi bhwa Taatabhugya. <sup>17</sup> Nirabhabhuurira obhuheene, omuutu wowoosi wuno atakuturuung’ana obhutemi bhwa Taatabhugya kyeego omwaana omusuuhu akubhuturuung’ana,\* atakubhusikira kweeki.”

### Omukaangati omuniibhi aramubhuurya Yeesu

(Mataayo 19:16-30; Mariko 10:17-31)

<sup>18</sup> Omukaangati owumwe wa Abhayahudi, akamubhuurya Yeesu, “Omweegya omuzomu, nikorebhwi, niize nibhone obhuhoru bhwa kirakeego?”

<sup>19</sup> Yeesu akamubhuurira, “Ndora orambirikira omuzomu? Atariho omuutu wowoosi omuzomu, nawe Taatabhugya omweene ego! <sup>20</sup> Awe, omenyiri bhuzomu emigiro gya Taatabhugya, ‘Otabha museebheeti, otiita, otiibha, otagaamba orurimi, obhasuuke wuuso na nyoko weenyu.\*”

<sup>21</sup> Omukaangati akamukyoora, “Emigiro gino gyoosi, nigigwaatiri okurwa obhwaana bhwaane.”

<sup>22</sup> Hano Yeesu akiigwa gayo, akamubhuurira, “Oreenderwa okore eng’ana yimwe ego. Ebhigiro bhyoosi bhino onabhyo, noogye obhigurye. Ne eziimbirya zino oraabhone, obhatwaanire abhataka, niho oraabhe ne ekibhuumbiko mwiisaaro. Na hano okumara, wuuze onituniirire.” <sup>23</sup> Hano omukaangati wuyo akiigwa gayo, akiitiimaata, kwo okubha yaari muniibhi bhukong’u.

<sup>24</sup> Hano Yeesu akamurora yitiimatiri ego, akabhuga, “Ni kukong’u ku abhaniibhi okusikira mubhutemi bhwa Taatabhugya! <sup>25</sup> Ni kunyoohu bhukong’u kwe engamia kuhita mukibhaanga kyo orugera, kukira omuniibhi kusikira mubhutemi bhwa Taatabhugya!”\*

<sup>26</sup> Abhaatu bhano bhakiigwa gayo, bhakabhuga, “Bhoono, ni weewi wuno araanagye okutuuribhwa?”

<sup>27</sup> Yeesu akabhabhuurira, “Amang’ana gano gatakuturikana kubhaatu, ku Taatabhugya garaturikana.”

<sup>28</sup> Niho, Petero akamubhuurira Yeesu, “Rora etwe, tumariri kutiga bhyoosi, tukakutuniirira!”

<sup>29</sup> Yeesu akabhuga, “Nirabhabhuurira obhuheene, kira omuutu wuno atigiri enyuumba, hamwe omukari waaye, hamwe abahiiri bhaaye, hamwe abhiibhuri bhaaye, hamwe abhaana bhaaye, kwiiguru yo obhutemi bhwa Taatabhugya, <sup>30</sup> eheene araturuung’ana maaru bhukong’u kukira bhino akatiga, araabhe akyaari mukyaaro hano. Kweeki, na kukyaaro kino kikuuzza, arabhona obhuhoru bhwa kirakeego.”

### Yeesu araroota oruku rwaaye no okuryooka kwaaye

(Mataayo 20:17-19; Mariko 10:32-34)

<sup>31</sup> Yeesu akakumana abheega bhaaye ikumi na bhabhiri embarika, akabhabhuurira, “Mwiitegerere! Turagya Yerusaremu, na eyo gano goosi abharooti bhaakaamiri iguru ya Omwaana wa Omuutu, garakorwa. <sup>32</sup> Aragazibhwa kubhaatu bhano bhatairi Abhayahudi, bhano bharaamunyaakye no okumutuka,

\* **18:17** Ekigirye ekiindi kiratura kubha omuutu wowoosi wuno atakwiikirirya okukaangati bhwa na Taatabhugya kyeego omwaana omusuuhu akwiikirirya obhukaangati, atakubhusikira kweeki obhutemi bhwa Taatabhugya.

\* **18:20** Kutoka 20:12-16, Kumbukumbu la Torati 5:16-20

\* **18:25** Ni kukong’u kwo omuutu wuno ane ebhigiro bhaaru mukyaaro muno okubhitiga no okumwiikirirya Taatabhugya, na niigo ego ne etyeenyi ekuru etakunagya kuhita mukibhanga kyo orugera.

bharamutweera amate. <sup>33</sup> Kweeki, bharamutema eziityaanya no okumwiita, nawe orusiku rwa katatu, araryoka.”

<sup>34</sup> Nawe amang’ana gano Yeesu akabhabhuurira abheega bhaaye, bhataamenyiri kwo okubha gaari gabhisirwe kweebho, neebho bhataamenyiri yaari arakeereneryaki.

### Yeesu aramuhorya omuhoku haguhi na Yeriko

(Mataayo 20:29-34; Mariko 10:46-52)

<sup>35</sup> Yeesu ahaabha ariisukira omugye gwa Yeriko, na orubhaara rwe enzira, yaari ariho omuhoku owumwe, ewe ahaabha yikeeri arasabhasabha. <sup>36</sup> Hano akiigwa abhaatu bhaaru bharahita hayo, akabhuurya, “Niki kiriiyo?”

<sup>37</sup> Bhakamubhuurira, “Yeesu wa Nazareeti arahita.”

<sup>38</sup> Rugeendo rumwe, akamwaaya kwiiraka, arabhuga, “Yeesu, we ekisyooko kya Daudi,\* ondere ebhigoongi!” <sup>39</sup> Abhaatu bhano bhabhakaangatiri Yeesu bhaari bharamurekya kubha akire. Nawe ewe, akoongera okumwaaya kwiiraka aramubhirikira, “We ekisyooko kya Daudi, ondere ebhigoongi!”

<sup>40</sup> Hano Yeesu akiigwa eriiraka ryo omuhoku wuyo, akiimeerera, akaswaagya bhamureete kweenye. Hano omuhoku akiisuka, Yeesu akamubhuurya, <sup>41</sup> “Oreenda nikukoreke?”

Akabhuga, “Omukuru Yeesu, nirasabha okurora!”

<sup>42</sup> Yeesu akamubhuurira, “Orore! Otuuriibhwe no obhwiikirirya bhwaazo.”

<sup>43</sup> Rugeendo rumwe, akarora, akamutuniirira Yeesu, eno aramukumya Taatabhugya. Na abhaatu bhoosi, hano bhakarora gayo, bhakataanga okumukumya Taatabhugya.

### Yeesu aramutuurya Zakayo, omukori we ebhibhi

**19** <sup>1</sup> Yeesu akasikira mumugye gwa Yeriko, akabha arahita gatigati yo omugye. <sup>2</sup> Mumugye guyo, yaari arimu omuniibhi wumwe, eriina ryaaye Zakayo, ewe ahaabha omukuru wa abhatobhya bhe eriigooti. <sup>3</sup> Yaari areenda kurora Yeesu ni omuutu wa tubho eki, nawe atanagirye kumurora, kwo okubha esaango ya abhaatu yaari ni kuru, neewe ni muguhi. <sup>4</sup> Kweego akaryaara bhwaangu, akagya embere we esaango yiyo, akatiira omuti gwo omuko, kubha anagye kumurora Yeesu arahita enzira yiyo.

<sup>5</sup> Hano Yeesu yahikiri hayo, akiisuunza kumuti iguru, akabhuga, “Zakayo, ituma bhwaangu! Nireenderwa nibhe omugini mumugye gwaazo reero.”

<sup>6</sup> Rugeendo rumwe Zakayo akiituma, akamuginihya Yeesu mumugye gwaaye kwo obhuzomererwa.

<sup>7</sup> Abhaatu bhoosi, hano bhakarora gayo, bhakataanga kwiiririirirya, bharabhuga, “Ndora agiri kurya no omukori we ebhibhi!”

<sup>8</sup> Nawe, Zakayo akiimeerera akamubhuurira, “Itegeerera, Omukuru Yeesu! Bhoono ego, eriitinka rye ebhigiro bhyaane nirabhaha abhataka. Na eraabhe nimuruusirye omuutu wowoosi, niramukyoorerya mara kane.”

<sup>9</sup> Yeesu akabhuga, “Reero yino, obhutuurya bhuhikiri abhaatu bhe enyuumba yino. Omuutu wuno woosi, bhoono ni we ekisyooko kya Aburahamu, <sup>10</sup> kwo okubha enye Omwaana wo Omuutu niiziri kumoohya abhaatu bhano bhabhuriri.”

\* **18:38** Ekarootwa kubha omuutu kurwa mukisyooko kyo omutemi Daudi araaza kubha omukaangati, ewe ni Masiya. Rora 2 Samweli 7:12-13.

## Ekireengyo kya abhahokya bhano bhakahaabhwa eziimbirya

(Mataayo 25:14-30)

<sup>11</sup> Hano abhaatu bhaari bhariitegeerera amang'ana gayo, Yeesu akeenderera kugaamba ekireengyo kimwe, kwo okubha ahaabha ariisukira Yerusaremu, na abhaatu bhayo bhakiiseega kubha, obhutemi bhwa Taatabhugya bhurabhoneka kwiibhaga riyo riyo. <sup>12</sup> Kweego, akabhuga, "Yaari ariho omuutu owumwe we ekisyooko kyo obhutemi. Omuutu wuyo, akagya orugeendo kukyaaro kya kure, kubha ahaabhwe obhukaangati bhwo okubha omutemi, kimwe akyoore kukaangata ekyaaro kyaaye.

<sup>13</sup> "Hano ya akyaari kugya, akabhabhirikira abhabhagati bhaaye ikumi gati ya abhaandi, akabhaha kira owumwe eriigazo ikuru rye eziimbirya,\* akabhabhuurira, 'Mukore obhurusuzya bhwe eziimbirya zino tee hano niraakyoore.'

<sup>14</sup> "Nawe abhaatu bhe ekyaaro kyaaye bhakamutiindira bhukong'u. Bhakatuma abhaatu bhamutuniire no okuhira amang'ana, bharabhuga 'Tutakumweenda omuutu wuno abhe omutemi weetu!' <sup>15</sup> Hata ego, akahaabhwa obhukaangati bhwo obhutemi. Hano yakyooriri, omutemi akabhabhirikira abhabhagati bharya akabhahaana eziimbirya, kubha kira omubhagati amubhuurire omutemi abhweeni bhweera eki.

<sup>16</sup> "Omubhagati wo obhutaangi akahika, akamubhuurira, 'Omutemi, kukirana ne eziimbirya ziry zino wantigiiri, nibhweeni obhweera bhwi ikumi bhukong'u.'

<sup>17</sup> "Omutemi wuyo akamubhuurira, 'Omubhagati waane omuzomu, okoriri bhuzomu! Kya bhurya waari omuheene kumahokya amasuuhu bhukong'u, nirakuha obhuturo iguru ye emigye ikumi.'

<sup>18</sup> "Omubhagati wa kabhiri woosi akahika, akamubhuurira, 'Omutemi, kuriing'aana ne eziimbirya zino wantigiiri, nibhweeni obhweera bhwi isaano bhukong'u.'

<sup>19</sup> "Omutemi akamubhuurira, 'Woosi, nirakuha obhuturo iguru ye emigye etaano.'

<sup>20</sup> "Omubhagati owuundi akahika, akabhuga, 'Omutemi, eziimbirya zaazo nzino hano, nikazibhisa kumweenda, zitaaza kubhura. <sup>21</sup> Nikakora ego kwo okubha nirakwoobhoha, awe ni omuutu omuhaari, oragega gano otagateriho, na oragesa gano otemirye.'

<sup>22</sup> "Omutemi akamubhuurira, 'Omubhagati omubhi ori! Bhoono nirakutinira ekiina kumang'ana gaazo omweene. Ti ogaambiri omenyiri kubha enye ni omuutu omuhaari, niragega garya nitagateriho, na niragesa gano niteemirye? <sup>23</sup> Eraabhe niigo, bhoono kwaki otanibhiikiri eziimbirya zyani kubhasuruza, kubha nizigege hamwe no obhweera bhwaku hano naari kukyoora owaane?'

<sup>24</sup> "Rugeendo rumwe, akabhabhuurira abhaatu bhano bhaari bhiimeereeri hayo, 'Mugege eziimbirya zya wuyo, mumuhe wurya akabhona obhweera bhwi ikumi.'

<sup>25</sup> "Bhakamubhuurira, 'Nawe omutemi, ndora wuno abhweeni ikumi!'

<sup>26</sup> "Akabhuga, 'Nirabhabhuurira kubha, omuutu wuno akuhokeerya bhuzomu kino anakyo, aroongeribhwa ebhiindi. Nawe, omuutu wuno atakuhokeerya kino anakyo, naabhe kirya anakyo ararusibhwa. <sup>27</sup> Nawe abhabhisa bhaane bhano bhateendiri enye nibhe omutemi waabhu, mubhareete hano, mubhiite embere waane!'"

\* 19:13 Eriigazo ikuru rye eziimbirya Ekiyunaani kirabhuga akabhaha mina kira owumwe, yino yaari ni amariho go omubhagati kumyeeri etatu kuziisiku ziry.

## Yeesu araturuung'aanwa Yerusaremu kya Masiya

(Mataayo 21:1-11; Mariko 11:1-11; Yohana 12:12-19)

<sup>28</sup> Hano Yeesu yamariri kugaamba gayo, akeenderera no orugeendo rwaaye rwo okugya Yerusaremu. <sup>29</sup> Hano yiisukiri eziroobho zya Betifage na Betania, kukiguru kino kikubhirikirwa ekiguru kye Emizeituni, yaari na abhaanabheega bhaaye. Niho akabhatuma abheega bhaaye bhabhiri embere, <sup>30</sup> akabhabhuurira, “Mugeende kuroobho yino eri embere weenyu. Na hano muraasikire muyo, murabhona omwaana we etikiri abhohirwe, wuno akyaari kutirwaku no omuutu. Mumutazure, mumureete hano. <sup>31</sup> No omuutu ariibhabhuurya, ‘Ndora muramutazura?’ Mumubhuurire, ‘Omukuru Yeesu aramweenda.’”

<sup>32</sup> Kimwe, abheega bhayo bhakagya, bhakabhona bhyoosi kyaabhurya Yeesu yabhabhuuriiri. <sup>33</sup> Hano bhaari bharamutazura omwaana we etikiri, bheene etikiri bhakabhabhuurya, “Ndora muratazura omwaana we etikiri wuyo?”

<sup>34</sup> Bhakabhabhuurira, “Omukuru Yeesu aramweenda.” <sup>35</sup> Bakamuhirira Yeesu etikiri yirya, bhakaarya emyeenda gyaabhu iguru yaku, kimwe bhakamutiirya Yeesu, akagya.\*

<sup>36</sup> Hano Yeesu ahaabha aragya, abhaatu bhakaarya emyeenda gyaabhu munzira kwo okumusuuka. <sup>37</sup> Na hano yiisukiri ahagiro he ekihiringito kye ekiguru kye Emizeituni, esaango yoosi ya abhaanabheega bhaaye bhakataanga kumukumya Taatabhugya kwo obhuzomererwa, iguru ye ebhitiika bhyoosi bhino bharuuzi. Bhakatiirya eriiraka ryaabhu, <sup>38</sup> bhakabha bharabhuga,

“Aguungibhwe omutemi wuno akuuza kuriina ryo Omukuru, turamukumya!”

Habhe no omureembe gati ya Taatabhugya na abhaatu bhaaye!

Turamukumya Taatabhugya wuno ari iguru ya bhyoosi!”

<sup>39</sup> Kusaango yiyo, bhaabharimu Abhafarisayo. Neebho, bhakamubhuurira Yeesu, “Omweegya, obhatumanie abhaanabheega bhaazo bhatagaamba gayo!”

<sup>40</sup> Yeesu akabhuga, “Nirabhabhuurira kubha, eraabhe bhano bharaakire, eheene amagina garatiirya eriiraka!”

## Yeesu akaririra Yerusaremu

<sup>41</sup> Hano Yeesu yiisukiriri omugye gwa Yerusaremu no okugurora, akataanga okuguririra. <sup>42</sup> Akabhuga, “Ningeendiri reero yino kubha omenye enzira yo okureeta omureembe! Nawe bhoono otakunagya kumenya. <sup>43</sup> Kuziisiku zino zikuuza, abhabhisa bhaazo bharakwiinarirya enyiki ekong’u yo okukurwaania kurwa eziimbaara zoosi. <sup>44</sup> Kubhuteero, bharakwaatirya haasi awe na abhaatu bhaazo bhoosi. Ritariho eriigina rino riraasage iguru ye eriindi, kwo okubha hano Taatabhugya akakureetera obhutuurya, otabhumenyeeekereerye!”

## Yeesu araaheebha abhasuruzya murubhago rwe enyuumba ya Taatabhugya

(Mataayo 21:12-17; Mariko 11:15-19; Yohana 2:13-22)

<sup>45</sup> Yeesu akasikira mwiigoobhe rye enyuumba ya Taatabhugya, akataanga okuheebha abhaatu bhano bhaari bhakugurya ebhigiro muyo. <sup>46</sup> Akabhabhuurira, “Ekaamirwe mumakaamo ga Taatabhugya, ‘Enyuumba yaane erabha enyuumba ya amasabhi.’\* Nawe emwe, muyikoriri kubha eriibhigi rya abhibhi.”\*

\* 19:35 Zakaria 9:9

\* 19:38 Zaburi 118:26

\* 19:46 Isaya 56:7

\* 19:46 Yeremia 7:11

<sup>47</sup> Kira orusiku, Yeesu ahaabha areegya abhaatu mwiigoobhe rye enyuumba ya Taatabhugya. Abhakuru bha abhaseengeri, hamwe na abheegya bhe emigiro na abhakaruka bha Abhayahudi, bhaari bharamohya enzira yo okumwiita, <sup>48</sup> nawe bhataabhweeni omweeya, kwo okubha abhaatu bhoosi bhaari bhariitegerera amang'ana gaaye kwo obhwiitegereri bhwaaru.

### Yeesu arabhuuribhwa iguru yo obhuturo bhwaaye

(Mataayo 21:23-27; Mariko 11:27-33)

**20** <sup>1</sup> Yeesu ahaabha mwiigoobhe rye enyuumba ya Taatabhugya, areegya abhaatu na kubharwaazira amang'ana amazomu ga Taatabhugya. Orusiku rumwe, abhaseengeri abhakuru, abheegya bhe emigiro na abhakaruka bha Abhayahudi bhakamuuzaku, <sup>2</sup> bhakamubhuurya, “Garya okoriri, oragakora kwo obhuturoki? Ni weewi akakuha obhuturo bhuno?”

<sup>3</sup> Akabhabhuurira, “Enye woosi nirabhabhuurya eriibhuuryo. Mumbuurire, <sup>4</sup> obhuturo bhwa Yohana bhwo okubatiiza bhukarweera ku Taatabhugya kasi kubhaatu?”

<sup>5</sup> Hayo, bhahaakeerenia abheene bharabhuga, “Turaabhuge kubha Taatabhugya akamutuma Yohana okubhuurania, arabhuga, ‘Ambe! Ndora mutamwiikirirye?’

<sup>6</sup> Na turaamukyoore kubha obhuturo bhwaaye bhurwiiri kubhaatu, ambe abhaatu bhoosi bharatutema amagina, kwo okubha bhariikirirya kubha Yohana ahaabha omurooti.” <sup>7</sup> Kweego, bhakamubhuurira, “Tutamenyiri obhuturo bhwaaye bhukarweera hayi.”

<sup>8</sup> Yeesu akabhabhuurira, “Hata enye, nitakubhabhuurira ni ku ubhunagyaki nirakora gano.”

### Ekireengyo kya abhamenyi abhabhi

(Mataayo 21:33-46; Mariko 12:1-12)

<sup>9</sup> Niho, Yeesu kubhabhuurira abhaatu ekireengyo kino. Akabhuga, “Yaari ariho omuutu wumwe, akeemya emizabibu mumuguundu gwaaye,\* akabhaha abharimi bhaguriibhe. Ewe, akagya orugeendo kukyaaro kya kure, akamara eyo eziisiku nzaru. <sup>10</sup> Na hano eziisiku zyo okugesa ziyahikiri akamutuma omubhagati waaye kubharimi bhayo, kubha bhamuhaane esoondo ya amagesa, akyoore nago kumukuru waaye. Nawe, hano omubhagati akahika, abharimi bhayo bhakamutema, bhakamuheebha mabhoko bhusa.

<sup>11</sup> “Mweene muguundu, akamutuma omubhagati owuundi. Nawe woosi bhakamutema no okumukorera obhubhi bhukong’u, kimwe bhakamuheebha mabhoko bhusa. <sup>12</sup> Akamutuma omubhagati wa katatu. Wuyo woosi bhakamunyaahara, bhakamuheebha.

<sup>13</sup> “Mubhuteero, mweene muguundu akabhuga, ‘Bhoono, nikorebhwii!’ Orugeendo runo, niramutuma omwaana waane omuseegwa! Hamwe, bharamwiitegerera ewe.’

<sup>14</sup> “Nawe, hano abharimi bhamuruuzi, bhakagaambana, ‘Wuno niwe omugabhi we ebhigiro bhya wiise. Tumwiite, engabho yaaye ebhe eyetu.’ <sup>15</sup> Kimwe, bhakamuruusya mumuguundu, bhakamwiita.”

Niho Yeesu akabhabhuurya, “Bhoono, mweene muguundu wuyo arabhakorabhwii abharimi bhayo? <sup>16</sup> Araaze no okubhiita, no omuguundu guyo, arabhaha abhaandi!”

Hano abhaatu bhakiigwa amang'ana gayo, bhakabhuga, “Gayo gatatuuka kweeki!”

\* 20:9 Omuguundu gwe emizabibu guriimeererera abhaatu bha Iziraeri. Rora Isaya 5:1-7.

<sup>17</sup> Yeesu akabhamogorera, akabhabhuurya, “Bhoono mbe! Amakaamo gano gana kemboki?

‘Eriigina rino abhoomboki bhakaryaanga, niryo ribheeri eriigina eriikuru ryo obhurusa.’\*

<sup>18</sup> “Omuutu wowoosi araaawe iguru ya eriigina riyo, arabhunika bhitinikatinika, na riraamugweere omuutu, riramusinda bhubhi.”

<sup>19</sup> Abheegya bhe emigiro bhayo na abhaseengeri abhakuru, bhakamenya kubha ekireengyo kino ni kye ekeembo yaabhu. Kweego bhakeenda kumumamira hayo hayo, nawe bhakoobhoha esaango ya abhaatu.

### **Omukoonyo iguru yo okuruusya eriigooti kuKaisari**

*(Mataayo 22:15-22; Mariko 12:13-17)*

<sup>20</sup> Kweego abhakuru bha Abhayahudi, bhakamwisuunza Yeesu bhukong’u, bhakatuma abhazararaati. Abhazararaati bhayo, bhakiikora kubha ni abhaatu bhe eheene. Nawe, bhaari ne ekeembo yo okumutega Yeesu kumang’ana gaaye, bhamugwaate no okumuhira kumukaangati wuno yaterweho na Kaisari, kubha azongeerwe.

<sup>21</sup> Kweego, abhazararaati bhakamubhuurya, “Omweegya, tumenyiri kubha eng’ana yino okugaamba no okweegya ni nzomu. Awe otakugya nago kwo obhukuru bho omuutu, nawe oreegya obhuheene kubhoosi, bhiiikare kya bhurya Taatabhugya akweenda. <sup>22</sup> Mbe! Kumigiro gyeetu gya Abhayahudi, tureenderwa tumurihe Kaisari eriigooti, kasi tutamuriha?”\*

<sup>23</sup> Rugeendo rumwe Yeesu akamenya omukoonyo gwaabhu, akabhabhuurira, <sup>24</sup> “Munierkeye orubhirya rwe edinaari. Epicha yino ne eriina rino, ni bhya weewi?”

Bhakamubhuurira, “Ni bhya Kaisari.”

<sup>25</sup> Yeesu akabhabhuurira, “Ambe, bhya Kaisari, muhaane Kaisari. Na bhye Emuungu woosi, muhaane Emuungu.”

<sup>26</sup> Eriikyooro riyo rya Yeesu, rikabharuguurya bhukong’u, bhakakira. Bhakatamwa okumutega kumang’ana gano akabhuga embere ya abhaatu.

### **Yeesu arabheerekeererya abhaatu bharyooka mubhaku**

*(Mataayo 22:23-33; Mariko 12:18-27)*

<sup>27</sup> Kweego Abhasadukayo\* abhaandi bhakaaza kuYeesu. Abhasadukayo bhaari bhareegya kubha, abhaku bhatakuryooka kweeki. Bakamubhuurya Yeesu,

<sup>28</sup> “Omweegya, mumigiro gya Musa akatukaamira kubha, kyo omuutu akuuri na atigiri omukari waaye atana omwaana, yaari ereenderwa omusuuhu waaye amukweere omutuumba wuyo, amwiihburire omuku omwaana. <sup>29</sup> Tubhuge, bhahbariho bhawamwaabhu muhuungati, omwaana wo obhutaangi akakweera omukari, akakwa akyaari kutiga omwaana. <sup>30</sup> Wamwaabhu wa kabhiri, akamusikirya omutuumba wuyo, woosi akakwa. <sup>31</sup> Hasuuhwiigo wa katatu, woosi akamusikirya, akakwa. Ekabha egoego kubhoosi muhuungati, bhakakweera omukari wuyowuyo, bhakakwa bhataatigiri mwaana. <sup>32</sup> Mubhuteero, omukari wuyo woosi, akakwa. <sup>33</sup> Mbe! Orusiku rwo obhuryoori, omukari wuyo arabha

\* 20:17 Zaburi 118:22

\* 20:22 Yeesu yaangabhuuriri, ‘Bharihe,’ abhaatu bhaari bharaanga okumutuniirira. Yaangabhabhuuriri, ‘Bhatariha,’ eserikare ya Abharooma yaari eramubhoha.

\* 20:27 *Abhasadukayo* ni orugaanda rwa abhaatu bhano bhakubhoneka Iziraeri. Rora Amakeerenio ga Amang’ana Amakong’u kubhuteero bhwe ekitabhu kino.



omukari wawi? Kwo okubha abhasubhe bhaari muhuungati, na kira owumwe akamukweera!”

<sup>34</sup> Yeesu akabhabhuurira, “Abhaatu bhe eriibhaga rino bharakweera no okukweerwa. <sup>35</sup> Nawe, bhano Taatabhugya abharuuzi bhareenderwa okuryoorwa mubhaku no okwiikara kukyaaro ekihya, bhayo bhatakukweera naabhe kukweerwa kweeki. <sup>36</sup> Na etakuturikana kubha bhatakukwa kweeki, kwo okubha bharabha kya bhamaraika. Bharabha abhaana bha Taatabhugya, kwo okubha bharyoorwa mubhaku.

<sup>37</sup> “Hata Musa akazweenia abhaatu kubha abhaku bharyoorwa. Mumakaamo gano akakaama iguru ye ekituutu kirya kyaari kwaaka omuriro, akabhuga Omukuru ‘niwe Taatabhugya wa Aburahamu, wa Isaaka na Yaakobo.’” <sup>38</sup> Kweego, yiingabha abhatatu bhayo bhaari bhakuuri eziisiku nzaru, Taatabhugya akabhuga bhayo ni abhahoru kweewe! Kweego, abhaatu abhaku na abhahoru, bhoosi ni abhahoru mumeeso gaaye.”

<sup>39</sup> Niho, abheegya bhe emigiro abhaandi bhakabhuga, “Omweegya, ogaambiri bhuzomu!” <sup>40</sup> Okutaanga eriibhaga riyo, bhaari bharoobhoha kumubhuurya Yeesu amabhuuryo agaandi.

### **Krisito niwe we ekisyooko kya Daudi na Omukuru wa bhoosi**

*(Mataayo 22:41-46; Mariko 12:35-37)*

<sup>41</sup> Nawe, Yeesu akabhabhuurya abheegya bhayo, “Ti abhaatu nibho bhakubhuga kubha, Krisito ni we ekisyooko kyo omutemi Daudi? Nibhwi bhakugaamba?”

<sup>42</sup> Daudi omweene, mukitabhu kya Zaburi, akabhuga,

‘Omukuru akamubhuurira Omukuru’ waane,

“Wiikare orubhaara rwaane rwo obhuryo,

<sup>43</sup> tee nikukore obhahize abhabhisa bhaazo no okubhakaangata.”\* \*

<sup>44</sup> “Yiingabha, Daudi aramubhirikira ewe Omukuru waaye. Bhoono, aranagyabhwi kubha omwaana waaye?”

### **Yeesu arabheegya abhaatu iguru ya abheegya bhe emigiro**

*(Mataayo 23:1-36; Mariko 12:38-40; Ruuka 11:37-54)*

<sup>45</sup> Hano abhaatu bhe esaango bhaari bharamwiitegeerera, Yeesu akabhabhuurira abheega bhaaye, <sup>46</sup> “Mwiirihe na abheegya bhe emigiro! Bhano bhaseegiri okwiibhoha amajoho\* gaabhu amazomu go obhuguungibhwa bharageenda. Kweeki, bhaseegiri kukeeribhwa kwo okwiitegeererwa mumiteera, na okwiikara kubhituumbi bhyo okwiitegeererwa munyuumba ye esaango, na kunyaangi.

<sup>47</sup> Baramuseengera Taatabhugya kumang’ana maaru embere ya abhaatu bharekane kubha abhazomu. Nawe ebho bhatesya abhatuumba eziinyumba zyaabhu! Abhaatu bhano, Taatabhugya arabhatinira ekiina bhubhi!”

---

\* 20:37 Kutoka 3:6

\* 20:42 **Omukuru** rya kabhiri rirerekya Masiya.

\* 20:43 Ekiyunaani kirabhuga *tee nibhatuure abhabhisa bhaazo haasi ya amaguru gaazo.*

\* 20:43 Zaburi 110:1

\* 20:46 **Amajoho** ni eziingibho zitaambi zino zikuhika no okuhitiira amaru, gatuubheeni ne eziingibho kye kanzu.

## Ekimweeso kyo omukari omutuumba

(Mariko 12:41-44)

**21** <sup>1</sup>Eriibhaga rino Yeesu yaari murubhago rwe enyuumba ya Taatabhugya, akabharora abhaniibhi bharatuura ebhimweeso bhyaabhu muhunguro ye ekimweeso. <sup>2</sup>Akamurora kweeki omutuumba owumwe omutaka arateemu eziimbirya ibhiri suuhu igo.

<sup>3</sup>Hayo, Yeesu akabhuga, “Nirabhabhuurira ge eheene kubha, omutuumba wuno ni mutaka, nawe aruusirye ekireengo ekikuru kukira abhaandi bhoosi.

<sup>4</sup>Boosi bhano bharuusirye ebhimweeso bhisuuuho igo kubhyaru bhyaabhu, nawe omutuumba wuno ni mutaka bhukong’u, neewe aruusirye bhyoosi bhino yakwiisigira!”

## Enyuumba ya Taatabhugya eraasibhwa

(Mataayo 24:1-2; Mariko 13:1-2)

<sup>5</sup>Abhaanabheega abhaandi, bhaari bharakeerenerya enyuumba ya Taatabhugya, kyeego ekang’atibhwa kwa amagina amazomu, hamwe ne ebhigiro bhyo obhuguri bhino abhaatu bhakamuruusirya Taatabhugya. Nawe Yeesu akabhuga, <sup>6</sup>“Gayo goosi gano mukugarora, ziraaza eziisiku zino ritakubhaho naabhe eriigina rino riraasage iguru ye eriindi. Kira erimwe rirasaribhwa!”

## Yeesu araroota enyaako ya abhaanabheega bhaaye

(Mataayo 24:3-14; Mariko 13:1-13)

<sup>7</sup>Abhaanabheega bhayo bhakamubhuurya, “Omweegya, amang’ana gayo ni ryoori garaatuuke? Na harabha ne ekyeerekenio, kino kiraatweerekye kubha gari haguhu kutuuka?”

<sup>8</sup>Akabhabhuurira, “Mubhe bhang’eeni, mutaaza kukaangiriribhwa! Abhaatu bhaaru bharaaza kuriina ryaane, bharabhuga, ‘Enye neenye Krisito.’ Kweeki bharabhuga, ‘Eriibhaga ryo obhuteero, bhuhikiri!’ Abhaatu bhayo, mutabhatuniirira! <sup>9</sup>Na hano mukwiigwa amang’ana ge eriini, ne ebhitiika bhya abhabhisa, mutoobhoha. Kukutaanga gayo goosi, garahatikwa gatuuke, nawe obhuteero bhwa goosi, bhukyaari.”

<sup>10</sup>Yeesu akagaamba, “Ekyaaaro kimwe, kirarwaana ne ekiindi, na obhuteero obhumwe, bhurarwaana no obhuundi. <sup>11</sup>Harabhaho ebhirigito ebhikuru bhye esi, na ahagiro ahandi harabha ne enzara ehaari, na amarweeri amabhi bhukong’u. Na kiraaza ekyeerekenio ekikuru kurwa mwiisaaro, na abhaatu bhararora ebhisigo bhyo okubhobhohya bhukong’u.

<sup>12</sup>“Nawe, hano gayo goosi gakaari kutuuka, abhaatu bharabhabhira emwe muziinyuumba zye eziisaango, no okubhabhoha munyuumba ya abhabhohwa, bharabhanyaakya. Na murahirwa embere ya abhatemi na abhakaangati, kwo okubha emwe ni abheega bhaane. <sup>13</sup>Niigo ego muraabhone omweeya gwo okunigaambira.

<sup>14</sup>“Kweego, mwaamure muzikoro gyeenyu okubha, mutige okunyaaka murakoorabhwii hano ekiina kyeenyu kikubha kikaari okugaambwa. <sup>15</sup>Enye omweene, nirabhaha amang’eeni na amang’ana gano muraagaambe, tee abhabhisa bheenyu bhatakunagya kwaanga naabhe okubhahakania.

<sup>16</sup>“Eriibhaga rino yoo okuruusibhwa kwa abhakaangati, murariirwa omukoonyo na abhiibhuri bheenyu, abhahiiri bheenyu, abhaatu bho orugaanda rweenyu, na abhasaani bheenyu. Bharakora abhaandi bheenyu bhariitwa. <sup>17</sup>Abhaatu bhoosi, bharabhatiindira ku keembo yaane. <sup>18</sup>Nawe, rutakubhura naabhe oruzweeri

orumwe kumitwe gyeenyu! <sup>19</sup>No omuutu wowoosi wuno araagumire tee obhuteero niwe araaturibhwe.”

### **Yeesu araroota kubha Yerusaremu eraasibhwa**

*(Mataayo 24:15-21; Mariko 13:14-19)*

<sup>20</sup>“Hano muraarore kubha omugye gwa Yerusaremu gwinaarirwe na abhasirikare bhe eriihi, niho muraamenye kubha eriihbhaga rihikiri rino gukwaasibhwa. <sup>21</sup>Eriibhaga riyu, bhano bhakubha mukyaaro kya Yudea, bharyaarire mubhiguru, na bhano bhakubha mumugye gwa Yerusaremu, bharwemu bhwaangu, na bhano bhakubha mumiguundu, bhatakyooro mumugye muyo. <sup>22</sup>Bararyara kwo okubha, eziisiku ziyu ni eziisiku ze enyaako, okubha amang’ana goosi gano gakaamirwe gabhe. <sup>23</sup>Muraaza kurora, abhakari abharitohe na bhano bhakukookya muziisiku ziyu! Erabha bhubhi, kwo okubha, mukyaaro muyo, harabha ne enyaako ehaari bhukong’u, kweeki obhururu bhwa Taatabhugya bhuraazaku abhaatu. <sup>24</sup>Abhaatu abhaandi, bhariitwa kwe eriasabha, na abhaandi, bharagwaatwa no okubha abhabhohwa no okuhirwa mubhyaaro ebhiindi bhyoosi. No omugye gwa Yerusaremu ogweene, abhaatu bhano bhatari Abhayahudi bharaaza no okubhahiza, tee eziisiku zyaabhu zisire.”

### **Omwaana wo Omuutu araaza kutuurya abhaatu bhaaye**

*(Mataayo 24:29-31; Mariko 13:24-27)*

<sup>25</sup>“Erabha ekyeerenio kuryoobha, omweeri ne eziinzota. Na mukyaaro hano, eziinyaanza zirabha na amabhooa maaru, zirang’ona, na kuteemo yiyo, abhaatu bhe ebhyaaro bharabha ne ehaha ne enyaako. <sup>26</sup>Gayo goosi, hano gakuuza kukaaro, abhaatu bharoobhoha bhukong’u. Bharakwa eziikoro kwo okukaangwa, bharaganya okubhonwa na amang’ana amabhi mukyaaro, kwo okubha, ebhigiro bhino bhikubha iguru bhirabha bhirasingisibhwa.

<sup>27</sup>“Hayo niho abhaatu bharaarore Omwaana wa Omuutu, araaza mwiisaaro, ana amanaga no obhuguungo obhukuru. <sup>28</sup>Gayo goosi, hano garaataange okukorwa, mwiimeerere tiri muraswaagibhwa, kwo okubha eriihbhaga ryo okutuurihbwa kweenyu, kuriisuka!”

### **Ekireengyo kyo okwiisuka kwo obhutemi bhwa Taatabhugya**

*(Mataayo 24:32-35; Mariko 13:28-31)*

<sup>29</sup>Kweeki, Yeesu akabhabhuurira abheega bhaaye ekireengyo, arabhuga, “Mwiisege omuti gwo omutiini, ne emiti egiindi gyooosi. <sup>30</sup>Hano muraarore gitaangiri okusibhuka amatu, hayo hayo muramenya kubha eriihbhaga rya amaahu riisukiri.

<sup>31</sup>“Niigo gari kumang’ana goosi gano nibhabhuuriiri bhoono ego. Hano muraarore kubha gayo garakorwa, niho muraamenye kubha obhutemi bhwe Emuungu bhwiisukiri. <sup>32</sup>Nirabhabhuurira obhuheene, orwiibhuro runo rutakuhita, tee gano goosi garaamare kukorwa. <sup>33</sup>Eriisaaro ne ekyaaaro bhirahita, nawe ebhuheene bhwa amang’ana gano bhuriikara kirakeego!”

### **Mubhe meeso**

<sup>34</sup>“Mwiirihe, mutaaza kuhizwa na amang’ana amabhi ne ebhigiro bhye ekyaaaro, no obhunywi, ne ehaha yo obhwiikari. Abhe mtiirihiri, orusiku rwo obhuteero rurabha kituukiro no okubhakaanga! <sup>35</sup>Orusiku ruyo, rurabha kituukiro mukyaaro kyoosi. <sup>36</sup>Kweego, mubhe meeso eriihbhaga ryoosi! Mugeenderere kumusabha Taatabhugya kubha, abhasakirye kugabhezya goosi gano garaatuuke, no okwiimeerera embere ya Omwaana wa Omuutu.”

<sup>37</sup> Kuziku ziyo, mumwiisi Yeesu ahaabha areegya abhaatu mwiigoobhe rye enyuumba ya Taatabhugya, na obhutiku, ahaabha aragya mukiguru kino kikubhirikirwa ekiguru kya mizeituni. <sup>38</sup> Kira orusiku, abhaatu bhoosi bhahaabhuuka etabhoori zuri, no okwiikumanirya mwiigoobhe rye enyuumba ya Taatabhugya bhamwiitegeerere.

### **Yuuda yiikiriye kusakirya abhaandi okwiita Yeesu**

(Mataayo 26:1-5, 14-16; Mariko 14:1-2, 10-11; Yohana 11:45-53)

**22** <sup>1</sup> Orusiku rwe Enyaangi ye Emikaate Gino Gitana Ekibhwiisya\* yaari eriisuka, niyo ekubhirikirwa Enyaangi yo Okuhiita. <sup>2</sup> Abhakuru bha abhaseengeri, hamwe na abheegya bhe emigiro gya Musa, bhaari bharamohya enzira yo okwiita Yeesu, nawe bhaari bharoobhoha abhaatu.

<sup>3</sup> Niho, Seetaani akamusikira Yuuda, wuno ahaabhirikirwa Isikariyoti, owumwe wa abheega bha Yeesu ikumi na bhabhiri. <sup>4</sup> Kyaamwe, Yuuda akagya kubhakuru bha abhaseengeri, na kubhakuru bha abhariibhi bhe enyuumba ya Taatabhugya, bhakakeerenia nabho kyeego araarusye Yeesu kweebho. <sup>5</sup> Kumang'ana gayo bhakazomererwa bhukong'u, bhakiikirirya kumuha eziimbirya. <sup>6</sup> Hano Yuuda akiikirirya, akataanga kumoohya omweeya gwo okubhagwaaty Yeesu, kwiibhaga rino abhaatu bhaaru bhatari bhariho.

### **Yeesu na abheega bhaaye bharyana enyaangi yo okuhiita**

(Mataayo 26:17-30; Mariko 14:12-26; Yohana 13:21-30; 1 Wakorintho 11:23-25)

<sup>7</sup> Hano orusiku rwe Enyaangi ye Emikaate Gino Gitana Ekibhwiisya rukahika, eheenderwa eng'oondo ye Enyaangi yo Okuhiita egwaagwe. <sup>8</sup> Niho, Yeesu akabhatuma Petero na Yohana, akabhabhuurira, “Mugye mutukorere ebhyaakurya bhye Enyaangi yo Okuhiita tuuze turye hamwe.”

<sup>9</sup> Bakamubhuurya, “Oreenda tubhikorere hayi?”

<sup>10</sup> Akabhakyoora, “Hano muraasikire mumugye, murasikana no omusubhe wumwe, agegiri eseengo ya amaanzi, mumutuniire tee na munyuumba muno araasikire. <sup>11</sup> Mumubhuurire omweene enyuumba kubha, ‘Omweegya arabhuurya, ‘Ekinyuumba kya abhagini kiri hayi? Nireenda kuriramu ebhyaakurya bhye Enyaangi yo Okuhiita hamwe na abheega bhaane.’” <sup>12</sup> Neewe arabhahira munyuumba ye kinazo, arabherekya ekinyuumba ekikuru, muyo murabhona ebhigiro bhyoosi bhirimu, mutukorere ebhyaakurya bhye Enyaangi yo Okuhiita muyo muyo.” <sup>13</sup> Abheega bhabhiri bhayo, hano bhakiigwa gayo, bhakarwa hayo, bhakagya bhakabhona goosi kyeego Yeesu yabhabhuuri. Bhakataanga kukoreramu ebhyaakurya bhye Enyaangi yo Okuhiita.

<sup>14</sup> Hano eriibhaga ryo okurya rikabha rihikiri, Yeesu akiikara kubhyaakurya hamwe na abheega bhaaye. <sup>15</sup> Akabhabhuurira, “Bhoono nine enaamba bhukong'u okurya ebhyaakurya bhye Enyaangi yo Okuhiita hamwe neemwe nikyaari kunyahaarwa! <sup>16</sup> Nirabhabhuurira kubha, nitakurya kweeki ebhyaakurya bhino, tee goosi ge esikukuru yo okuhiita gakorwe, no okweerekenia mubhutemi bhwa Taatabhugya.”

<sup>17</sup> Kyaamwe Yeesu akagega ekikoombe kya amaanzi go omuzabibu, akabhuga, “Ozomirye Taatabhugya.” Niho akabhaha abheega bhaaye, arabhuga, “Mugege ekikoombe kino, muguse. <sup>18</sup> Nirabhabhuurira kubha nitaanywe kweeki amaanzi go omuzabibu, tee obhutemi bhwa Taatabhugya bhuuze.” <sup>19</sup> Yeesu akagega

\*22:1 Enyaangi ye Emikaate Gino Gitana Ekibhwiisya ni nyaangi yino Abhayahudi bhahaakora kuhiita orugeendo rwaabhu rwo okurwa Misiri. Rora Amakeerenio ga Amang'ana Amakong'u kubhuteero bhwe ekitabhu kino.

omukaate, akabhuga, “Ozomirye Taatabhugya,” akagubhega, akabhaha abheega bhaaye, arabhabhuurira, [“Murye, omubhiri gwaane guno, na gurarusibhwa kwiiguru yeenyu. Mubhe muraakore ego kwo okunihiita!”

<sup>20</sup>Na hano bhakamara kurya ebhyaakurya bhye engoroobha, Yeesu akagega amaanzi go omuzabibu gayo, akabhuga, “Amaanzi go omuzabibu gano ni amanyiinga ge eriiragano eriihya,\* rino riraakorwe kwo okwiitika kwa amanyiinga gaani kwiiguru yeenyu.]\*

<sup>21</sup>“Nawe murore! Owumwe weenyu arankorera omukoonyo, na wuno akunikorera omukoonyo tunawe mwiigari hano. <sup>22</sup>Enye, Omwaana wo Omuutu, niragya kwiitwa, kyeego Taatabhugya ahaabha yeendiri. Nawe tiga! Wuno arankorera omukoonyo ararora.”

<sup>23</sup>Niho, abhaanabheega bha Yeesu bhakataanga kwiibhuurya, “Niwi gati weetu araakore gayo?”

### Ameegyo iguru yo obhukaangati

<sup>24</sup>Niho kweeki, eriiyoge rikarweera gati ya abheega bha Yeesu, kubha niwi gati yaabhu araabhe omukuru kukira abhaandi. <sup>25</sup>Yeesu akabhabhuurira, “Abhatemi bha abhaatu bhano bhataru Abhayahudi, na bharabhabhiza kwa amanaga, no okwiikumya kubha ni bhahaani.

<sup>26</sup>“Nawe kweemwe etabheego, wuno akubha omukuru gati yeenyu, abhe kyo omusuuhu. Na wuno akubha omukaangati, abhe kyo omuhokya wa abhaandi.

<sup>27</sup>Kweego! Niwi omukuru wo okubhakira? Ni wurya akwiikara kubhyaakurya, kasi ni wuno akuhokya ebhyaakurya? Atari wurya akwiikara kubhyaakurya? Kweego, enye neenye niri gati yeenyu kyo omuhokya.

<sup>28</sup>“Neemwe abheneego, mukiikara no okutama na neenye, hano naari munyaako. <sup>29</sup>Kweego, nirabhatuurira obhunagya bhwo obhutemi, kya bhurya Taata waane yantuuriri enye. <sup>30</sup>Nirabhaha obhuturo bhuyo kwo okwiikara hamwe na neenye mubhe murarya no okunywa hamwe mubhutemi bhwaane. Na muriikara kubhituumbi bhyo obhutemi, eno murataania eziihamati ikumi ni ibhiri za Abhiiziraeri.”

### Yeesu arabhuga Simooni Petero aramwaanga

(Mataayo 26:31-35; Mariko 14:27-31; Yohana 13:36-38)

<sup>31</sup>Yeesu akabhuga, “Simooni, Simooni! Rora, Seetaani rirabhasakya emwe kyo omuseesi wo okuseesa engano. <sup>32</sup>Nawe, nikusabhiiri ku Taatabhugya, obhwiikirirya bhwaazo bhutasuaha. Naawe hano oriikirirye, osakirye abharikyaazo.”

<sup>33</sup>Simooni akamukyoora, “Ee Omukuru Yeesu! Enye nibheeri wo okugya kubhohwa hamwe naawe mukibhoho, yaangabha kwiitwa, enye noosi niriitwa!”

<sup>34</sup>Yeesu akamukyoora, “Ee Petero! Nirakubhuurira kubha reero ekorokoome ekyaaari kugaamba, oranianga katatu koosi kwo okwiikora otanimenyiri.”

### Eriibhaga ryo okusikira mubhubhi

<sup>35</sup>Kyaamwe, Yeesu akabhuurya abheega bhaaye, “Hano nikabhatuma mutaari ne ekiguzi kye eziimbirya, mutaari ne esakwa, mutaari ne ebhikweera, mukasuuhirwa na ekigiro?”

\* **22:20 Eriiragano** ni okwiikirirania kwa abhaatu bhahiri, hamwe Taatabhugya na abhaatu. Rora Amakeerenio ga Amang’ana Amakong’u kubhuteero bhwe ekitabhu kino.

\* **22:20** Yeremia 31:31-34, Kutoka 24:8

Bakamukyoora, “Zeyi.”\*

<sup>36</sup> Yeesu akabhabhuurira, “Kweema bhoono, kira omuutu we ekiguzi kye eziimbirya na we esakwa, agege. Na wuno atana eriisabha, agurye ekabhuuti yaaye, agure erimwe. <sup>37</sup> Na kwo okubha bhoono, amang’ana gano gakaamirwe na abharooti iguru yaane, gaari haguhi kubha no obhuteero bhwaaye, kwo okubha ekaamirwe, ‘Akabharwa hamwe na abhakori bhe ebhibhi.’ Nirabhabhuurira kubha ereenderwa gayo gakorwe kweenye.”

<sup>38</sup> Nabho bhakamubhuurira, “Ee Omukuru Yeesu! Rora! Hano gariho amasabha abhiri.”

Neewe akabhuga, “Gano giisiri.”

### Yeesu arasabha mukiguru kye Emizeituni

(Mataayo 26:36-46; Mariko 14:32-42)

<sup>39</sup> Niho Yeesu akarwa hayo, akagya Kukiguru kino kyaari kubhirikirwa ekiguru kye Emizeituni, kyeego yaari teemo yaaye na abheega bhaaye nabho bhakabha bharamutuniirira. <sup>40</sup> Na hano akahika kukiguru kiyi, akabhabhuurira, “Musabhe mutaaza kusikira mubhika.”

<sup>41</sup> Niho, akiibheza akiisuka embere hasuuu, obhweema bhwo okutaasa eriigina, akatema haasi ebhiru, akasabha kubha, <sup>42</sup> “Ee Taata, kyeego okweenda, onduusirye enyaako yino ekuuza. Kyaamwe, kino okweenda kukora, kikorwe. Nawe etabha kino enye nikweenda.” [<sup>43</sup> Niho, maraika kurwa mwiisaaro akahwaarukira Yeesu, akamuha amanaga. <sup>44</sup> Yeesu akabha no obhururu bhuhaari bhukong’u, bhukamukora yongere kusabha. Ekigeri kyaaye kyakitubheni na amanyiinga, kikabha kiratonya haasi toi, toi!]

<sup>45</sup> Na hano akamara kusabha, akiimeerera, akabhakoorera abhaanabheega bhaaye, akabhabhona bhahiindiiri kwo okubha bhaari bharosiri kwe ebhigoongi. <sup>46</sup> Akabhabhuurya, “Kwaki muhiindiri? Mubhuuke! Musabhe, mutaaza kusikira mubhika.”

### Yeesu aragwaatawa

(Mataayo 26:47-56; Mariko 14:43-50; Yohana 18:3-11)

<sup>47</sup> Hano Yeesu ya akyaagaamba gayo, akiizirwa na abhaatu bhaaru. Abhaatu bhayo, bhakakaangatibhwa na Yuuda, owumwe wa abheega bhaaye ikumi na bhabhiri. Niho, Yuuda akamwiisukira Yeesu, amukeerye kwo okumuhumbata.

<sup>48</sup> Yeesu akamubhuurya, “Yuuda, heene oranikeerya kwo okunihuumbata kyo omusaani, eno oranikorera omukoonyo kwo okunirusya enye Omwaana wo Omuutu?”

<sup>49</sup> Hano abheega bha Yeesu bhayo, bhakarora kyeego eraabhe, bhakamubhuurya, “Ee Omukuru! Awe, tubhang’ereng’ere kwe eriisabha?”

<sup>50</sup> Niho, owumwe wa abheega akamukebha okutwi kwo obhuryo kwe eriisabha, omubhagati wo omuseengeri omukuru. <sup>51</sup> Yeesu akabhuga, “Mutige! Giisiri.” Akagwaata okutwi kwa omuhokya wuyo, akamuhorya.

<sup>52</sup> Yeesu akabhabhuurya, abhakuru bhabhaseengeri, na abhakuru bha abhariibhi bhe enyuumba ya Taatabhugya, hamwe na abhakaruka bha Abhayahudi bhano bha bhiziri kumugwaata, “Awe! Kwaki muniziri na amasabha ne eziinduguzo, kya wuno mumwiiziri omuteesya? <sup>53</sup> Ndora kirakeego, twaari turahoya hamwe munyuumba ya Taatabhugya, na mutanikuniryeku! Nawe bhoono, eribhaga rino ni eryeenyu no omukaangati we ekiirima.”

\* 22:35 Ruuka 9:3, 10:4

### Petero aramwaanga Yeesu

(Mataayo 26:57-58; Mariko 14:53-54, 66-72; Yohana 18:12-18, 25-27)

<sup>54</sup> Abhaatu bhayo bhakamugwaata Yeesu, bhakamuhira tee munyuumba yo omuseengeri omukuru, Petero akabha aramutuniirira kwa kure. <sup>55</sup> Hano bhakahika gatigati yo omugye, omuriro gukahuutwa, bhakiikara. Na Petero woosi akaaza kwiikara gati yaabhu. <sup>56</sup> No obhweero bhwo omuriro guyo bhukamumurika, no omuukya wumwe omuhokya akamurora kwo okumumogorera akabhuga, “Omuutu wuno, ahaabha hamwe neewe.” <sup>57</sup> Nawe Petero akahakana, “Awe omukaryono! Nitamumenyiri!”

<sup>58</sup> Kwiibhaga isuuho igo, omuutu owuundi akamurora Petero akamubhuurira, “Awe ni wumwe waabhu.”

Kyaamwe Petero akamukyoora, “Awe mura! Ntari enye!”

<sup>59</sup> Niho eriibhaga rimwe rikahita, omuutu owuundi akamukumirirya, “Kwe eheene, omuutu wuno ahaabha hamwe nawe, ewe woosi ni Omugariraaya!”

<sup>60</sup> Kyaamwe Petero akabhuga, niho ekorokoome ekagaamba, “Kookorikoo.” <sup>61</sup> Hayo hayo Yeesu akamwiikibhukira, akamutaangaarira Petero. Petero akagahiita amang’ana garya Yeesu yaari amubhuuriiri, “Reero, ekorokoome ekyaari kugaamba, orabha oniangiri katatu.” <sup>62</sup> Hayo, Petero akaryaarira habhoori, akataanga okurira bhukong’u.

### Abhariibhi bharamunyaakya Yeesu

(Mataayo 26:67-68; Mariko 14:65)

<sup>63</sup> Kyaamwe abhasubhe bharya bhaari bharamugwaata Yeesu, bhakabha bharamuzabhura, no okumutema bhukong’u. <sup>64</sup> Bakamukundikirya mumeeso, bharamubhuurya, “Ruusya obhurooti! Niwi akutemiri?” <sup>65</sup> Bakageenderera kumuruusirya amang’ana maaru ga amatuki.

### Yeesu arazongerwa embere ya abhakuru

(Mataayo 26:59-66; Mariko 14:55-64; Yohana 18:19-24)

<sup>66</sup> Hano kukakya, abhakaruka bha Abhayahudi, abhaseengeri abhakuru na abheegya bhe emigiro bhakakora ekiina. Na hano Yeesu akareetwa embere yaabhu, <sup>67</sup> bhakamubhuurya, “Awe! Naawe Krisito, otubhuurire.”

Yeesu akabhakyoora, “Naangabhabhuurira, mutakwiikirirya.

<sup>68</sup> Naangabhabhuurya eriibhuuryo, mutakunikyooro. <sup>69</sup> Kweemera bhoono, enye Omwaana wo Omuutu nirabha niikeeri orubhaara rwo obhuryo\* rwe Emuungu wo obhunagya bhwoosi.”\*

<sup>70</sup> Boosi bhakamubhuurya Yeesu, “Heene awe ni Omwaana wa Taatabhugya?”

Yeesu akabhakyoora, “Ndora abheene mugaambiri kubha enye niwe!”

<sup>71</sup> Niho abhakuru bhayo bhakabhuga, “Bhoono tutakweenda ekimenyeekereryo ekiindi, kwo okubha twoosi abheene twiigiwiiri eng’ana yino!”

\* 22:69 Okwiikara orubhaara rwo obhuryo ni kuhaanwa obhunagya no obhukaangati.

\* 22:69 Zaburi 110:1

## Yeesu arazongerwa embere ya Pirato

(Mataayo 27:1-2, 11-14; Mariko 15:1-5; Yohana 18:28-38)

**23**<sup>1</sup> Kyaamwe, abhakuru bhoosi bha Abhayahudi bhakiimeerera, bhakamuhira Yeesu kuPirato.\*<sup>2</sup> Bakataanga okumuzoongerera kwo obhuhaari, bhakabhuga, “Omuutu wuno, tumubhweeni arasarya ekyaaro kyeetu kwo okubha, ararekya abhaatu kubha bhatariha eriigooti kweeki ku Kaisari. Na arabhuga kubha ewe niwe Krisito, omutemi.”

<sup>3</sup> Niho, Pirato akabhuurya Yeesu, “Awe, nawe omutemi wa Abhayahudi?”  
Yeesu woosi akamukyoora, “Ndora awe omweene ogaambiri!”

<sup>4</sup> Niho kweeki, Pirato akabhabhuurira abhaseengeri abhakuru bhayo, hamwe ne erihiho rya abhaatu, “Omuutu wuno, niruuzi ewe atana isarya riyo ryoosi riryu.”

<sup>5</sup> Abhaatu bhayo, bhakagaamba kwo okukumiirira, “Ndora areegererya abhaatu bha mukyaaro kyoosi kya Yudea. Akataanga okweegya eyo Gariraaya, na akanyaragania tee hano.”

<sup>6</sup> Hano Pirato akiigwa gayo, akabhuurya, “Omuutu wuno ni Omugariraaya?”

<sup>7</sup> Na hano akamenya kubha ewe ni Omugariraaya wa mubhukaangati bhwa Herode, akamutuma kweewe kwo okubha eziisiku ziyo, Herode ahaabha Yerusalemu hayo.

### Herode aramubhuurya Yeesu

<sup>8</sup> Niigo Herode akarora Yeesu akazomererwa bhukong’u, kwo okubha aheenda amurore kuziisiku nzaru yareenda. Kwo okubha omweene yaari ariigwa amang’ana gaaye, akeenda kurora kyeego akukora ekitiika.<sup>9</sup> Herode akamubhuurya Yeesu kwa amabhuuryo maaru, nawe Yeesu atamukyooriri ng’ana.<sup>10</sup> Abhaseengeri abhakuru na abheegya bhe emigiro, bhakahita embere bhakataanga kuzoongera Yeesu kwo obhuhaari.

<sup>11</sup> Herode na abhasirikare bhaaye bhakataanga kumuzabhura, bhakamuseka, bhakamwiibhohya emyeenda emizomu. Kyaamwe bhakamukyoora kuPirato.

<sup>12</sup> Na kweema orusiku ruyo, Herode na Pirato bhakiigwaana bhakabha abhasaani, yingabha ekare hayo bhaari ni abhabhisa.

### Pirato ariikirira Yeesu yitwe

(Mataayo 27:15-26; Mariko 15:6-15; Yohana 18:39-19:16)

<sup>13</sup> Kyaamwe, Pirato akabhakumania abhaseengeri abhakuru, na abhakaangati bha Abhayahudi, hamwe na abhaatu bha mumugye.<sup>14</sup> Akabhabhuurira, “Mundeteeri omuutu wuno kyaabhurya akweegererya abhaatu. Mumenye kubha nimariri kumubhuurya embere kyeenyu. Na ku amazongero geenyu goosi, ritariho isarya riyo ryoosi rino niruuzi kweewe.<sup>15</sup> Nawe Herode woosi, ataruuzi kino asariryu, nikyo amukyooriryu kweetwe. Mumenyeekereerye kisi kubha, omuutu wuno atakoriri ng’ana yino, yino eraagirye yitwe!<sup>16</sup> Kweego nirabhabhuurira abhasirikare bhamuteme eziityaanya, kumara nimuhaatire.” [<sup>17</sup> Pirato wuyo, kira esikukuru yo obhutuurya yaari ereenderwa abhiigurire omubhohwa wumwe kurwa mukibhoho.]

<sup>18</sup> Abhaatu bhayo bhoosi bhakamwaaya hamwe bharabhuga, “Oturusiryeho omuutu wuyo, otwiigurire Baraaba!”<sup>19</sup> Baraaba wuyo, ahaabha abhohirwe mukibhoho, kwo okureeta erihi ryaaru no okwiita mumugye.

\* **23:1** Pirato yaari omukaangati kurwa Rooma wuno ahiimeererera orubheri rwa Yudea, niwe omweene yaari kutina ekiina kyo oruku.



<sup>20</sup> Pirato akagaambana na abhaatu bhayo rwa kabhiri kweeki, kwo okubha yareenda amuhatire Yeesu. <sup>21</sup> Kyaamwe, ebho bhakeenderera kumwaaya, “Mwiite, mwiite kumusaraba!”

<sup>22</sup> Kweeki akagaambana nabho rwa katatu, “Awe bhoono ni bhimbhiki bhino akoriri? Ndora etariho eng’ana yino niruuzi kweewe eraagirye yitwe! Kweego nirabhabhuurira bhamuteme eziityaanya, kumara nimuhaatire.”

<sup>23</sup> Kyaamwe, abhaatu bhayo bhakoongera kumwaaya bhukong’u kubha Yeesu yitwe, ne eriiraka ryaabhu rikakiraho. <sup>24</sup> Niho Pirato akiikirirya, abhaatu bhayo bhakore kyeego bhaari bhasabhiri. <sup>25</sup> Akabhiigurira omusarya wurya, wuno ahaabha abhohirwe kwo okureeta erihi ryaaru mumugye no okwiita, akabhaha Yeesu bhamukorere kyeego bhakweenda.

### **Okubhaambwa kwa Yeesu kumusaraba**

*(Mataayo 27:32-44; Mariko 15:21-32; Yohana 19:17-27)*

<sup>26</sup> Hano abhasirikare bhaari kuhira Yeesu kumwiita, bhakasikana no omuutu wumwe, eriina ryaaye Simooni wa mumugye gwa Kirene. Simooni wuyo, ahaabha ararwa mumuguundu. Niho bhakamugwaata kwa nguru, bhakamuseserya omusaraba. Akabha aramurwa Yeesu kwi inyuma.

<sup>27</sup> Abhaatu bhaaru bhahamutuniirira Yeesu, gati yaabhu abhakari bhaari bharamuririra kwe ebhigoongi. <sup>28</sup> Yeesu akabhikibhukira, akabhabhuurira, “Weyaa abhakari bha Yerusaremu, mutandirira enye! Nawe mwiiririre abheene na abhaana bheenyu! <sup>29</sup> Kwo okubha eziisiku zino zikuuza, abhaatu bharabhuga, bhano omureembe abhakari abhaguumba! Bhano omureembe bhano bhataakokirye!” <sup>30</sup> Kyaamwe, bharabhuurira ebhiguru, ‘Mutugweere,’ bharabhuurira ehiguru, ‘Mutukuundikirye.’\* <sup>31</sup> Eraabhe gayo garaakorwe kumuti omubhisi, erabhabhwi kumuti omwoomu?”

<sup>32</sup> Abhasirikare bhakabhahira Yeesu na abhakori bhe ebhibhi bhabhiri, keembo bhagye kwiitwa hamwe. <sup>33</sup> Bakahika ahagiho hano hakubhirikirwa Ekihaanga kyo Omutwe, niho bhakabhahamba Yeesu na abhakori bhe ebhibhi bhabhiri bhayo kumisaraba, owumwe orubhaara rwaaye rwo obhuryo, no owuundi orubhaara rwo obhumosi.

<sup>34</sup> Yeesu akabhuga, “Ee Taata, obhaabhire, kwo okubha gano bhakukora bhatagamenyiri.”\* Abhasirikare bhayo bhakataanga okugitemera obhwiitoori no okutwaana emyeenda gya Yeesu.

<sup>35</sup> Abhaatu bhakiimeerera hayo bhakiisuunza, na abhakuru bha Abhayahudi, bhakataanga okumuseka Yeesu, bhakabhuga, “Ndora ahaabhatuurya abhaandi, bhoono araabhe niwe Krisito wuno yasorirwe na Taatabhugya, yiituurye omweene.”

<sup>36</sup> Abhasirikare nabho bhakamuzibhura, bhakamwiisukira okubha, bhamuhe amarwa amaruru. <sup>37</sup> Bhakamubhuurira, “Abhe heene naawe omutemi wa Abhayahudi, wiituurye omweene.” <sup>38</sup> Na iguru yaaye amakaamo gakatuurwa kurubhawa, gakaamirwe, “Wuno niwe omutemi wa Abhayahudi.”

<sup>39</sup> Kubhakori bhe ebhibhi bhabhiri bhayo, owumwe akatuka Yeesu arabhuga, “Awe naawe Krisito? Bhoono ituurya omweene, otutuurye na neetwe.”

\* **23:29** Omwaaka gwe emiroongo muhungati, abhasirikare bha Rooma bhakasarya Yerusaremu kwo okwiita Abhayahudi bhaaru.

\* **23:30** Hosea 10:8

\* **23:34** Amakaamo agaandi ge Ekiyunaani gatana Yeesu akabhuga, ‘Ee Taata, obhaabhire, kwo okubha gano bhakukora bhatagamenyiri.’

<sup>40</sup> Kyaamwe, omusarya omurikyaaye akamurekya, akabhuga “Awe otakwoobhoha Taatabhugya yiingabha hasuuhu? Ekiina kino tutiniirwe, nikyo woosi araatinirwe. <sup>41</sup> Etwe tutiniirwe kwo obhuheene bhwe ebhisigo bhyeetu, nawe wuno atana isarya rino akoriri.” <sup>42</sup> Kyaamwe, akabhuga, “Ee Yeesu! Onihiite na neenye hano oraasikire mubhutemi bhwaazo.”\*

<sup>43</sup> Yeesu akamukyoora, “Nirakubhuurira obhuheene, reero yino turabha hamwe nanaawe mwiisaaro.”

### Okukwa kwa Yeesu

(Mataayo 27:45-56; Mariko 15:33-41; Yohana 19:28-30)

<sup>44</sup> Eriibhaga ryaari rya kasaasabha mumwiisi, kukabha ne ekiirima mukyaaro kyoosi tee eriibhaga rya keenda, <sup>45</sup> kwo okubha eryoobha rikarima. No omweenda gurya gwaari gusungirwe munyuumba ye Emuungu,\* ekaraanduka mbaara ibhiri, kwaraa. <sup>46</sup> Yeesu akarira kwiiraka ikuru, “Weyaa Taata, niratuura ekoro yaane mumabhoko gaazo.” Na hano akamara kugaamba gayo akatinia ekoro.

<sup>47</sup> Omukuru wa abhasirikare hano akarora gayo, akamukumya Taatabhugya arabhuga, “Nimenyiri omuutu wuno yaari omuheene.”

<sup>48</sup> Abhaatu bhano bhaari kurora amang’ana gayo, bhakakyoora mumigye gyaabhu, bharitematema mubhikubha bhyaabhu kwe ebhigoongi. <sup>49</sup> Na abhaandi bhano bhaamumenyiri Yeesu, bhakiikara kure no okwiisuunza gano ga kukorwa. Gati yaabhu, abhakari bhaari bharimu bhano bhakumutuniirira kurwa Gariraaya.

### Okubhiikwa kwa Yeesu

(Mataayo 27:57-61; Mariko 15:42-47; Yohana 19:38-42)

<sup>50-51</sup> Hahaabha no omuutu wumwe, eriina ryaaye Yusufu, wa mumugye gwa Arimataya wa mukyaaro kya Yudea. Yusufu wuyo, ahaabha wumwe gati ya abhakuru bha Abhayahudi, nawe bhatikirirenie na abharikyaaye kwe ekiina kyo okumwiita Yeesu. Ewe yaari omuutu omuzomu no omuheene, na ahaabha araganya obhutemi bhwa Taatabhugya bhuuze.

<sup>52</sup> Niho, Yusufu akagya kumusabha Pirato kubha ahaabhwe omubhiri gwa Yeesu. <sup>53</sup> Na hano Pirato akiikirirya, Yusufu akagya kugwiikya kurwa kumasaraba, akagubhoherera omweenda. Kyaamwe akaguhindirya mumbiihira yino yabhaazirwe kwiitare, na mubhubhi muyo, atariho omuutu owuundi wuno yabhiikirwemu. <sup>54</sup> Orusiku ruyo, rukabha orusiku rwo kubhanura no orusiku rwo okuseengera, na runo rwaari haguhi kuhika.\*

<sup>55</sup> Abhakari bhano bhaageendiri hamwe na Yeesu kurwa Gariraaya bhakaaza na Yusufu. Bhakamutuniirira bhakarora mubhubhi muyo, na kyeego omubhiri gwa Yeesu guhiindiribhwemu. <sup>56</sup> Kyaamwe, bhakakyoora yiika, bhakabhanura amaguta ne ebhiruumbaso, bhaaze nabhyo kuhaka kumubhiri gwa Yeesu. Kyaamwe bhakamuunya orusiku rwo obhuseengeri, kyeego emigiro gyaari kweenda.

### Okuryooka kwa Yeesu

(Mataayo 28:1-10; Mariko 16:1-8; Yohana 20:1-10)

**24**<sup>1</sup> Etabhoori zuri orusiku rwo okutaanga rwo obhutuuro, abhakari bhayo bhakagya mumbiihira, eno bhabhanwiiri ebhiruumbaso na bhakabhireeta.

\*23:42 hano oraasikire mubhutemi bhwaazo Amakaamo agaandi ge Ekiyunaani gakaamirwe, hano okuuzza kyo omutemi.

\*23:45 Bahaatuura gatigati omweenda kye ekitambaara ekikuru, guno gwaari guribhiri ahagiro he eriiseengerero na mwiiseengerero.

\*23:54 Orusiku rwo okubhanura rwaari Ijumaa, kwo okubha orusiku rwo okuseengera rwaari Jumamosi.

<sup>2</sup>Nawe eriigina eriikuru ryaari riribhiri mumbiihira, bhakabhona rihiringitiibhwe embarika. <sup>3</sup>Niho bhakasikira muusi, kyaamwe bhakabhona omubhiri gwo Omukuru Yeesu gutarimu.

<sup>4</sup>Hano, bhaari bhakyaruguura iguru ye eng'ana yiyo, kwiitakyeego imbarika waabhu, bhakiimeerera abhaatu bhahiri, bhiihohiri emyeenda gyo okumesyamesya. <sup>5</sup>Hano bhakarora gayo, abhakari bhayo bhakagwaatwa no obhwoobha bhwaaru, niho bhakiihiinya tee haasi. Kyaamwe, abhaatu bhayo bhakabhabhuurira, “Ndora muramohya omuhoro mubhaku?” <sup>6</sup>Atariho hano kweeki, aryokiri! Emwe mutakuhiita amang'ana garya akabhabhuurira, hano ya kyaari Gariraaya? <sup>7</sup>Akabhuga, ‘Enye Omwaana wo Omuutu, nireenderwa nituurwe mumabhoko ga bhe ebhibhi, na bharaniitira kumusaraba, no orusiku rwa katatu niraryooka.’”

<sup>8</sup>Neebho bhakahiita amang'ana gayo ga Yeesu, <sup>9</sup>bhakarwa mumbiihira bhakagya kukeerenia na abheega bha Yeesu ikumi na wumwe, hamwe na abhaatu abhaandi. <sup>10</sup>Abhakari bhayo ni Mariamu wa Magidarena, Yoana, na Mariamu nina waabhu Yaakobo, hamwe na abhakari abhaandi bhano bhaari hamwe neebho.

<sup>11</sup>Hano bhaagaambiri goosi gayo kubheega, bhakagarora kubha ni ga kizabhuri, bhataagiikirirye. <sup>12</sup>Niigo Petero akiigwa, akakwaabhuka akaryaara kugya mubhubhi. Eriibhaga rino yasikiiri muusi, akabhona emyeenda gino bhahikiirimu Yeesu, giri hayo egyeene ego. Akarwa hayo, eno ariibhuurya omweene kino kituukiri.

### Orugeendo rwo okugya Emau

(Mariko 16:12-13)

<sup>13</sup>Orusiku ruyo ruyo, abhabhiri bha abheega bha Yeesu bhaari murugeendo rwo okugya mumugye gwa Emau. Omugye guyo, gwaari obhweema bhwa kiromita ikumi na yimwe, okurwa Yerusaremu. <sup>14</sup>Na abhabhiri bhayo, bhaari bharibhisirya iguru ya amang'ana goosi gano gaakorirwe.

<sup>15</sup>Na hano bhakwiibhuurya no okukeerenia, Yeesu woosi yaari arageenda hamwe nabho. <sup>16</sup>Nawe bhaari bhikuundikiriibhwe ameeso gaabhu, bhatamenyiri kubha niwe.

<sup>17</sup>Akabhabhuurya, “Murakeerenyaki eno murageenda?”

Bakiimeerera, eno bhangiri ziikomo zyaabhu. <sup>18</sup>Owumwe waabhu, eriina ryaaye niwe Kiriopa, akamukyoora, “Mubhagini bhoosi bha Yerusaremu, naawe omweene ego omugini, wuno oteendawigwa goosi gano gakakorwa ziiisiku ziyoi!”

<sup>19</sup>Yeesu akabhuurya, “Ni mang'anaki gayo?”

Bakamukyoora, “Amang'ana ga Yeesu wa Nazareeti. Niwe yaari omurooti no obhunagya bhwo okukora, no okugaamba embere ya Taatabhugya na abhaatu bhoosi. <sup>20</sup>Kyaamwe, abhaseengeri abhakuru na abhakaangati bheetu, bhakamutinira ekiina kubha yiitwe, niho bhakamwiita kumusaraba. <sup>21</sup>Na ewe niwe tumwiigoombiri kubha, aratutuurya etwe Abhiiziraeri kweema goosi gayo gaakorirwe, reero ni orusiku rwa katatu.

<sup>22</sup>“Hamwe na gayo, gati ya abhakari bhano bhaari hamwe neetwe, bhakatutakya kubha reero etabhoori zuri bhakagya mumbiihira, <sup>23</sup>bhakabhona omubhiri gutari muusi muyo. Biziri kutubhuurira kubha bharuuzi bhamaraika mumiiseegi. Na bhamaraika bhakabhabhuurira kubha Yeesu ni muhoru.

<sup>24</sup>“Na abhaandi bhano bhaari hamwe na neetwe, bhakagya mubhubhi bhakabhona niigo ego kyeego abhakari bharya bhagaambiri, nawe ewe bhatamuruuzi.”

<sup>25</sup>Yeesu akabhabhuurira, “Emwe abhageege bhano, kwaki mutakunagya kwiikirirya, kwaki mbakong'wigo kwiikirirya gano gagaambirwe na abharooti?”

<sup>26</sup> Ndora Krisito akeenderwa kuhitira enyaako yoosi yiyo, Taatabhugya aramukora aguungibhwe?”

<sup>27</sup> Niho, akabhagaraanzurira amang’ana goosi gano gakaamirwe iguru yaaye, kweemera ebhitabhu bhya Musa, tee bhitabhu bhyoosi bhya abharagi.

<sup>28</sup> Na hano bhaari bhariisuka muroobho muyo, Yeesu akiikora kubha akyageenderera no orugeendo. <sup>29</sup> Niho bhakamwiisasaama bhukong’u, “Wiikare hamwe neetwe hano! Ndora ritubhiiri ne ekiirima kiiziri.” Niho, Yeesu akasikira yiika kwiikara nabho. <sup>30</sup> Na hano bhakiikara kubhyaakurya, Yeesu akagega omukaate, akagusabhira, akagubhega, akabhaha. <sup>31</sup> Hayo hayo, bhakarimurwa ameeso gaabhu, bhakamumenyeeekererya kubha ni Yeesu. Kyaamwe akabhabhuraku.

<sup>32</sup> Bhakiibhaurira, “Hano twaari munzira, akatukeerenerya gano gaari mu Makaamo Amahoreeru, tukasambaruka bhukong’u muziikoro zeetu?”

<sup>33</sup> Bakabhuuka kwiibhaga riyo riyo, bhakahika Yerusaremu, bhakabhabhona abheega bha Yeesu ikumi na wumwe bhiikumeenie hamwe na abhaandi.

<sup>34</sup> Hano abhabhiri bhayo bhakahika, abhaanabheega bhakabhabhurira, “Ni obhuheene kubha Omukuru Yeesu aryokiri, amuhwaarukiiri Simooni.” <sup>35</sup> Niho bhakazwenia abharikyaabhu gano gakakorwa munzira, bhakabhabhurira kyeego bhakamumenya Yeesu hano akabhega omukaate.

### **Yeesu akahwaarukira abhaanabheega bhaaye**

*(Mataayo 28:16-20; Mariko 16:14-18; Yohana 20:19-23; Matendo 1:6-8)*

<sup>36</sup> Hano abhaanabheega bha Yeesu bhayo, bhaari bhakiibhisirya iguru ya gayo, hasuuhwiigo Yeesu omweene akiimeerera gati yaabhu. Akabhabhurira, “Omureembe gubhe kweemwe.” <sup>37</sup> Bakiitakya, bhakoobhoha bhukong’u, kwo okubha bhakiiseega kubha bharuuzi omusaambwa.

<sup>38</sup> Kyaamwe, Yeesu akabhabhurira, “Ndora muruguuriri bhukong’u, na kwaki mwiitiimaatiri muziikoro zeenyu? <sup>39</sup> Muniisuunze amabhoko gaani na amaguru gaani, niho mumenye kubha neenye. Mungwaateku, mwirorere abheene! Kwo okubha omusaambwa gutana eminoku na gutana amaguha, nawe, kyaabhurya mukundora enye ninabhyo bhiyo.”

<sup>40</sup> Hano Yeesu akamara kubhabhurira gayo, akabheerekyama amabhoko na amaguru gaaye. <sup>41</sup> Abheega bhaaye, bhakazomererwa bhukong’u eno bharuguuriri, nawe bhataari bhiikirirye abhe gayo nigo obhuheene. Niho, Yeesu akabhabhurira, “Awe hano muna ebhyaakurya bhyobhyoosi?” <sup>42</sup> Bakamuha ekitinika kye eswe ekaru, <sup>43</sup> akakigega, akakirya embere yaabhu.

<sup>44</sup> Kyaamwe akabhabhurira, “Gano, nigo garya nabhabhuriiri eriibhaga naari hamwe na neemwe, kubha garaakorwe gano goosi gakaamirwe iguru yaane mumigiro gya Musa, na mubhitabhu bhya abharagi, na mukitabhu kya Zaburi.”

<sup>45</sup> Hayo, Yeesu akabhasakirya no okubhagaranzurira kumenya Amakaamo Amahoreeru. <sup>46</sup> Akabhabhurira, “Ekaamirwe kubha Krisito aranyakibhwa no orusiku rwa katatu araryoka kurwa mubhaku. <sup>47</sup> Na abhaatu bha mubhyaaro bhyoosi, kweemera hano Yerusaremu, bhabhareegibhwa kuriina ryaaye kubha bhate ebhibhi bhyaabhu, niho bharaabhirwe. <sup>48</sup> Emwe neemwe abheerekenia bha amang’ana gayo gatuukiri.

<sup>49</sup> “Murore! Nirabhareetera emwe Ekoru Muhoreeru kyeego Taata yabharagenie, kubha mwiikare mumugye hano tee Ekoru Muhoreeru yiize abhiizurirye obhunagya kurwa mwiisaaro.”

**Yeesu aragegwa kugya mwiisaaro**

*(Mariko 16:19-20; Matendo 1:9-11)*

<sup>50</sup> Kyaamwe, Yeesu akabhakaangata abhaanabheega bhaaye, haguhi no omugye gwa Betania. Hano bhakahika hayo, akagorora amabhoko gaaye iguru, kwo okubhatweera ebhite. <sup>51</sup> Na hano yaari arabhatweera ebhite, niho ewe akabhatiga kwo okugegwa kugya mwiisaaro.

<sup>52</sup> Hayo bhakamuseengera, kyaamwe bhakakyoora Yerusaremu, eno bhazomereerwe bhukong'u. <sup>53</sup> Neebho bhakiikara munyuumba ya Taatabhugya, bhakabha bharamukumya.